

Milik Departemen P dan K
Tidak diperdagangkan
Untuk umum

Hikayat Usman Basyah 1

Ramli Harun



Departemen Pendidikan dan Kebudayaan

HIKAYAT
USMAN BASYAH

1

**Proyek penerbitan Buku Sasta
Indonesia dan Daerah**

Hak pengarang dilindungi undang-undang

PPS/Ac/1/8

Milik Dep. P dan K
Tidak diperdagangkan

Hikayat USMAN BASYAH 1

Oleh
RAMLI HARUN

MILIK KEPUSTAKAAN
DIREKTORAT TRADISI
DITJEN NBSF DEPBUDPAR

PERPUSTAKAAN
DIT. TRADISI DITJEN NBSF
DEPBUDPAR
NO. INV : 2763
PEROLEHAN : 4-5-09
TGL
SANDI PUSTAKA :

Departemen Pendidikan dan Kebudayaan
PROYEK PENERBITAN BUKU SASTRA
INDONESIA DAN DAERAH

PERPUSTAKAAN
DIT. SEJARAH & NILAI TRADISIONAL

nomor Induk : 1648/1984
Tanggal terima : 26-12-1984
Beli/hadiah dari : proyek PBSI x D
Nomor buku :
Kopi ke : 1

KATA PENGANTAR

Bahagialah kita, bangsa Indonesia, bahwa hampir di setiap daerah di seluruh tanah air hingga kini masih tersimpan karya-karya sastra lama, yang pada hakikatnya adalah cagar budaya nasional kita. Kesemuanya itu merupakan tuangan pengalaman jiwa bangsa yang dapat dijadikan sumber penelitian bagi pembinaan dan pengembangan kebudayaan dan ilmu di segala bidang.

Karya sastra lama akan dapat memberikan khazanah ilmu pengetahuan yang beraneka macam ragamnya. Penggalan karya sastra lama yang tersebar di daerah-daerah ini, akan menghasilkan ciri-ciri khas kebudayaan daerah, yang meliputi pula pandangan hidup serta landasan falsafah yang mulia dan tinggi nilainya. Modal semacam itu, yang tersimpan dalam karya-karya sastra daerah, akhirnya akan dapat juga menunjang kekayaan sastra Indonesia pada umumnya.

Pemeliharaan, pembinaan, dan penggalan sastra daerah jelas akan besar sekali bantuannya dalam usaha kita untuk membina kebudayaan nasional pada umumnya, dan pengarahan pendidikan pada khususnya.

Saling pengertian antardaerah, yang sangat besar artinya bagi pemeliharaan kerukunan hidup antarsuku dan agama, akan dapat tercipta pula, bila sastra-sastra daerah yang termuat dalam karya-karya sastra lama itu, diterjemahkan atau diungkapkan dalam bahasa Indonesia. Dalam taraf pembangunan bangsa dewasa ini manusia-manusia Indonesia sungguh memerlukan sekali warisan rohaniah yang terkandung dalam sastra-sastra daerah itu. Kita yakin bahwa segala sesuatunya yang dapat tergali dari dalamnya tidak hanya akan berguna bagi daerah yang bersangkutan saja, melainkan juga akan dapat bermanfaat bagi seluruh bangsa Indonesia, bahkan lebih dari itu, ia akan dapat menjelma menjadi sumbangan yang khas sifatnya bagi pengembangan sastra dunia.

Sejalan dan seirama dengan pertimbangan tersebut di atas, kami sajikan pada kesempatan ini suatu karya sastra daerah yang berasal dari Perpustakaan Museum Nasional Jakarta, dengan harapan semoga dapat menjadi pengisi dan pelengkap dalam usaha menciptakan minat baca dan apresiasi masyarakat kita terhadap karya sastra, yang masih dirasa sangat terbatas.

Jakarta, 1983

Proyek Penerbitan Buku Sastra
Indonesia dan Daerah

PENGANTAR

Tidak ada petunjuk siapa penyusun hikayat Usman Basyah ini. Pada bagian terakhir disebutkan bahwa hikayat ini selesai ditulis pada hari Kamis tanggal dua puluh tiga tahun 1378 H. di Lhok Seumawe. Tidak dicantumkan nama bulannya. Demikian pula tentang keaslian naskahnya. Dengan kata "ditamatkan" dapat memberi pengertian "disusun" atau "disalin". Namun naskah hikayat ini sudah tersimpan di Pusat Dokumentasi dan Informasi Aceh dan kami peroleh pada bulan September 1981.

Dengan ukuran naskah 21 X 16 cm setebal 390 halaman, tulisan tangan huruf Arab, hikayat ini cukup panjang. Dalam mengalihaksarakan ke dalam huruf Latin kami telah mencoba membaginya menjadi dua jilid dan memenggal-menggalnya ke dalam beberapa bagian supaya lebih mudah bagi pembaca mengikuti jalan ceritanya.

Yang menarik tentang hikayat ini ialah kuatnya pengaruh hikayat-hikayat Aceh lama lainnya dalam tema dan jalan ceritanya. Mulai dari cerita seorang raja yang mula-mula tidak mempunyai anak, putri tujuh turun mandi dari kayangan hingga seorang putri yang hendak direbut oleh raja lain, semuanya terdapat dalam hikayat ini. Di sana sini memang terdapat kejanggalan-kejanggalan baik mengenai isi maupun susunan bahasanya yang terikat dengan sajak. Orang yang hidup di zaman jahiliah dikatakannya sudah dapat membaca kitab suci al Quran. Mungkin yang dimaksud dengan "jahiliah" menurut penyusunnya ialah zaman dahulu yang sudah lama sekali, bukan zaman sebelum **Islam**. Hal-hal semacam ini juga sering kita jumpai dalam hikayat-hikayat Aceh lainnya. Namun sebagai sebuah karya sastra, kiranya hikayat ini perlu kita lestarikan sebagai perbendaharaan kebudayaan daerah yang berharga.

Jakarta, 31 Maret 1983
Pengalih aksara
Ramli Harun

ASOE HIKAYAT

Kata Pengantar	5
Pengantar	7
Ringkasan Hikayat Usman Basyah Jilid I	11
I. Usman Basyah di Pulo Ruja	17
II. Meukawen Ngon Putroe Meurak Asanah	63
III. Meurak Asanah Woe U Nanggroe Antara	108
IV. Usman Basyah Jak Seutot Putroe	145
V. Syarwan Indra Bantu Usman Basyah	197
VI. Dienanya Le A Putroe	240
VII. Prang Ngon Raja Haliman Syah	285

AROE THE WAY

1. The first of the series of
 2. The second of the series of
 3. The third of the series of

4. The fourth of the series of

5. The fifth of the series of

6. The sixth of the series of

7. The seventh of the series of

8. The eighth of the series of

9. The ninth of the series of

10. The tenth of the series of

11. The eleventh of the series of

12. The twelfth of the series of

13. The thirteenth of the series of

14. The fourteenth of the series of

15. The fifteenth of the series of

16. The sixteenth of the series of

17. The seventeenth of the series of

18. The eighteenth of the series of

19. The nineteenth of the series of

20. The twentieth of the series of

21. The twenty-first of the series of

22. The twenty-second of the series of

23. The twenty-third of the series of

24. The twenty-fourth of the series of

25. The twenty-fifth of the series of

26. The twenty-sixth of the series of

27. The twenty-seventh of the series of

28. The twenty-eighth of the series of

29. The twenty-ninth of the series of

30. The thirtieth of the series of

31. The thirty-first of the series of

32. The thirty-second of the series of

33. The thirty-third of the series of

34. The thirty-fourth of the series of

35. The thirty-fifth of the series of

36. The thirty-sixth of the series of

37. The thirty-seventh of the series of

38. The thirty-eighth of the series of

RINGKASAN . HIKAYAT USMAN BASYAH JILID I

Zaman dahulu kala di negeri Mekah hidup seorang raja bernama Sultan Malik. Meskipun sudah lama memperisterikan putri Syahribanun, baginda belum mendapat anak. Baginda selalu berdo'a supaya Tuhan menganugerahinya seorang putra yang saleh. Tuhan Maha pemurah. Putri Syahribanun hamil. Karena sangat girangnya baginda sudah memberi nama bayi yang sedang dikandung isterinya dengan nama Usman Basyah. Namun baginda tidak dapat menyaksikan kelahiran putranya, karena beberapa waktu sebelumnya baginda berpulang ke rahmatullah.

Usman Basyah ternyata seorang anak yang cerdas. Pada usia sembilan tahun ia sudah menguasai beberapa macam ilmu sehingga orang-orang Yahudi iri hati kepadanya. Suatu hari ia diajak berlayar ke sebuah pulau oleh beberapa orang Yahudi untuk mencari semacam daun kayu yang dikatakannya sebagai bahan pembuat emas. Sesudah mendapat daun kayu yang dicarinya, orang-orang Yahudi itu pulang dengan meninggalkan Usman Basyah sendirian di pulau yang terpencil itu. Dari atas sebuah gunung karang Usman Basyah melompat ke laut dan akhirnya dalam keadaan tak sadar terdampar di pulau Ruja. Pulau itu dihuni oleh tujuh orang gadis penjaga kolam mandi kepunyaan tujuh orang putri dari negeri Indra. Usman Basyah dirawat oleh ketujuh gadis kakak beradik itu sampai sembuh terutama oleh yang paling bungsu yang bernama putri Meulu. Pulau Ruja terlarang bagi kaum lelaki. Raja Haliman Syah akan membunuh setiap orang laki yang berani datang ke pulau itu. Ketika ketujuh orang gadis itu sewaktu-waktu pulang ke negeri Indra di kayangan, pengawasan istana diserahkan kepada Usman Basyah.

Pada suatu hari ketika Usman Basyah sedang menikmati keindahan kolam mandi, tiba-tiba tujuh orang putri dari negeri Indra turun hendak mandi. Usman Basyah bersembunyi dekat kolam sambil memperhatikan putri-putri dari negeri kayangan

itu. Ketika matanya tertuju kepada salah seorang di antara mereka, ia teringat akan cerita putri Meulu. Yang teramat cantik di antara ketujuh putri itu ialah yang paling bungsu yang bernama Meurak Asanah. Ketika gadis-gadis penjaga pulau datang, Usman Basyah segera menyatakan keinginannya hendak memiliki putri Meurak Asanah.

Putri tujuh turun mandi setiap hari Senin dan Kamis. Pada suatu hari ketika mereka sedang asyik berkecimpung dalam kolam, baju terbang putri Meurak Asanah diambil dan disembunyikan oleh Usman Basyah. Karena tidak menemukan bajunya Meurak Asanah ditinggalkan di istana pulau dan keenam kakaknya terbang ke negeri Indra.

Sebaik mengetahui peristiwa yang menimpa putri bungsunya baginda raja Haliman Syah melarang keenam putrinya turun lagi ke bumi.

Sesaat sesudah keenam putri meninggalkan pemandian pulau Ruja, turunlah hujan lebat disertai angin tofan yang kencang. Usman Basyah menyamar sebagai seorang wanita. Kepada gadis-gadis istana dikatakan bahwa ia terdampar di pulau itu dan kapalnya sudah karam dihempas badai bersama dengan suami dan semua anak buahnya. Putri Meulu yang sudah mengatur semua siasat itu menerima Usman Basyah tinggal di Istana.

Sesudah sebulan Usman Basyah tinggal di istana pulau Ruja, Meurak Asanah mulai mencurigai Usman Basyah sebagai pengambil bajunya. Namun suara emas Usman Basyah ketika mengumandangkan ayat-ayat suci al Quran membuat putri kayangan itu jatuh hati kepadanya. Kepada putri Meulu ia berkata bahwa andai kata anak kapal itu seorang laki-laki ia sudi dipersuntingnya.

Tiga tahun sudah berlalu. Meurak Asanah sudah menjadi isteri Usman Basyah dan sudah dikaruniai seorang putra yang diberi nama Hasyim Pari. Setahun kemudian Usman Basyah bersama dengan Meurak Asanah dan putranya pulang ke Mekah dengan diantar oleh ketujuh gadis penjaga pulau. Tahun berikutnya Meurak Asanah melahirkan putranya yang kedua.

Pada suatu hari Meurak Asanah diajak oleh mertuanya Syahrabanun mandi-mandi di sebuah kolam. Usman Basyah sendiri

ketika itu sedang bertapa. Meurak Asanah selalu meminta baju terbang yang disimpan oleh suaminya, tetapi mertuanya tidak memberikannya takut Usman Basyah marah. Karena terus mendesak akhirnya mertuanya menyerahkan baju sakti itu kepada Meurak Asanah. Selesai mandi, putri kayangan itu segera memakai baju terbangnya dan sambil menggendong kedua anaknya ia terbang ke angkasa hingga sampai di negeri Indra. Supaya orang tuanya tidak mengetahui bahwa ia sudah bersuami, kedua anaknya dititipkan pada Nek Maja.

Adapun Usman Basyah sangat sedih demi mengetahui isteri dan kedua anaknya sudah pergi. Meskipun seorang putri Mesir bernama Kariman Binti telah jatuh cinta kepadanya, namun ia tetap hendak mencari isterinya. Dengan menumpang sebuah kapal ia berlayar ke pulau Ruja. Ia meminta bantuan ketujuh gadis pulau untuk mencari Meurak Asanah. Mereka membawa Usman Basyah ke negeri Kuta Karang. Di sana ia berkenalan dengan putri Syamsul Kamar. Raja Kuta Karang menasihatinya supaya tidak mencari lagi isterinya yang tidak setia itu. Tetapi ia tetap bertekad untuk mencarinya. Akhirnya dengan bantuan raja Malik Usman Basyah sampai di negeri Hairan yang diperintah oleh seorang ratu bernama Syarwan. Penduduknya semua terdiri dari kaum wanita. Di sana Usman Basyah menyerahkan sepucuk surat dari raja Malik kepada ratu Syarwan. Dalam surat itu raja Malik menceritakan semua hal ihwal Usman Basyah yang sebenarnya. Sesuai dengan pesan raja Malik di negeri tersebut ia menyamar sebagai seorang wanita supaya rakyat tidak mengetahui bahwa ia seorang laki-laki. Ratu Syarwan akan membunuh setiap lelaki yang datang ke negerinya. Ratu juga menasihati Usman Basyah supaya melupakan Meurak Asanah dan ia akan mencari putri lain yang lebih cantik. Tetapi saran semacam itu semuanya ditolak oleh Usman Basyah.

Dengan mempergunakan kendaraan sakti Usman Basyah bersama ratu Syarwan disertai oleh sejumlah pengiring berangkat menuju negeri Indra. Sesudah sampai di sana ratu Syarwan pulang lagi ke negerinya sambil berpesan supaya Usman Basyah menyebut namanya apabila ada kesulitan. Dengan menyamar sebagai seorang pengemis **Usman Basyah** pergi ke rumah seorang wanita tua yang

sehari-hari disebut Po Ni atau Nek Keubayan. Po Ni yang baik hati itu meminta supaya Usman Basyah tinggal di rumahnya dan sesudah mengetahui maksud kedatangannya ia menawarkan jasa baiknya.

Setiap hari Usman Basyah pergi ke mesjid dan membaca al Quran. Banyak orang yang terpesona mendengar suaranya yang merdu. Putri Meurak Asanah bersama dengan keenam kakaknya juga pergi melihat tamu yang baru datang itu mengaji. Meurak Asanah merasa ada sesuatu dalam hatinya terhadap orang baru itu. Keesokan harinya ia pergi sendirian dengan keyakinan bahwa pengemis itu ialah suaminya. Usman Basyah yang sedang tidur nyenyak di rumah Po Ni segera dipeluknya. Usman Basyah mula-mula berpura-pura tidak mengenalnya. Tetapi sesudah Meurak Asanah mengancam akan bunuh diri jika ia tidak dihiraukan, Usman Basyah pun memperkenalkan dirinya. Kedua anaknya dibawa kepadanya. Semuanya dilakukan secara diam-diam supaya tidak diketahui oleh orang tuanya di istana.

Lama kelamaan baginda raja Halimn Syah dan keenam putrinya mengetahui hal ihwal Meurak Asanah. Kecuali kakaknya yang tertua bernama Daraman Ali, yang lain semuanya iri hati kepada adiknya yang sudah bersuami itu. Mereka bermaksud hendak membunuh Usman Basyah bersama kedua anaknya. Meskipun sudah diingatkan oleh kakaknya yang tertua, Meurak Asanah tidak berburuk sangka. Atas permintaan mereka ia membawa anaknya yang kecil ke istana. Dalam perjalanan ia dan anaknya dianiaya oleh kelima orang kakaknya. Usman Basyah mengetahui hal itu. Ia segera datang bersama anaknya Hasyim ke tempat kejadian. Pada saat itu pula mereka menyergap Usman Basyah. Ia diikat bersama kedua anaknya lalu diseret ke sawah. Di sana mereka disiksa dan dibuang ke dalam sebuah paya, sedangkan Meurak Asanah dibawa ke istana. Raja Jin Pari penghuni paya itu menolong Usman Basyah dan kedua anaknya sampai sembuh.

Atas petunjuk raja Jin Pari, Usman Basyah dapat memiliki dua buah benda sakti yang sedang diperebutkan oleh dua orang kakak beradik yaitu sebuah tudung dan sebuah tongkat. Kemudian Usman Basyah meminta bantuan raja Jin Pari untuk membebaskan

isterinya Meurak Asanah. Di tengah sebuah lapangan Usman Basyah memancangkan tongkat saktinya. Berdirilah di tempat itu sebuah istana dengan benteng pertahanannya yang kuat dan bala-tantra yang besar. Po Ni mendapat tugas untuk menjemput Meurak Asanah di istana orang tuanya.

Mengetahui adiknya telah pergi ke istana Usman Basyah, putri Hijau mengadu kepada ayahnya. Baginda amat murka lalu mengerahkan rakyatnya untuk bersiap-siap menghadapi Usman Basyah. Meurak Asanah mengirim surat kepada ayahnya mohon untuk menghindari pertumpahan darah, tetapi karena hasutan dari putri Hijau maka pecahlah perang besar. Pertempuran seru terjadi dan pihak Usman Basyah dapat mengalahkan pasukan Haliman Syah. Melihat keadaan demikian baginda meninggalkan istananya pergi bersembunyi ke dalam hutan karena malu dengan anaknya dan Usman Basyah. Baginda menyesal karena menuruti kemauan putri Hijau dan tidak mau mendengar pendapat anaknya yang sulung Daraman Ali yang tidak setuju menyerang Usman Basyah.

Karena yakin pasukan Haliman Syah sudah kalah, Usman Basyah memerintahkan seorang panglima perangnya bernama Bribot Tapa untuk menjemput baginda raja Haliman Syah yang sedang bersembunyi dalam hutan.

H I K A Y A T U S M A N B A S Y A H

I

Bismilla irrahmanirrahim

I. U S M A N B A S Y A H D I P U L O R U J A

Subhanallah Muhammad Na' i
Tuhanku Rabbi amat kuasa
Hana miseue baranggari
Zat nyang suci satu saja

Lagi murah lom ngon rahim
Ngon halim sayang keu haml'a
Asoe donya dum lat-batat
Laot darat neukaronya

Alhamdulillah seugala pujoe
Bandum muwoe milek Esa
Bismillah lon tueng beureukat
Ngon kuramat dum anbia

Ngon mukjizat Nabi Muhammad
Beureukat sahbat Nabi kita
Lon meung peugot saboh hikayat
Sang-sang mangat lon deungo haba

Ya Tuhanku lon meulakee
Gata nyang mee peutroh pinta
Ngon beureukat dumna guree
Nyang bri eleumee dalam dada

Ngon kuramat hijir asuwat
Ngon beureukat Makah mulia
Neubri sampoe bar nyang hajat
Ya Muhammad beu seumporna

Sira duek-duek poh beurakah
Di menasah sabe muda
Sidroe ureueng jak seumeugah
Rancak babah bijaksana

Eleumee na ban lagee hak
Gop nyan budak gohlom raya
'oh lon deungo jroh meusigak
Sang-sang galak ate hamba

Lon cok daweuét ngon keureutah
Kalam patah ujong hana
Yoh masa nyan ulon kisah
Insya Allah ulon cuba

Teudeuk haba dilee siat
Lon riwayat sidroe raja
Sidroe Malek nanggroé Makah
Aseuliah gob nyan raja

Jameun masa jaheliah
Rasulollah gohlom nyata
Nama estri Syahri Banun
Meunan geukheun lon deungo haba

Bandua droe hana peue kheun
Göt peutumuen sama juga
Alempi that hana sakri
Lom ngon sufi that wara'a

Lam ibadat geunap uroe
Han tom sunyoe jeuep kutika
Teutapi male aneukneu tan
Malek nyan umu ka tuha

Neumeulakee ubak Tuhan
Seureutakan deungon ie mata
Ya Tuhanku lon meulakee
Gata nyang mee kabui pinta

Lon meunapsu he pangulee
Gata nyang thee dum peukara
Neubri saboh aneuk di lon
Beu jiseuon suroh gata

Bu meusyeuhu seugala don
Kareuna lonpi ka tuha
Beu jroh ate akai tajam
Beu jeuet jifam eleumee gata

Meunan he Po neueleuhum
Neubri agam aneuk hamba
Karonya Po peurintah Tuhan
Sampoe yoh nyan ban neupinta

Tuhan peutroh ban nyang hajat
Malek nyan that ate suka
Syahri Banun putroe 'ali
Neueu hame pruet ka raya

Teungku Malek neukheun meunoe
Deungo kamoe putroe muda
Aneuk ulon lam kandungan
Aneuk agam Po karonya

Lam nanggroe nyoe tan tunangan
Lemah meunan bak rahsia
Judo si nyak nanggroe jeuh
Tajak han troh sibuleuen dua

Burong teureubangpi han ek troh
Manyang leusoh dalam hawa
Meukon urueng hampe Tuhan
Han troh jalan dalam indra

He putroe cut ulon paban
Kheundak Tuhan ateueh hamba
Teutapi na bacut paloe
Le that dudoe meuteumeung bala

Beu taingat he cut putroe
Baranggasoe bahaya donya
Meuka bahaya meuhat nekmata
Meuteueng mangat akhe masa

Tadeungo lon puteh lumat
Lon amanat ubak gata
Kareuna lon ka tuha that
Ka rab trok had ajai teuka

Lon rab mate he sambinoe
Aneuk jinoo lon boh nama
Usman Basyah ulon rasi
Nyang that 'ali ateueh donya

Tadeungo lon he putroe ti
Aneuk kami tapeulara
Bek tadhoh-dhot ngon tabeunci
Beu got he ti tausaha

Aneuk lon nyoe sangat 'ali
Su sang bansi Malem Diwa
Soe nyang deungo that beureuhi
Sang keucapi ngon biula

Teutapi lon mata apon
Han meuteumeung eu aneukda
Teungku Malek yoh nyan neumoe
Neupeugah droe bak Rabbana

Lom neupeugah ubak judoe
Sira bae ngon ie mata
Wahe judo ureueng binoo
Lon wasiet nyoe lom bak gata

'oh ka lahe aneuk kamoe
Tapeurunoe beuet aleh ba
Lom he putroe beu tapeugah
Nyoe di kah nyang na pusaka

**Beuliong alat ngon teumarah
Dukeuh keuba dilee masa
Di leuen rumoh sibak kayee
Geurapat me peugot bahtra**

**Wasiet ayah neukeun dilee
Trep ka kayee neupeulara
Laen nibak nyan alat utoh
Boh kande meuh takeurija**

**Anek ulon that bit 'ali
He putroe ti nyang jroh rupa
Supi mangat hana sakri
Tiwah bangsi ngon biula**

**Malempi that hana macam
Lidah hitam meukeumala
Han peue guree si banyak cut
Malem lam pruet neukaronya**

**Nyankeu wasiet puteh lumat
Beu taingat keu aneukda
Seungap 'oh nan haba abi
Cut putroe ti lon calitra**

**Siploh buleuen hame putroe
Teungku Malek nyoe tinggai donya
Kheundah Tuhan Po lon sidroe
Malek neuwoe ubak mula**

**Teungku Malek kakeuh mate
Cut putroe ti sosah raya
Teungku mate geuseumanoe
Putroe jimoe keumong mata**

**Teungku Malek geuba u jeurat
Ureueng intat troh meulaksa
'oh lheueh tanom rakyat dum woe
Tuan putroe dawok rugha**

Ie mata ro seun-seun siploh
Allah hai beh sayang raya
Jipoh-poh droe putroe intan
Dum dendayang limpah dada

Tadeungo rioh lam meuligoe
Dum jipoh droe tuha muda
Putroe poh droe hana lagee
Antok ulee keumong muka

Jiantok droe bak-bak guci
Teupeh gaki ladom mata
Allah he judo bukan sayang
Tamse subang reuloh mata

Allah Allah judo samlakoe
Saleh ho nanggroe lon meuraba
Teungoh galak ulon pandang
Ka leukang sang broh lam mata

Allah judo bukan rugoe
Tinggai kamoe tajak gata
Bukon sayang bungong meulu
Sret meutabu dalam tika

'oh lon ingat ate ragu
Pakon teungku dilee bungka
Bukon sayang bungong geutoe
Keunong uroe layee rata

'oh lon ingat po samlakoe
Tinggai sidroe tan le gata
Saleh ho troh ulon sidroe
Po samlakoe lon han neuba

Bukon sayang bungong asan
Abeh leukang lam ie raya
Allah he teungku uleebalang
Ho troh jalan 'oh tan gata

**Keupeue tika deungon kaso
Linto baro tan le gata
Bukon sayang lon eu pade
Troh angen gle reubah meutimpa**

**Allah he teungku bukon rugoe
Tinggai putroe tajak gata
le di laot puteh hijo
Dalam baro kuta raja**

**Keupeue tika deungon kaso
'oh tan linto keupeu guna
Bungong jeumpa mirah mirah
Sret siulah lam ie raya**

**Bukon sayang lon eu bayam
Jroh meurumpan dum mubanja
Wahe teungku bungong puteh
Ngon soe lon eh 'oh tan gata**

**Deungon soe lom lon meututo
Tinggai judo dalam tika
Wahe teungku pajan neuwoe
Mate putroe dalam kuta**

**Allah Allah he Poteu Allah
Pakri lon bah ka troh masa
Jinoe kugrop dalam laot
Bahle eungkot meukeurija**

**Meunyo tan le po bintang sret
Keupeue po cut 'oh tan gata
Bukon sayang bak rangkileh
Cabeueng abeh angen timpa**

**He teungku cut bungong puteh
Keunoe keudeh lon meuraba
Bah lon top droe teuntang ate
Bah lon mate sigo dua**

Meuhan meunan lon jak lam gle
Bah megule dalam rimba
Bukon sayang cicem murong
Jeuep-jeuep gampong jak mumita

Reuloh ate lon ngon jantung
Bungong tanjong 'oh tan gata
Bukon sayang mirahpati
Jimeunari dalam tika

Gata mate ngon teukeudi
Saleh pakri putroe muda
Bukon sayang lon eu rumoh
Abeh reuloh tinggai rungka

Wahe teungku bentara jroh
Gata gadoh siklep mata
Teungoh galak bak lon pandang
Ka leukang sang broh lam mata

Wahe jido bungong keumang
Soe peutimang lon pruet raya
Jinoe han soe le peurintah
Bungong mirah gata bungka

Haba bae han ek peugah
Mewoe kisah putroe muda
Hingga troh bak buleuen siblah
Usman Basyah pandang donya

Teungoh beukah matauroe
Samlakoe yoh nyan keulua
Ban neukalon uleh putroe
Bit aneuk nyoe jroh that rupa

Alhamdulillah ka seuleusoe
Ban kheun lakoe han meutuka
Rupa jroh that msieue bintang
Soe nyang pandang ate suka

Putroe tahe hireuen mandang
Siulah sang bintang raja
Hingga rayek uleebalang
Tamse mambang dengan rupa

Jeuet meututo tilo alang
Galak mawang ate suka
Neupeuranoe beuet Quruan
Uroe malam putroe aja

Ureueng nyang jak dum meuulang
Bangon nyum sang su biula
Sang seurune bangsi gambang
Ulah sang-sang genggong Jawa

Han tom nyang ka dilee meunan
Peue meusu nyan he teungku da
Sang-sang ureueng beuet Quruan
Meujan-jan bagoe biula

Bahle 'oh nan saboh syahdan
Teuduek 'oh nan siat haba
Ulon peugah muda bangsawan
Cut Usman bijaksana

Sikureueng thon sampoe umu
Ban bintang hu cahya muka
Putroe neukheun teuma laju
Bak cut meulu bintang rusa

Wahe aneuk po samlakoe
Deungo kamoe boh ate ma
Wasiet ayah he aneuk droe
Yoh saboh roe goh na gata

Nyan bak kayee di leuen sibak
He cut manyak peugot bahtra
Laen bak nyan utoh pande
He boh ate bijeh mata

Pupot pale ngon seuneupet
Ngon peugot subang meujintra
Abeh dumpeue ma neupeugah
Insya Allah seuot banta

Han peue hai ma lon seuleuah
Bahle payah lon usaha
Cut budiman jikoh kayee
Bak peureudee ka jimeukha

Kayee reubah ka meusumpom
Ka teugom di leuen istana
Jitarah le bacut bacut
Si nyak cut ubit goh raya

Umu sithon peugot sabe
Hingga sampe jikeurija
Saoh layeue jipeuase
Ka meusampe ban wasiet ma

Si nyak cut han soe peurunoe
Bak akai droe ura-ura
Pihak areh po samlakoe
Teukap jaroe soe eu rupa

Rupapi jroh that seureuloe
Baranggasoe han sabe sa
Cut Usman that ceureudek
Rupa baik sang peurmata

Jipeugot meuh dum jiculek
That bit tarek ngon bicara
Abeh bandum ka jipeugot
Ban nyang wasiet han meutuka

Kitab Quruanpi ka mufom
Abeh maklum jeuep peukara
Teuma meuthee jeuep-jeuep gampong
Jijak junjong muda beulia

Le that ureueng masok Islam
Bak masa nyan bak cut banta
Akai jroh that hana macam
Cut Usman bijaksana

Teuma meuthee bak Yahudi
Kawom kafe si ceulaka
Cut Usman that meusyuehu
Barat timu dum jithee na

Jimupakat duek meuriti
Jinoe pakri tabicara
Meuhan tapoh Usman Basyah
Akhe sosah geutanyoe dumna

Ngon agama ka jiubah
Ban kheun ayah dum seumporna
Le that ureueng nyang ka masok
Jipeutaklok bak agama

Bak geutanyoe sidroe han trok
Patong ka brok han soe puja
Meusalang cut mantong keuci
Saleh pakri 'oh ka raya

Jinoe geutanyoe han jeuet taiem le
Tapoh mate jak udehta
Teuma seuot sidroe rakan
Bek that meunan taangkara

Bahle tapoh ngon amilan
Tameurakan dilee mula
Meunyo tapoh tapeugajah
Hana keumah bak lon kira

Kareuna jih gaseh Allah
Raya tuah ngon bahgia
Teuma seuot sidroe sahbat
Nan Meuleuhat geuboh nama

Nibak ulonpi mupakat
Meunan got that ban kheun gata
Tamaba jih siat u gle
Tapeucré dilee ngon bunda

Meuka cre-bre hana peue le
Jadeh mate hilang nyawa
Tayue jak pot on kayee meuh
Timoh ateueh gunong raya

'oh troh keunan hana le lheueh
Di yup kayee meuh inong geureuda
Geureuda jiduek di cong kayee
Jitren meuhee 'oh meusuara

Kulet guda tame saboh
Sinan taboh si ceulaka
Tapeulop jih lam kulet nyan
Tatiek sinan bak kuala

Troh geureuda mangat jicok
Jipeuek u gunong raya
'oh troh keudeh ateueh buket
Tayue teubiet meutan fana

Dum geutanyoe tameusilee
Di yup batee bek binasa
Tayue jak cok nyan on kayee
Keunoe dilee tayue geulawa

Troh on kayee dalam jaroe
Bandum tawoe sigo bungka
Jih bek tacok bahle sinan
Mangat simpan mate fana

Keumah pakat ka meuteuntee
Yahudi asee jitren lanja
Jijak laju bak Usman
Sampoe jalan si ceulaka

Ka teukeudi nibak Tuhan
Cut Usman keunong bala
Yahudi troh tamong keunan
Meuteumeung ngon muda beulia

Yoh masa nyan jibri saleuem
Meunoe jikheun si ceulaka
Salam 'alaikom cut meutuah
Ka troh langkah lon bak gata

Cut Usman seuot pantah
Tamong leupah he syeedara
Peue na hajat cuba peugah
Kareuna Aliah bek meuseunda

Seuot Meuleuhathana patot
Meukon na buet nyang sibeuna
Lon jak keunoe wahe po cut
Raya meukeusud he bentara

Dilee han tom na lon peugah
Lon peusah jinoe bak gata
Ngon tulong Po insya Allah
Alhamdulillah troh ban pinta

Tajak po cut tameulangkah
Buket 'adimah gunong raya
Tajak cok on kayee intah
Gata meugah jeuet keu raja

Tahareukat han le payah
Kaya limpah le areuta
Jeuet tapeugot meuh nyang mirah
Hana payah le that laba

Tatem jak cok cuba peugah
Adat han bah lon jak gisa
Meuek tacok on kayee nyan
Kamoe laen jeuet keu hamba

Cut Usman seuot rijang
Di ulon han bek tamaba
Hana hajat lon keu meugah
Atra barollah han lon hawa

Tuhan kaya lagi murah
Nyang that meugah laen hana
Lagi han jeuet cre di sinoe
Ulon nyoe mantong hukom ma

Yahudi kheun teuma meunoe
Samlakoe jak tanyong bak ma
Meutan idin bak po ma droe
Di kamoepi hana rela

Cut Usman leugat neuwoe
U rumoh droe dalam kuta
Neukheun bak ma neupeugah le
Lon Yahudi yue peuhaba

Abeh neupeugah awai akhe
Ma seuot le bah tabungka
Ma seuot le pantah-pantah
Bu meutuah boh ate ma

Bahle aneuk jinoo tajam
Tabawak on kayee rimba
Usman deungo narit meunan
Jitren yoh nyan sigra-sigra

Jijak leugat bak Yahudi
Jipeugah le idin bunda
Ma lon neukheun nibak kamoe
Neubri jak nyoe sajan gata

Meunyo taba ulon u gle
Idin neubri uleh bunda
Ate mangat hana sakri
Yahudi ka troh ban pinta

MILIK KEPUSTAKAAN
DIREKTORAT TRADISI
DITJEN NBSF DEPBUDPAR

Banta jiba jipeuili

Troh u pasi mieng kuala

Jipeuek le dalam sampan

Dayong rijang ubak bahtra

Kapai Yahudi sit lam laot

Troh le put cut dalam bahtra

Troh lam kapai cut bintang sret

Saoh jibet ka jibungka

Jimeulayeue uroe malam

Peujam daratan naggroe raja

Umu sibuleuen dalam laot

Troh po cut u laot raya

Jipot angen jibleuet uroe

Po samlakoe ro ie mata

Leumah pike lam ate droe

Saléh keupeue ulon jiba

Tinggai ngon ma lon di nanggroe

Sayang sidroe ngonpi hana

Saléh han le meuteumeung woe

Bak teumpat nyoe hilang nyawa

Neueu gunong manyang leusoh

Meusampoh lam awan miga

Allah Allah hai po ma beh

Lon tasuroh tayue bungka

Han mee taeu ulon tuan

Bak pihak tan le ayahda

Ka teukeudi nibak Tuhan

Ulon paban ka trok masa

Jinoe han le meuteumeung woe

Mate sinoe hilang nyawa

Allah Allah he ya Rabbi

Ka teukeudi ateueh hamba

Allah he ma panyot tanglong
Tasuroh lon tayue bungka
Ulon sidroe hana tuah
'oh noe langkah dalam donya

Ngon ie mata peunoh limpah
Ile jojah santeut banja
Teuduek 'oh nan dilee siat
Nyoe lon sambat haba nyang ka

Yahudi paleh troh ban hajat
Ate mangat si ceulaka
Jilhom saoh linggang taloe
Jipioh droe siklep mata

Jimupakat sabe keudroe
Pakri jinoe toh bicara
Bah tayue jak si aneuk nyoe
Jih sidroe u gunung raya

Han jeuet trep taduek di sinoe
Pulo nyoe peunyaket raya
Troh geureuda han jan taeu
Beudoh laju bek le jula

Jilhom saoh bet meulinggang
Jeumeurang dalam kuala
Troh u bineh teungoh rijang
Cut Usman sajan jiba

Jikheun le Yahudi suang
He bintang jak teungoh gata
Jinoe gata jak ek gunung
Meunan keunong bak lon kira

Cut Usman seuot meunoe
Sira jimoe ngon ie mata
Pakri lon ek gunung leusoh
Meusampoh lam awan miga

Bek meudawa he cut bungong
Beudoh rijang he cut banta
Yahudi kheun meunoe meudeh
Usman pateh ban nyang haba

Lom jikheun bak samlakoe
Tasom droe lam kulet guda
Taduek teutap meusisa'at
Nyoe amanat lon bak gata

Bek tateubiet bungong uroe
Gata paloe jeuet binasa
Na soe peuk ateueh gunong
Taduek mantong lam kuletnya

Troh u pucak takeulua
Cok kayee nyan tageulawa
Tatiek u baroh ubak kamoe
Teuma dudoe lon cok gata

On kayee nyan di kamoe bacut
Laen po cut milek gata
Usman deungo Yahudi peugah
Dum geukubah dalam dada

Teuma neulop lam kulet nyan
Cut Usman hana dawa
Yahudi balot jibeureukah
Jikeubah di mieng kual

Jikeubah bak bineh pasi
Di Yahudi som droe sigra
Yahudi paleh ka jimeusom
Samlakoe lam kulet guda

Jitakot troh geureuda paleh
Jipeuabeh ban seumua
Bak gaki gle jimeusilee
Preh on kayee jigeulawa

Watee akhe leuho uroe
Geureuda woe keunan teuka
Ban jikalon di bineh pasi
Pane redeuki han tom nyang ka

Jisujud le pantah lari
Jisama le kulet guda
Ka jibapo pantah pantah
Hana ulah ate suka

Hingga troh bak gunung 'adimah
Sinan pioh siklep mata
Troh u pucak geureuda pioh
Jimeung pajoh kulet guda

Jieu kulet hana asoe
Beungeh han soe silagoina
Jitiek kulet hana asoe
Jipo tanggoe laen rimba

Geureuda leupah han le sinan
Cut Usman teubiet sigra
Yoh masa nyan dong beurdiri
Pujoe Rabbi Tuhan Esa

Usman ngieng wie ngon uneun
Neukalon ban siseun lingka
Neueu sinan bak kayee meuh
Timoh ateueh gunung raya

Yahudi dong di kaki gunung
Jitanyong bak muda beulia
Ka troh taek he nyak bungong
Nyoepat lon dong lon preh gata

Cok on kayee tatiek keunoe
Teuma dudoe lon cok gata
Usman deungo meunan bunyoe
Samlakoe hana meudawa

Cabeueng kayee jicok pantah
Jibeureukah jigeulawa
Cabeueng kayee neutiek u baroh
Yahudi bioh sambot sigra

Troh on kayee dalam jaroe
Yahudi woe ka jibungka
Cut Usman hei Yahudi
Tacok kami jinoe sigra

Pakon taplueng ka talari
Bit that deungki akai gata
Yahudi seuot teuma yoh nyan
Bah le sina tinggai gata

Bah rimueng kap badeuek gajah
Gata meugah le bicara
Jinoe mate nyawong sudah
Jieumpah le inong geureuda

Samlakoe cut seuot yoh nyan
Pakon meunan akai gata
Pakon meunan gata rakan
Hana sayang lon adekda

Yoh di gampong sapeue padan
Jinoe teelan laen kira
Di Yahudi jiwoe leugat
Ka troh hajat si ceulaka

Samlakoe cut sosah sangat
Ka teuingat po jroh rupa
Allah Allah he ya Rabbi
Saleh mate hilang nyawa

Yoh nyan neumoe cut bangsawan
Han muban-ban ro ie mata
Allah he Po ulon paban
Kheundak Tuhan ka troh masa

Tangah u langet teukui u bumoe
Dawok neumoe hana reuda
Pakri laku ulon jinoe
Ho troh kamoe ya Rabbana

Plueng u timu ngon u barat
Roh leugat lam kareueng meucula
Ie mata ro seun-seun siploh
Allah hai beh sayang raya

Neueu gunong manyang leusoh
Meusampoh lam awan miga
Laot lingka that barollah
Nyang jeuet sosah banta muda

Manyangpi that hana macam
Kareueng tajam miseue suda
Neukeumeung tren hana dapat
Sosah sangat sidroe saja

Hijo-biro bulee kumbang
Lang-geumilang cahya muka
Umu baro muda seudang
Soe nyang pandang ro ie mata

Tahe-gante po cut bintang
Yahudi suang jicok bak ma
Tinggai di ma dalam gampong
Ka meuuntong aneuk jiba

Teuma lheueh nyan cut bangsawan
Ubak Tuhan neumupinta
Ya Tuhanku lon neutulong
Neupeulindong nibak bahya

Beu seulamat beu roh untong
Troh u gampong lon woe bak ma
Meunyo han troh ulon kuwoe
Neubri gantoe miseue po ma

Neukap bibi ganceng gigoe
Neugrop jinoo u laot raya
Ateueh gundng leugat neugrop
Ka lam laot banta muda

Cut Usman sret lam laot
Ka mupalot riye rek timpa
Tujoh uroe riyeuek usong
Trok bak ujong babah kuala

Teuma troh bak saboh nanggroe
Po samlakoe keunan teurhanta
Saboh nanggroe dalam laot
Nyan keunan sret po jroh rupa

Hana ureueng di nanggroe nyan
Nyang na sinan putroe muda
Ureueng laen hana sidroe
Nama nanggroe Pulo Ruja

Po samlakoe keunan ka sret
Angen bapot riyeuek ba-ba
Sinan meusareueng ateueh pante
Sang ka mate ingat hana

Bak bineh ie sinan linteueing
Ceulumbang baplueng bakat ba-ba
Tujoh uroe teutap sinan
Karonya Tuhan muda beulia

Grak teukeudi bri Tuhanku
Putroe Meulu jak mumita
Nyankeu putroe nyang that 'ali
Lagi sufi that wara'a

Syeedarajih na tujoh droe
Aduen adoe saboh bunda
Deungo lo peugah nama putroe
Mangat meusoe singoh lusa

Nyang tuha nama Putroe Phang
Nyang adoe nyan Nuron A'la
Nama nyang lhee Syahri Banun
Meunan geukheun lam calitra

Nyang adoe nyan Cut Baniroh
Putroe Paridoh nyang keulima
Nama nyang keunam Putroe Jinakru
Putroe Bungsu tulet bak ma

Sinan geuduek bak pulo nyan
Trep ka jameun sit ka lama
Keumiet teumpat Meurak Asanah
Putroe indah di nanggroe Indra

Putroe tujoh di nanggroe manyang
Jitren keunan jak meuupa
Meurak Asanah that analan
Tamse intan cahya muka

Soe nyang kalon reubah pangsan
Han tatuban pungo gila
Syeedarajih na tujoh droe
Goh na lakoe aneuk raja

Adoe tulet Meurah Asanah
Haliman Syah nama raja
Nyankeu raja that seureuloe
Dalam nanggroe gampong Indra

Seunayan Hameh jijak manoe
Sambinoe bak kulam ara
Bantujoh droe keunan jitren
Hana tom troh manusia

Putroe bunoe nyang tujoh droe
Aneuk meuntroe wadi raja
Suroh raja Haliman Syah
Kawai kubah teumpat aneukda

Teumpat manoe kulam indah
Geutatah batee meutia
Jaga sinan putroe tujuh
Kuta kukoh silagoina

Tujuh lapeh pinto geuboh
Jeuoh jeuoh troh nam deupa
Di putroe nyan ladem kayem
Jijak meuen dalam rimba

Minta peulandok geunap uroe
Peulaloe droe ngon syeedara
Bak jijak-jak seutot langkah
Ka leupah teubiet u lua

Hingga troh u bineh pasi
Putroe 'ali kalon rupa
Leumah jieu saboh macam
Manikam budak baro na

Putroe Meulu salah waham
Teudong diam sikutika
Neueu rupa miseue intan
Hana macam hu meucahya

Putroe kalon ka jilihat
Jipeurab jijak peunyata
'oh jikalon budak jroh that
Tanyong leugat ubak cutda

Supo aneuk he cutda droe
Han tom puroe dilee nyang ka
Saleh geupoh saleh geuboh
Ngon rupa jroh hana ngon sa

Phon jameun kon troh 'an jinoe
Han tom keunoe manusia
Bak uroe nyoe ka teukeudi
Po tallah bri keunoe teuka

Saleh karam dalam laot
Jime le eungkot keunoe jiba
Putroe Meulu lon khein meunoe
Bah tapuwoe wahe cutda

Dudoe tayue tukang seumbeuleh
Meuka puleh bak nadeu'a
Bakjih tayue sie peulandok
Udeh tajok jak tagisa

Putroe tuha seut nyoeban
Bek he intan iem tasaba
Pakri tapuwoe adoe badan
Jih nyan agam bukon dara

Meu'oh puleh nibak pangsang
Saleh pakriban jibicara
Kadang meuthee nibak putroe
Ensan tapuwoe tapeulara

Dum geutanyoe akhe rugoe
Neukoh takue uleh raja
Neukheun geutanyoe tatroh agam
Saleh waham tameudina

Beudoh laju wahe adoe
Jak udeh woe uroe jula
Si banyak cut tinggai sinoe
Tuhan sidroe nyang peulara

Lom jimarit Putroe Meulu
Cutda teungku bukon seunda
Meukon aneuk ureueng meusyeyuhu
Eelia Tuhanku that takwa

Han jeuet udep dalam laot
Dumna eungkot meukeurija
Han jipubuet buet nyang karot
Hana patot wahe cutda

Jinoe cutda bah tapuwoe
Tatueng sidroe manusia
Meukon aneuk ureueng meusoe
Han troh keunoe ie laot ba

Si aneuk nyoe that meutuah
Poteu Allah nyang peulara
Han jipubuet buet nyang salah
Waliyullah asoe syeuruga

Bek meudawa da meutuah
Insya Allah han binasa
Putroe tuha han le tuto
Putroe Meulu meunang dawa

Hom hai adoe lon pabanbah
Tapeurintah ban nyang suka
Teutapi ulon peuingat
Saket mangat droeteu rasa

Putroe Meulu deungo meunan
Jicok yoh nyan muda beulia
Jicok laju po samlakoe
Uleh Putroe Meulu rakna

Leugat jiwoe putroe tujuh
Hingga le troh u istana
Troh u rumoh pirak lipat
Jicok leugat meulu ata

Cok ie mawo ka neusiram
Bak badan muda beulia
Deungon keuramat putroe itan
Puleh yoh nyan banta muda

Neubeudoh le cut bangsawan
Putroe intan kalon rupa
Jieu rupa sang meuh seupoh
Seumeuloh ban bintang rusa

Puteh kuneng cahya tuboh
Putroe tujuh ate suka
Bitpi galak napsuji tan
Melee bak Tuhan takot deesya

Putroe marit ngon samlakoe~
Jinoe adoe lon pareksa
Patbu gampong pane nanggroe
Namateu soe he adekda

Soe nan ayah deungan ibu
Peugah teungku ubak cutda
Cut Usman seuot laju
Cutda teungku lon peuhaba

Abu Malek di lon ayah
Nanggroe Makah asai mula
Ka teukeudi nibak Allah
Lon pabanbah ka troh masa

Lon jipeungeut le Yahudi
Ka Allah bri meunoe kada
Jilakee lon ubak umi
Jiba u gle gunong raya

Jiyue jak cok on kayee meuh
Timoh di ateueh gunong raya
Ulon iiba u bineh laot
Jibalot lam kulet guda

Jikeubah lon di bineh pasi
Di Yahudi ka jibungka
Troh geureuda lon jitarek
Jipeuek u gunong raya

Jisangka umpeuen geureuda bisoe
Jipuwoe u gunong raya
'oh ban jieu hana asoe
Geureuda pindoe beungeh raya

Jitiek sinan lom jiboh droe
Teuma dudoe lon keulua
Troh u lua ulon teubiet
Yahudi keumiet di bawahnya

Jiyue cok bak lon nyan on kayee
Lon bet peureudee ulon geulawa
Troh on kayee nibak jaroe
Leugat jiwoe deungon bahtra

Lon han jicok laju jiwoe
Tinggai sidroe lon he cutda
Han jeuet lon tren kareueng meuduroe
Ulon tiek droe u laot raya

Hana lon thee malam uroe
Cutda putroe bukon pura
Peue na adoe tameunapsu
Karonya Po troh ban pinta

Wahe adek Usman Basyah
Ulon peugah adoe bak gata
Haba lon nyoe kon beurakah
Kareuna Allah he adekda

Soe jak keunoe bak teumpat nyoe
Baranggasoe manusia
Mate laju umu sampoe
Neukoh jaroe uleh raja

Lon bri ingat he samlakoe
Gata adoe bek binasa
Cut Usman seuot nyoeban
Yoh masa nyan neupareksa

Peue na sinoe cutda badan
Pakon meunan buet di raja
Teuma seuot putroe bungong
Bek tatanyong asai mula

Meule tuto hana keunong
Keulua nyawong soe peuhaba
Ban neudeungo haba meunan
Seungap yoh nyan han le haba

Ka seungap gong seungap geundrang
Seungap canang han le gubra
Neumeututo cut bangsawan
Marit intan putroe muda

Wahe adek putroe intan
Pakri padan he adekda
Pakri laku cut Usman
Takheun rijang putroe muda

Pat takeubah taeh sajan
Kadang tuan roh bak dina
Nibak hukom that bit hareuem
Meunan geukheun dum ulama

Teumpat tujuh geutanyoe lapan
Toh pakriban tabicara
'oh troh geutren Meurak Asanah
Kadang leumah jieu rupa

Jeuet keu 'aeb deungon keuji
Dan lagi jeuet teumeureuka
Nibak donyapi that salah
Bak Po tallah jeuet keu deesya

Meunyo meunan he cutda droe
Bah sinoe muda beulia
Geutanyoe tajak dalam uteuen
Peurburuan dalam rimba

Wahe adek Usman Basyah
Lon peugah adoe bak gata
Kamoe meujak dalam uteuen
Peurburuan dalam rimba

Tinggai gata adoe di sinoe
Bak teumpat nyoe hukom gata
Kadang meudom kadang meuwoe
Gata adoe bek cre tangga

Insy Allah he da putroe
Beu rijang neuwoe ubak hamba
Lheueh jipeugah ubak adoe
Beudoh putroe jak mumita

Mita peulandok jak lam uteuen
Reuen-mareuen ngon areng rusa
Suntok malam suntok uroe
Lale putroe jak meurusa

Seupot jijak beungoh jiwoe
Sambinoe saweue syeedara
Jipuwoe glueh ngon peulandok
Cut putroe jok keu syeedara

Geunap uroe meunan suntok
Sie peulandök tiep-tiep masa
Ureueng laen hana sidroe
Cit samlakoe muda beulia

Cut Usman nyang seumbeuleh
Putroe areh nyang jak mita
Dalam rimba putroe jieh
Teubiet mureh teuma jaga

'oh lheueh wuduk jiseumbahyang
Putroe riwang bak syeedara
Hingga meunan baranggajan
Cut intan baik seutia

Teukeudi Allah bak siuroe
Marit putroe bak adekda
Wahe adek Usman Basyah
Lon peugah adoe bak gata

Gata adoe **tinggai** sinoe
Lon uroe nyoe **heundak gisa**
Ayah saket adoe **badan**
Lon neupeusan u Antara

Kareuna ayah lon tuha that
Umu **lambat** trep ka lama
Meugoh puleh ayah sidroe
Hana lon woe ubak gata

Tinggal gata adoe sinoe
Dumna kamoe meujak gisa
Nyoepat gunci tujoh pito
He adek po nibak gata

Kama tujoh dum sinaroe
Po samlakoe hukom gata
Tujoh kama tujoh pinto
Bek soe lalo keunan teuka

Taduek gata bak teupat nyoe
Tujoh boh nyoe ri nyang suka
Kama tujoh laen teupat
Pirak lipat beu tajaga

Lon peuingat he samlakoe
Kama nyoe bek tabuka-buka
Bilek tujoh teupat kamoe
Po samlakoe jeuet tabuka

Abeh haba putroe bintang
Jiteureubang u Antara
Putroe jipo miyup manyang
Ban seulayang meugisa-gisa

'oh jan miyup bagoe guroh
'oh jeuh bagoe reubana
Tujoh uroe jiteureubang
Ka troh intan bak ayahda

Cut Usman tinggai sidroe
Miseue bagoe ureueng gila
Ka teupike lam ate droe
Sira neumoe ngon ie mata

Teuma neuiaak tunong baroh
Han saho troh laot lingka
Ka teuingat po samlakoe
Wasiet putroe masa bungka

Kama nyoe saleh peue asoe
Bahle jinoe ulon buka
Neumat gunci nibak jaroe
Samlakoe pinto neubuka

Ban neukalon le u dalam
Laen ragam neuueu rupa
Neueu ulee dum meugantung
Ka neuplueng teubiet u lua

Neutop pinto miseue dilee
Abeh lagee neuueu rupa
Tujoh uroe lheueng nibak nyan
Putroe intan ka troh gisa

'oh troh putroe u meuligoe
Neupioh droe sikutika
Neutanyong le bak samlakoe
Pinto adoe na tabuka

Samlakoe cut seuot meunoe
Tan di kamoe wahe cutda
Putroe neukhem leumah gigoe
Wahe adoe bek meuseunda

Bek tameuson wahe adoe
Ka lon tupeue buet di gata
Ubak kamoe bek takheun tan
Karonya Tuhan abeh nyata

'oh jan lon po lon teureubang
Ka tapandang uleh gata
Samlakoe cut seuot meunoe
Kama nyoe na ulon buka

Lon eu ulee dum meugantung
Ulee ureueng peue dum cutda
Nyankeu ureueng nyang ka dilee
Geukoh ulee uleh raja

Soe soe nyang jak bak teumpat nyoe
Geukoh takue cok keupala
Nam reutoh tujuh ploh nyang ka mate
Raja ube-be hana bela

Peuebu seubab he cutda droe
Cuba kheun proe bak adekda
Bek tatanyong wahe adoe
Jeuet mupaloe akhe masa

Lon takot that he samlakoe
Sayang kamoe that keu gata
Cut Usman ka neuem droe
Hana sapeue le beurkata

Teutap sinan padum uroe
Tuan putroe jak lam rimba
Mita peulandok peurburuan
Hingga meunan rok-rok masa

Teukeudi Allah peurintah Tuhan
Troh peuneusan di Antara
Teuma putroe lom kheun meunoe
He samlakoe tinggai gata

Hajat ulon jak khanduri
Kaoi janji saket bapa
Tinggai gata adoe sinoe
Dumna kamoe heundak gisa

Insya Allah he da putroe
Rijang keunoe bak adekda
Yoh nyan putroe jiteureubang
U manyang lam awan miga

Aneuk gunci tan jipuwoe
Tinggai sinoe nibak banta
Ka telupike po samlakoe
Uroe nyoe pinto lon buka

Pinto keudua goh kulihat
Peue hekeumat di dalamnya
Yoh masa nyan cut samlakoe
Gunci bak jaroe neumat sigra

Cut Usman buka pinto
Neueu a-o ureueng meudawa
Ladom teungoh jimupoh-poh
Ulee reuloh beukah dua

Samlakoe cut ka teukeujot
Teumakot teubiet u lua
Neutop pinto rijang-rijang
Na sijameueng ka woe cutda

Putroe tanyong bak samlakoe
Pinto adoe na tabuka
Cut Usman seuot rijang
Hana di lon wahe cutda

Peue tapeugah wahe adoe
Bek tasom droe nibak cutda
Na lon kalon gata bunoe
Pinto nyoe ka lheuuh tabuka

Putroe jikhem leumah gigoe
Cut samlakoe hana le haba
Padum lawet lheueng nibak nyang
Putroe intan lom beurkata

Wahe adek po samlakoe
Taduek sinoe siat gata
Ulon heundak jak seumbahyang
Pinto rijang le neubuka

Nyoeapat gunci saboh karang
He bintang bak jaroe gata
Tinggai adoe gata sinoe
Kama nyoe bek tabuka-buka

Leupah putroe jak seumbahyang
Pinto rijang le neubuka
Ban neukalon nyan u dalam
Laen macam neueu rupa

Saboh macam ureueng inong
Duek teuceungong bansineuna
Ladom jiduek anggok-anggok
Meuhambo ok di keupala

Ladom jimoe meusok-meusok
Inong kutok bagoe gila
Tadeungo su le that macam
Ladom ragam su biula

Jitop muka jimoe bae
Su meusye-sye hana tara
Yoh na gata he teungku e
Dumpeue makmu han peue mita

Ladom jijak badan teulhon
Le that bangon taeu rupa
Abeh neueu Cut Usman
Lheueh nibak nyan woe neugisa

Neutop pinto rijang-rijang
Na sijameung woe le cutda
Putroe tanyong bak samlakoe
Pinto adoe na tabuka

Neuseuot le cut bangsawan
Di kamoe tan wahe cutda
Bek tameusom adoe badan
Bak lon tuan leumah nyata

Putroe teukhem muka rumeh
Hana beungeh keu adekda
Padum lawet teuma dudoe
Cut putroe jak saweue bunda

Tinggai sinan Cut Usman
Bak teupnat nyan tinggai cutda
Lom jiwasiyet po sambinoe
Pinto nyoe bek tabuka-buka

Leupah putroe jiteureubang
Cut Usman laen kira
Abeh neubuka kama tujuh
Neukalon deuh rupa-rupa

Ban neukalon nyan u dalam
Kitab Quruan le lagoina
Ka neubuka bandum abeh
Bintang peureuseh ka neubaca

Abeh neubaca jeuep-jeuep kitab
Haba 'ajab seulagoina
Eleumee mintra ngon hekuemat
Eleumee peurasat abeh meusra

Eleumee falak ngon peulareh
Ngon peunuleh eleumee angkla
Saboh macam nyang that baik
Jeuet tabalek laen rupa

Tapeujeuet droe macam-macam
Saboh ragam aneuk dara
Nyanpi masok afai tajam
Cut Usman bijaksana

Abeh maklum lua dalam
Ka jeuet neufam banseumua
Abeh neubuka tujuh pinto
Yoh nyan tahe sipeunganja

Lom meuteumeung saboh kitab
Neulop leugat neuu rupa
Deuh neukalon bak saboh bab
That bit 'ajab hana tara

Lam kitab nyan meunoe geukheun
Haba jameun trep ka lama
Saboh putroe di nanggroe Tasek
That ceureudek hana tara

Rupa jroh that wahe adek
Muka baik sang mutiara
Nama nanggroe geukheun tasek
Han jeuet taek dalam Indra

Jroh that rupa hana bagee
Nyankeu putroe nyang that eela
Aneuk mupo cucoe meusoe
Mupat nanggroe mupeue bangsa

Sisyeedara jih tujuh droe
Nama meusoe dum syeedara
Nyankeu putroe gaseh Tuhan
That analan he teungku wa

Lidah teusurat kalimah teebah
Nama Allah nyang mulia
Nibak talak nama pangulee
Ateueh ulee Allahu akba

Dalam kitab that meuteuntee
Meuasek ulee muda beulia
Abeh neukalon awai akhe
Neuteubiet le pantah sigra

Neutop pinto miseue dilee
Nak bek neuthee uleh cutda
Na sijameung Usman pioh
Putroe tujoh troh neugisa

Putroe neukheun bak Usman
Adoe badan deungo hamba
Allah Allah he adoe beh
Pinto tujoh abeh tabuka

Peue na taeu he adoe cut
Cuba seubot lon deungo nyata
Cut Usman peugah rijang
Ban neukalon neupeuhaba

Ban nyang neuu dum neupeugah
Hana salah bube seuma
He cutda po cutda badan
Bahle kaman lon calitra

Kama nyang phon ulee meugantung
Han tom meuteumeung dilee nyang ka
Peugah cutda rijang jinoo
Bak lon sidroe neucalitra

He adek cut bungong puteh
Lon kheun abeh ubak gata
Ulee meugantung wahe adoe
Ureueng lakoe keunoe teuka

Geumeung hajat keu cut putroe
Jeuep-jeuep nanggroo jajak mita
'oh troh keunoe he samlakoe
Umu sampoe mate fana

Meunan suroh raja nanggroo
Yue koh takue soe nyang teuka
Seubab sinoe teupat putroe
Tren jak manoe di Antara

Samlakoe cut deungo meunan
Tanyong yoh nyan lom bak cutda
Wahe cutda deungo kamoe
Siri putroe keunoe teuka

Bek tatanyong he samlakoe
Seungap adoe iem tasaba
Soe nyang kheun-kheun nama putroe
Geukoh takue geusie jungka

Cut Usman ka neuie droe
Hana sapeue le beurkata
Lom neutanyong po samlakoe
Bak putroe nyang indah rupa

Kama dua cutda badan
Banda sinan luah raya
Lon eu geudong peunoh asoe
Hana sidroe manusia

Nyang na sinan sidroe syiah
Asee saboh bulee hana
Teuma syiah tanyong bak lon
He nyak bungong peue tamita

Teuma lon kheun wahe teungku
Sinoe lon eu han tom nyang ka
Lom lon tanyong ubak syiah
Peue buet dasyah sinoe gata

Wahe aneuk Usman Basyah
Ulon peugah aneuk bak gata
Ulon sinoe suroh Tuhan
Trep ka jameun lama masa

Hamba Allah dum sinaroe
Barangasoe dalam donya
Areuta Tuhan le that jitroh
Jingui jipajoh jeuep kutika

Han jitem bri keu hamba Allah
Meuseudeukahpi han tom na
Jakeuet areutapi han tom jibri
Miseukin faki hana jikira

Adat jimeugoe jeuep-jeuep gampong
Pade lam krong dum jibawa
Jakeuet han jiboh aneuk bajeueng
Jitakot kureueng abeh areuta

Han jitupeue gadoh beureukat
Uroe akhirat keunong syeksa
Baranggasoe han bri jakeuet
Tuhan yue kuet ubak hamba

Adat jikuet di jih sinaleh
Di lon abeh kukueta lhee gunca
Jeuep-jeuep gampong jeuep-jeuep nanggroe
Tuhan sidroe yue jak hamba

Keubeue lumo ngon bubiri
Kameng gasi kibah unta
Jeuep-jeuep teupat dum lon peutoe
Jeuep-jeuep nanggroe lon peuteuka

Ureungmeukat duek di peukan
Beurjualan maniaga
Di jih jipubloe ija sipinggang
Di lon kureupang limong nam ila

Sinoe meutamom dum lon keubah
Suroh Allah nibak hamba
Uroe akhirat pulang keudroe
Ikat bak takue meuhue hila

Sidroe-droe jih raya ban gle
Hana mise brat lagoina
Jeh pat taeu dalam peutoe
Meuribee kudoe meureutoh banggla

Hitam puteh dum sinaroe
Le that bagoe kunengpi na
Abeh habasyiah seubot
Pinto neutop teubiet sigra

Tuan putroe seuot rijang
Sabet meunan he adekda
Hana peue le ulon peugah
Ka lheueh syiah neuboh makna

Meutuah that bintang timu
Tatameung eu syiah lam rimba
Kamoe laen han deuk meueu
Goh Tuhanku lom neurela

Teuma putroe lom teumanyong
He cut bungong kheun lom haba
Kama nyang lhee peue na leumah
Cuba peugah adoe raja

Bilek nyang lhee he cutda droe
Ulah bagoe ureueng gila
Jimuplueng-plueng dalam padang
Uroe malam hana reuda

Apui peucrok nyan di likot
Jiplueng jigrop hana tara
Apui di likot na bube ok
Kawak-kawok ureueng dumna

Nyan peue cutda cuba peugah
Taisyarah taboh makna
Nyankeu adoe dumna ureueng
Seudeukah jitueng eleumee hana

Kama nyang peuet cutda teungku
Lon eu laku le that rupa
Ureueng binoe dum di dalam
Le that macam wahe cutda

Ladom-ladom jipluek kulet
That bit jeuheut lon eu rupa
Ladom teungoh jimoe bae
Tadeungo sye ngon suara

Putroe peugah teuma laju
Adoe teungku lon peuhaba
Nyang mubae tumpang ulee
Hana malee yoh lam donya

Nyang pluek kulet nibak badan
Aneuk jalang biduen nama
Nyang keulimong jimupoh-poh
Darah tijoh dum bak muka

Nyankeu ureueng he adoe jro
Jimeuseunoh areuta bapa
Rupa anjeng deungon babi
Jimeuungki ibu bapa

Nyang keutujoh kama sineuleueh
Pangkat ateueh he bentara
Ka takalon kitab Quruan
Nyankeu ensa nyang sibeuna

Nyankeu ureueng waliyullah
Meunan peuneugah dum ulama
Nyang saboh treuk goh lon seubat
Jinoe po cut woe bak bunda

Jinoe putroe woe bak ayah
Lom neukeuba muda beulia
Cut Usman tinggai sidroe
Hana bagoe sosah raya

Neujak keudeh neujak keunoe
Muwoe-woe meugisa-gisa
Ka meuteumeung saboh simpang
Neu jalan raueh hana

Teuma leumah saboh bagoe
Pinto kuaroe sangat raya
Neucok gunci mat di jaroe
Samlakoe pinto neubuka

Teuhah pinto peungeuh bandrang
Ka neupandang neupeunyata
Teuma neuk troh u manyang
Neueu padang luah raya

Naleueng komkoma dum meuato
Yoh nyan tahe sipeunganja
Kayee sibak di teungoh padang
Bakpi manyang hana tara

Usman jak bacut-bacut
Sang Teumakot ureueng hana
Neungieng u timu ngon u barat
Hana sapat leumah rupa

Hana ureuengpi meusidroe
Seungap bunyoe safan-safa
Troh yup kayee sinan neudong
Neupandang ban siseun lingka

Neueu kulam jroh meuturab
Keubit jroh that he syeedara
Ban geularek timang ruweueng
Got that keunong laku rupa

Batee peulinggam dum meuato
Ka tahe muda beulia
Geutatah ngon zamrut intan
Bineh kulam dum mubanja

Neueu keurusi di bineh kulam
Gaki lapan meuh suasa
Bak sinteue ok batee intan
Bak sadeue badan meurudiwangga

Bak tiek jaroe meuh peulangi
Bak tiek kaki akek meutia
Ka neupeurab bak **bale** nyan
Leumah neukalon loh mubanja

Neueu haba dalam surat
Meuhad-meuhad geupeuhaba
Nyoekeu teupat Meurak Asanah
Neukalon sah dalam dafta

Meunan teusurat dalam kitab
Ka neulihat dilee nyang ka
Neueu kayee bakji pirak
Karonya hak Po Nyang Esa

Jipot angen leungo pucak
Su meusigak **sang** biula
Angen **jipot ngon** peurlahan
Puleh **badar** meuk **beulia**

Na **sikeujap neudong** sinan
Leumah neukalon saboh rupa
Sang seurune bangsi geundrang
Meukrang-krang suara geunta

Cut Usman neumeusilee
Bak batee neumeuseunia
Na sikeujap neupioh droe
Troh sampoe bak kayee raya

Neueu cicem that mubalak
Jroh meusigak ngon suara
Na tujoh boh nyang leumah that
Rupa hebat hana ngon sa

Bulee puteh dum meusurat
Rupa got that sang mutiara
Jimeusyae jimeunyanyoe
Miseue bagoe su biula

Jimeupo-po jimeulikak
Di cong bak kayee suasa
Tadeungo su jroh that ragam
Cut Usman ka teurhanta

Ban ureueng beuet nyang that kari
Hana sakri mangat rasa
Jimeuucap pujoe Rabbi
Cicem 'ali that takwa

Di putroepe jimeudike
Pujoe Rabbi Tuhan Esa
Teuma jitren dum u bumoe
Jak manoe bak kulam tahta

Cicem jitren seun-seun siploh
U baroh jimeuseunia
Abeh jitren dum nyang laen
Dudoe jitren putroe muda

Putroe nyang nam troh u baroh
Jipioh bak bale rakna
Meurak Asanah tren di likot
Putroe tulet jroh that rupa

Watee jitren Meurak Asanah
Deungo lon peugah he syeedara
Putroe jidong ateueh batee
Rab ngon ulee muda beulia

'oh neukalon bak jilinggang
Mata mandang po jroh rupa
Neueu jihak linta-linto
Ulee baho ban leuek kua

'oh jilingiek bagoe mambang
Let-lot subang blet-blot mata
Ban jimeusu si nyak putroe
Samlakoe ka pungo gila

MILIK KEPUSTAKAAN
DIREKTORAT TRADISI
DITJEN NBSF DEPBUDPAR

'oh takalon ubak sifeuet
Sang teusireut iman lam dada
Muka puteh ban buleuen trang
Badan jeunjang sang geupua

Aneuk jaroe ban geurawot
Ban aneuk lot lheueh geujangka
Babah han luah 'oh seudang jroh
Miengji peunoh muka bunta

Beeji harom ban kasturi
Budiadari rab sabe sa
Rupapi jroh han peue tanyong
Aneuk inong raja raya

Soe nyang pandang putroe bungong
Sabet nyawong sang keulua
Putroe jitren dalam kulam
Ie neuguncang ban reubana

Ucap seulaweuet lagee nalam
Jroh that lagam ngon biula
Cut Usman rindu deundam
Sang-sang karam han le nyawa

Ulee leungo badan deumam
Rasa ka lham u yup donya
'oh neupandang ubak badan
Hu sang intan meukeumala

Samlakoe cut sang ka mate
Teuot gaki yo sang geumpa
'oh sare lheueh putroe manoe
Ban sinaroe teungoh sigra

Peukeumah droe hajat riwang
Jiteureubang bandum rata
Tadeungo su sang seulayang
Meutang-kumang dalam hawa

'oh han deuh le Usman pandang
Sret le mubram ngon ie mata
Samlakoe cut ka neupoh droe
Meuteutaloe ngon ie mata

Neumoe bae hana bagoe
Samlakoe ka pungo gila
He putroe cut gata tawoe
Pajan keunoe lom tateuka

Beukah bajee nibak badan
Yoh nyan pangsang po jroh rupa
Sare puleh nibak pangsang
Neuwoe rijang u istana

Ban sare troh ubak teumpat
Cutda peurab bak adekda
Tuan putroepe ka neuwoe
Beudoh adoe peumulia

Com di teuot seumbah gaki
Moe meu'i-i banta muda
Putroe tanyong pakon tamoe
Han tom meunoe dilee nyang ka

Peuekeu seubab nyang jeuet meunoe
He samlakoe peugah bak da
Peugah bak lon he adek e
Han tom lon eu meunoe nyang ka

Han jiseuot po samlakoe
Dawok jimoe ro ie mata
Putroe tujohpi ka jimoe
Banlapan droe jimoe rugha

II. MEUKAWEN NGON PUTROE MEURAK ASANAH

Cut Usman jimoe bae
Ie mata ro limpah dada
Lom neutanyong tuan putroe
Pakon adoe hana haba

Jiseuot le po samlakoe
Jikheun meunoe ubak cutda
He cutda po e da badan
Raya han ban napsu lon cutda

Meuhan ek troh da boh ate
Gotkeu bahle hilang nyawa
Nibak udep bahle mate
Hankeu na le le peue kira

Meunyo mantong nyawong lam badan
Meuribee ban napsu teuka
Han ek lon boh hawa napsu
Cutda teungku bukon seunda

Padum jipeungeut le Yahudi
Jiboh u gle gunung raya
Padum nyang sret dalam laot
Angen bapot troh bak cutda

Wahe untong badan nyang malang
Tinggai mawang lon ka jiba
Lon nyoe untong han meusampe
Laot ngon gle ka lon rasa

Nyoepe ka lom rindu ate
Gotkeu cahle hilang nyawa
Jinoe cutda ulon peugah
Kon beurakah ngon peurbula

Neubri keu lon Meurak Asanah
Taseuleuah uleh gata
Meuna gaseh deungon sayang
Tapeujampang keu lon cutda

Bu meusampe tapeutimang
Mangat seunang bak agam
Supaya lon han le sosah
Ate dasyah judo ka na

Teuma seuot tuan putroe
Allah he adoe bek meuhawa
Keu putroe nyan bek meuteuoh
Akhe teuboh hana guna

Bek meunapsu he adek jroh
Meuhat geupoh uleh raja
Sireutoh tujoh ploah nyang ka mate
Raja ube-be hana soe bila

Bek deungon nyan he boh ate
Laen lagi lon jak mita
Ban jideungo haba meunan
Jikheun yoh nyan ubak cutda

Meunyo meunan da meutuah
Bahle sudah nyawong hamba
Jinoe kugrop dalam laot
Bahle eungkot meukeurija

Ka neubeudoh bak beuradu
Putroe Meulu drop le sigra
Ka jidrop nibak pinggang
Meutang-ilang meuhue-hila

Bek he adoe taboh iman
Meuputroe nyan lon usaha
Meuna nyawong dalam badan
Putroe intan tateumeung ba

Jinoe adek got tapioh
Lon meutanggoh siklep mata
Wahe adek Usman Basyah
Lon peugah adoe bak gata

**Meunyo hajat keu cut putroe
Takheun jinoe lon deungo nyata
Meunyo meuthee wahe adoe
Bandum kamoe hilang nyawa**

**Nyankeu putroe nyang that meugah
Haliman Syah nama bapa
Nanggroe tasek keurajeuen luah
Aneuk tujoh lakoe goh na**

**Bantujoh droe goh na lakoe
Nyankeu putroe nyang that eela
Nyang leubeh jroh Meurak Asanah
That meutuah putroe muda**

**Jinoe adoe ulon peugah
Ngon tailah taboh daya
Takueh adek umpung tikoh
Beu teumboh jalan u lua**

**Takueh tanoh di yup batee
Bek jithee le putroe muda
Jinoe adoe peugot teupat
Bek meukarat watee teuka**

**Meuka ase keumah teupat
Taboh bakat bek jithee na
'oh ban jitren dalam kulam
Peugot macam taboh mintra**

**Tacok bajee putroe intan
Baplueng rijang dalam rimba
Bek roh tacok bajee laen
Puteh lisen hana guna**

**Bajee Putroe Meurak Asanah
Surat kalimah banja dada
Nyankeu putroe gaseh Tuhan
Jibeuet Quruan han soe aja**

Eleumee mintra abeh maklum
Abeh jitudum urat donya
Seugala eleumee lam donya nyoe
Nibak putroe mudah saja

Gata adekpi that 'ali
Tacuba ci sigo dua
Cuba sigo adu sakti
Ngon si nyak ti putroe muda

Meunyo ceureudek gata adoe
Tuan putroe tateumeung ba
Jihpi rancak gatapi areh
Ngon cut puteh timang padra

Abeh haba tuan putroe
Ngon samlakoe banta muda
Ka neucok lham mat u jaroe
Cut putroe pinto neubuka

Putroe nyang nam jak di likot
Meuikot-ikot adoe ngon a
Putroe tujoh dum jak sajan
Jak peugah ban buet som punca

Jak peurunoe peugot teumpat
Mangat cakap rot keulua
'oh lheueh putroe jak peugah kri
Woe keumbali u istana

Cut Usman jikueh uruek
Teumpat duek reuhung u lua
Ase teumpat teuma neuwoe
Singoh uroe lom neuteuca

Geunap uroe neujak saweue
Barangapeue tan neukira
Troh ubak had putroe manoe
Samlakoe deungo suara

Neudeungo su miseue canang
Meukrang-krang suara geunta
Samlakoe cut ulee mumang
Tanyong rijang ubak cutda

Peue suara miseue gambang
Han tom meunan dilee nyang ka
Teuma seuot cut sambinoe
Nyankeu putroe he adekda

Putroe tujoh ieh ka jitren
Puteh licen jak lap sgra
Usman deungo haba meunan
Neutren yoh nyan di istana

Neuplueng laju that bit bagah
Pujoe Allah Po nyang Esa
Teuma putroe beuet Quruan
Suara ban gambang Jawa

Lheueh seulaweuet muzakarah
Jitren leupah bandum rata
Cut putroe dong ateueh batee
Rab ngon ulee muda beulia

Ban neukalon le samlakoe
Meugrak jaroe neukeumeung wa
Ka teuingat dalam ate
Teupike di dalam dada

Meunyo kudrop putroe sinoe
'aeb bunyoe keuji nama
Bak donya nyoe **lonpi** salah
Bak Po tallah meuteumeung deesya

Teuma neukheun laju pantah
Astagfirullah le neukata
Cut Usman ka neuie droe
Tuan putroe keubah ija

**Keubah bajee maseng-maseng
Meusalen ngon ija sutra
Tuan Putroe Meurak Asanah
Ija neukeubah bak sot nyang ka**

**Sang han mangat dalam ate
Ka jicok le lhøueh nyan teuma
Jijak sak lam lungkiek batee
Ateueh ulee banta muda**

**Sit ka janji masa dilee
Bak pangulee Nabi kita
Langkah redeuki peutumuen mawot
Bak halarat Tuhan Esa**

**Beuthat tapo dalam awan
Dudoe keunan cit meugisa
Beuthat budok deungon seupak
Meuka roh hak han meutuka**

**Meurak Asanah-teukeudi Allah
Usman Basyah po judonya
Roh jikeubah ija bajee
Di binch batee sayang raya**

**Adat jiketubah bak sot dilee
Han jiteumee muda beulia
Teuma putroe tren jak manoe
Usman jinoe laen kira**

**Laloe putroe jikasyuk ie
Ka gop peusie bajee ija
Jikasyuk ie lagee tujoh
Ka jimeuroh ban reubana**

**Lom jikasyuk lagee limong
Jipeukeunong lagee tiga
Lom jibalek lagee lapan
Jiguncang lagee biula**

Lheueh cok bajee po samlakoe
Baplueng jinoe dalam rimba
Sira neuplueng lambong hekeumat
Bak halarat lakee do'a

Ya Ilahi wa ya Rabbi
Po lon neubri ban lon pinta
Beu jeuet eungkot dalam kulam
Saboh kawan aneuk kadra

Uleeji meuh mata intan
Sisekji ban keumbang deurama
Lheueh beuet do'a rahop jaroe
Po samlakoe neujak lanja

Jeuet le eungkot saboh kawan
Dalam kulam jilila-lila
Putroe kalon eungkot meukawan
Hai da badan pane kadra

Jroh that rupa hana bagoe
He da putroe tatheun ija
Yoh nyan putroe areng eungkot
Ka jigrop leupah u lua

Putroe let lom ka jipagap
Sareng jimat lhee krak ija
Jipeuseunom jipubeudoh
'oh jiploh hana le kadra

Teuma putroe jikheun meunoe
Da teungku droe peue bicara
Sang kulam nyoe mata u laot
Jitamong eungkot aneuk kadra

Putroe kiroh dalam kulam
Eungkot intan han ek daya
Jilet keunoe jilet keudeh
Putroe areh kiroh raya

Jipeuseunom jipubeudoh
'oh jiploh hana le kadra
Lale putroe sareng eungkot
Samlakoe cut lon calitra

Cut Usman neuplueng leugat
Troh u teupnat bak cutda
Troh u rumoh po samlakoe
Jikheun meunoe putroe muda

Putroe jikheun teuma meunoe
He samlakoe minah gata
Minah leugat po samlakoe
Tajak som droe dalam rimba

Bek taduek le adoe sinoe
'oh troh putroe bek na gata
Samlakoe cut jak lam uteuen
Neujak meusom dalam rimba

Ate seunang hana bagoe
Po samlakoe troh ban pinta
Teuduek haba dilee 'oh noe
Putroe manoe lon calitra

Tuan putroe 'oh lheueh manoe
Bantujoh droe lheueh meuupa
Putroe teungoh dum u darat
Bak teupnat jikeubah ija

Lheueh meusalen bajee jisok
Soe eu mabok pungo gila
Teuma nyang nam lheueh meusalen
Puteh licen ate suka

Tuan Putroe Meurak Asanah
Teungoh pantah jak cok ija
Lheueh meuupa putroe analan
Beursamaan deungon cutda

'oh ban jieu ija han le
Ka gop taki putroe muda
He cutda cutda meutuah.
Na tapinah sinoe ija

He adek cut Meurak Asanah
Tan lon pinah ija gata
Bek he cutda tameuayang
Meunoe pulang bajee ija

Hana kucok dikee adoe
Beu reuloh jaroe beu buta mata
Abeh neutanyong dum neusudi
Cut putroe ti neuro ie mata

Wahe Allah Poku Rabbi
Ulun pakri han le ija
Pane ureueng teuka keunoe
Bajee kamoe ho leupah ka

Wahe Allah Po lon sidroe
Tinggai kamoe neuwoe cutda
Wahe untong badan malang
Jinoe karam lon lam rimba

Pakri jinoe da boh ate
Tinggai lam gle lon adekda
Meurak Asanah dawok bae
Ie mata ro limpah dada

Ija burak bulee kumbang
Lang-geumilang cahya uroe
Leupah cutda jinoe rivang
Lon meulang-lang tinggai sidroe

Cutda nam droe leupah gisa
Lon adekda bah gop publoe
Mangat ate gata bannam
Tinggai laman lam rimba nyoe

Ulon sidroe hana tuah
Gop reupah bajee di asoe
Allah Allah wahe cutda
Ka troh masa lon uroe nyoe

Saleh mate lon lam rimba
Saleh gop ba jeuep-jeuep nanggroe
Wahe cutda bungong pade
That meusampe lon jak manoe

Wahe Allah Poku Rabbi
Bajee han le pakri lon woe
Saleh pakri 'oh' woe cutda
Dalam rimba tinggai sidroe

Kadang udep saleh mata
Cutda dan le tinggai adoe
Tabri keu lon bajee ija
Lon top dada sijuek tuloe

Peukeu lon bri he syeedara
Hana ija 'oh sep keudroe
Taploh po cut ok bak ulee
Tatop dilee teuntang dada

Teuma putroe ploh sipangkee
Jilipat lhee palet sigra
Putroe nam droe sosah han ban
He intan Meurak Diwangga

Udek tajak dum geutanyoe
Ubak Putroe Meulu Cina
Kareuna jih kawai geutanyoe
Trep ka sinoe jiduek lama

Pane ureueng keunoe jalan
Rotpi tan laot lingka
Meuhan luloh bak putroe nyan
Toh rot jalan manusia

Cuba tanyong ubak putroe
Di geutanyoe pat tamita
Teuma jijak putroe tujoh
Hingga troh u lam istana

'oh meuteumeung sabe putroe
Mumat jaroe geumuwa-wa
Teuma lheueh nyan wahe adoe
Marit Putroe Meulu Cina

Nateu keunoe wahe adoe
Nabu kamoe wahe cutda
Putroe Meulu tanyong meunoe
He adoe peue tajak mita

Nyang ka han tom tajak keunoe
Lheueh tamanoe leugat gisa
Peue na hajat tajak keunoe
He sambinoe han tom nyang ka

Daraman Ali seuot pantah
Meurak Asanah han le ija
Ija bajee ka gop rampah
Bak jikeubah han meuho ka

Gaseh sayang he da bungong
Cuba tanyong tapareksa
Ban jideungo putroe peugah
Ile bobah ngon ie mata

Allah Allah he putroe jroh
Pakon taboh bajee ija
Salang na lon dumnoe bagoe
'oh tan kamoe gata jiba

Hana ureueng po cut sinoe
Tan meusidroeu manusia
Seulama lon duek di sinoe
Ureueng lakoe han tom teuka

Phon jameun kon troh 'an jinoo
Han tom keunoe agam teuka
Bek antara ureueng lakoe
Ureueng binoo han sapat na

Meunyo meunan he cutda droe
Cuba jinoo tausaha
Gata cutda ureueng 'ali
Tacuba ci siat mita

'oh meuteumeung he cutda beh
Bah lon teuboh yum sibara
Meurak Asanah tinggai sinoo
Dumna kamoo meujak gisa

Lon jak peugot bajee laen
Puteh lisen bah bak gata
Han trep keunoe kamoo riwang
Meurah Asanah sajan gata

Meurak Asanah deungo meunan
Ile curam ngon ie mata
Meurak Asanah yoh nyan jimoo
Hana bagoe sosah raya

He cutda bek tinggai kamoo
Tapuwoe da sajan gata
Tamat ulon bacut sapo
Tabapo ban siseun lingka

Tabri lon mat bak seunanggoi
Bak cumboi akek meutia
Meunyo tinggai uoon sinoo
Teulah dudoe bandum gata

Bek that sosah gata adoe
Han trep keunoe troh bak gata
Hana soe poh han soe pake
Bungong pade bek le rugha

Putroe nam droe jikeumeung jak
Putroe Meurak jimeoe rugha
Putroe Meurak ka jibae
Tadeungo sye sang biula

Bukon paleh badan lon nyoe
Tinggai sidroe neuwoe cutda
Bukon sayang lon eu uroe
Reudok tampoe padam cahya

Cutda bannam jinoe neuwoe
Tinggai adoe han soe kira
Bukon sayang bungong situngkoi
Lam seunangoi ulee ceumara

Baraggadum lon meukaoi
Han meukabui adoe raja
Bukon sayang bungong seurunoe
Ayeuem jaroe maenan mata

Meunyo tinggai bintang cot uroe
Bannam kamoe hana guna
Wahe adek Meurak Asanah
Adeo meutuah tinggai gata

Allah he cutda bungong sukon
Bah tinggai lon tawoe gata
Ulon sidroe han tasayang
Bah meuiang-lang dalam rimba

Taboh ulon han tapuwoe
Gata nam droe jak tagisa
Jimeucom-com jimeumoe-moe
Bantujoh droe jimeoe rugha

Putroe nam droe yoh nyan riwang
Jiteureubang u Antara
Jipo laju dalam awan
Sampoe yoh nyan nanggroe Indra

'oh troh jiwoe dum u nanggroe
Tuan putroe sosah raya
Pakri jinoo dum geutanyoe
Pakri adoe tapeuhaba

'oh neutanyong uleh ayah
Meurak Asanah ho leupah ka
Putroe tuha teuma seuot
Ban nyang patot tapeuhaba

Beudoh bannam jijak leugat
Jipeuteupat bak ayahda
Meugeureulap mata subang
Deuh mubayang putroe gisa

Dumna namiet jiplueng rijang
Jak eu bintang ka troh gisa
'oh troh namiet keunan datang
Jieu hiram masam muka

Pakon po cut muka masam
Laen ragam lon eu rupa
Bek katanyong kaïem di kah
Na peue sosah kamoe dmuna

Teuma namiet jiplueng rijang
Leugat riwang u istana
Troh u rumoh ka jipeugah
Jikisah bak putroe tuha

Wahe pot cut bukon rugoe
Tuan putroe hana gisa
Putroe tujuh nam ka neuwoe
Nyang adoe lon kalon hana

Nyang hana woe Meurak Asanah
Hana leumah lon eu rupa
Meunyo han le Meurak Asanah
Bahle sudah nyawong hamba

Putroe deungo namiet peugah
Sare jojah ngon ie mata
Teuma meuthee bak sulotan
Tanyong rijang bak aneukda

Wahe aneuk putroe indah
Meurak Asanah hoka taba
Hoka adoe pat takeubah
Pakon pantah tawoe gata

Hana taweueh ngon tasayang
Adat binatang na cit guna
Aneuk hana jibri tacok
Geutanyoe jipok 'oh meusua

Nyoe di gata he sambinoe
Tabri adoe gop hue hila
Soe soe saleh jimeukawen
Nanggroe laen meuhad jiba

Raja neumoe hana bagoe
Maneu putroe pungo gila
Putroe nam droe teuma seuot
Jaroe jibet pantah sigra

Ampon ayah payong nanggroe
Adek putroe hana soe ba
Abeh wasiet dumna kamoe
Nibak Putroe Meulu Cina

Ka teukeudi nibak Allah
Ka gop reupah bajee ija
Jicok ija deungon bajee
Hana soe thee he ayahda

Lale kamoe teungoh manoe
Han lon tusoe curi ija
Jinoe tuanku pakri nyang jroh
Patot neupoh kamoe dumna

Jaroe gaki lon neupuntong
Patot neusurung dalam singkla
'oh tan adoe lon di gampong
Deelat ampon got bu fana

Kamoe tujuh po junjongan
Sidroe ka tan pakri daya
Raja seuot teuma meunoe
He sambinoe bijeh mata

Ka teukeudi nibak Allah
Lon pabanbah ka troh masa
Jinoe aneuk bek le tatren
Puteh liden bandum gata

Meunyo tatren **he** sambinoe
Meuhad paloe **adoe** ngon a
Nyang ka **tinggai bah** le meunan
Dudoe kaman tabicara

Kadang-kadang troh jiriwang
Buet di Tuhan han troh duga
Bek ingat le nyang ka sideh
Bungong puteh iem tasaba

Teuduek haba raja nanggroe
Tuan putroe lon calitra
Tuan Putroe Meurak Asanah
Usman Basyah sajan seureuta

Putroe Meulu marit pantah
Haba neusah deungon cutda
Pakri laku Cut Usman
Dalam uteuen sidroe saja

Han jeuet jiwoe u meuligoe
Toh pakri proe tabicara
Takot cutda jikap le rimueng
Kareuna sidroe dalam rimba

Cut Usman bak neumeusom
Meunoe neukheun banta muda
Ya Ilahi wa ya Rabbi
Po lon neubri ban lon pinta

Neubri seupot uroe rijang
Deungon ujeuen neubri sigra
Teuma seupot le ngon uroe
Tuhan Sidroe nyang karonya

Kalampi sret nibak babah
Ujeuen bobah bade raya
Jipot angen teuka ribot
Malam seupot glap-gulita

Ujeuen bobah hana sakri
Miseue geuple ie lam tima
Cut Usman yoh nyan neuwoe
Ubak putroe u istana

'oh sare troh u meuligoe
Hana sapeue bak angeeta
Neubalek rupa kon ban puroe
Miseue bagoe aneuk dara

Neumoe bae tumbok badan
Lam seupot klam yup seulasa
Menoe neukheun nibak babah
Allah Allah ya Rabbana

Wahé judo uleebalang
Lon sang irang dalam rimba
Paleh tuboh lon ka malang
Bukon sayang sidroe saja

Wahé Allah ho troh kamoe
Lam rimba nyoe seupot buta
Wahé teungku bungong pade
Gata mate lon lam rimba

Gata tinggai dalam laot
Saleh mawot saleh hana
Bukon sayang cut bintang sret
Silap lupot ka binasa

Bahtra karam hanco bichah
Angen bagah barat daya
Gata mate dalam laot
Lon jibapot dalam rimba

Meunan neukheun cut samlakoe
Teuduek sidroe $\gamma\dot{u}p$ seulasa
Tuan putroe di meuligoe
Teungoh muproe bajee ija

Neudeungo su ureueng inong
Ka neutanyong pane gata
Soe meututo dalam seupot
Ka jiseuot pantah sigra

Jiseuot le teuma meunoe
Ulonteu nyoe baro teuka
Dalam laot ulon karam
Jihantam le angen raya

Ureueng lakoe abeh mate
Han sidroe le lon eu rupa
Putroe Meulu jitren pantah
Haba jisah bak adekda

Deungon ija nibak jaroe
Jok keu adoe banta muda
Wahe adek po samlakoe
Nyoe geulantoe laen ija

Tangui beu jroh wahe adoe
Miseue bagoe aneuk dara
Lheueh jok ija tuan putroe
Jiek jinoe u istana

Meurak Asanah hana jithee
Keunong tipee putroe muda
Teuma marit Putroe Meulu
Adoe teungku bek that subra

Nyang ka hilang bek le tasyen
Nakeu laen judo gata
Taek laju he nyak keunoe
Bek sidroe lam seupot buta

Han tatupeue bak pulo nyoe
Le that sinoe jen ngon waba
Bek le taduek dalam seupot
Burang laot seutot gata

Ban jideungo haba meunan
Cut Usman neuek sigra
Neueu ureueng tan mubayeuen
Aneuk rinyeun neulheueng dua

Ban neukalon u seuramoe
Neueu putroe duek mubanja
Meurak Asanah ateueh kaso
Dara baro jroh that rupa

Samlakoe cut yoh nyan tahe
Tan teupeuro aneuk mata
Neuek laju bungong riwat
Troh bak rambat neuduek sigra

Duek bak teumpat pinto rambat
Putroe lihat kalon rupa
Putroe Meulu marit pantah
Tamong leupah keunoe sigra

Teuma tamong cut samlakoe
Mumat jaroe bandum rata
Lheueh mumat jaroe neujok bungkoh
Duek meusimpoh sabe dara

'oh sare lheuëh pajoh ranup
Marit po cut Meurak muda
Meurak Asanah le teumanyong
Bak cut bungong baro teuka

Patbu gampong he cutda droe
Di gata soe du boh nama
Ampon po cut payong nanggroë
Ulonteu nyoe qagang hina

Nanggroë Makah nyang seureuloe
Jak ngon lakoe maniaga
Beurdagangan keudeh keunoe
Jak bloe publoe beurniaga

Lon meulayeue dalam laot
Tunggang ngon bot sama-sama
Ureueng sireutoh dalam kapai
Sampoe ajai abeh fana

Hana sidroe nyang na tinggai
Riyueuk sakai hanco bahtra
Jitren bade barat laot
Lon jibapot troh bak gata

Wahe putroe cut bintang sret
Aneuk tulet raja raya
Neumeuniet lon hamba neubloe
He putroe khadam gata

Han le lon jak keudeh keunoe
Bahle sinoe lon keurija
Lon taguen bu peuek kayee
Lon peulagee ban buet gata

Ma lonpi tan du lon han le
Lakoe mate riyueuk timpa
Sajan gata han lon weh le
Buu meusampe tapeulara

Phon jinoo kon troh 'an page
Cut boh ate lon usaha
Lon duek sajan bungong pade
Udep mate tapeulara

Bek neubri jak le ho laen .
Bungong maken sajan gata
Meurak Asanah deungo meunān
Han rauban-ban enseueh teuka

Weueh that ate putoe intan
Sebab jikheun meunan haba
Putroe neumoe hana bagoe
Ingat keudroe ureueng teuka

Wahe cutda bek kheun meunan
Lonpi saban deungon gata
Ulonpi that ate sosah
Ka gop reupah bajee ija

Lon he cutda kon nanggroee nyoe
Gampong kamoe di Antara
Bak siuroe lon jak manoe
Tujoh kamoe sisyeedara

Lale kamoe meukasyuk ie
Ka gop peusie bajee ija
Na takalon da meutuah
Cuba peugah bak adekda

Soe nyang dapat ek seuleuah
Lon bri upah silaksa dina
Meuhan geutyeung lon bri seuneuboh
Nyawong tuboh geupeuhamba

Teuma seuot puteh leusoh
He po cut beh lon ban teuka
Ulon tuanpi troh malam
Lam seupot klam meuraba-raba

Han lon turi puteh hitam
Lheueh bak karam riyeuek timpa
Seungap putroe han le kalam
Jula malam meuseunia

Putroe lapan lam keuleumbu
Beuradu lam tiree rawa
Sikureueng droe nyang ureueng binoe
Nyang sidroe tinggai di lua

Ureueng karam laen teumpat
Di rambat cut neuleueng tika
Meurak Asanah puteh lumat
Kheun amanat ubak cutda

Wahe cutda Putroe Meulu
Keunoe beuradu jamee teuka
Bek di lua ureueng karam
Keunoe sajan taeh tiga

Taeh sapat lhee geutanyoe
Meuhei keunoe wahe cutda
Bahle keunoe lam keuleumbu
Cutda teungku bek di lua

Putroe Meulu seuot rijang
Bek he intan taeh sama
Bek meusapat wahe adoe
Bahle sidroe eh di gata

Han jeuet meunan da boh ate
Bak lon pike that bit hina
Cuba ingat he cutda droe
Adat geutanyoe pakri rasa

Meusampe that ureueng meudagang
Pihak tan wang han soe kira
'oh lon ingat ate leukang
Han soe sayang tan syeedara

Lonpi cutda that teuingat
Na bala cit troh bak gata
Han tadeungo cutda badan
Peureuman Tuhan Jebrai ba

Soe peuhina hamba Tuhan
Akhe teuman lam nuraka
Dalam danya jih that mangat
Uroe akhirat keunong syeksa

Soe nyang gaseh ureueng faki
Tuhan neubri le that fahla
Sidroe ureueng da meutuah
Deungo lon peugah da bak gata

Lon kalon lam kitab usui
Haba makruh lahe nyata
Soe peuhina hamba faki
Po tallah bri keunong bala

Jih geupeudeuk dalam jahnam
Uroe malam moe meu'a-a
Phon jinoo kon troh kiamat
Kheun Muhammad padum lama

Nyan he cutda beu taingat
Amanat lon kheun bak gata
Meuhei keunoe lam keuleumbu
Tabeuradu sama-sama

Teuma ltheuh nyan Putroe Meulu
Neuhei laju si nyak dara
Wahe adek cut sambinoe
Tamong keunoe bek di lua

Taeh sapat lhee geutanyoe
He sambinoe adoe raja
Keunoe taeh lam keuleumbu
Adoe teungku jamok that bha

Teuma seuot si nyak inong
Han lan tamong bah di lua
He putroe cut wareuna bungong
Meunan keunong bak lon kira

Taeh laju wahe putroe
Ulon sinoe bah meujaga
Lom jimeuhei Putroe Meulu
Adoe teungku bek meudawa

Lom jiseuot ureueng karam
Wahe intan bek eh sama
Hana patot lon eh sajan
Lon teubosan po cut raja

Nyang patot mee he putroe cut
Kareuna po cut biek ngon hamba
Han jeuet jampu pirak ngon meuh
Meunan makrun dilee haba

Nyoepi meunan putroe intan
Bek lon tuan eh ngon gata
Taeh laju po cut ampon
Sinoe ulon jaga gata

Teuma marit Meurak Asanah
Da meutuah bek meudawa
Dum geutanyoe hamba Tuhan
Saban saban leubeh hina

Tamong leugat lam keuleumbu
Cutda teungku bek di lua
Han ek le meutulak deungki
Talo cut ti meunang cutda

Teuma tamong raja 'ali
Ngon putroe ti tido sama
meunan sabe geunap uroe
Cut Usman nyoe jarak hana

Umu sibuleuen putroe sinan
Deungo teelan lon calitra
Meurak Asanah putroe canden
Dalam dihen leumah kira

Jitupeue dum buet lam baten
Puteh lisen sang troh mata
Putroe pike lam ate droe
Sang si nyak nyoe bukan dara

Lon eu khuluk ureueng binoe
Rasa jaroe agam raya
Bukon sosah lon eu gop nyoe
Malee kamoe han tom nyang ka

Jikalee nyo ureueng inong
Kadang agam ka ceulaka
Sang-sang malee lon ngieng ruman
Sang-sang gop nyan agam raya

Bak peunyum lon ureueng agam
Sang-sang gop nyan nyang cok ija
Lale kamoe teungoh manoe
Teuka gop nyoe baplueng ija

Kon soe laen nyang cok bajee
Teutapi malee lon peuhaba
Teutapi gop nyan ureueng saleh
Pangkat leubeh that wara'a

Jikalee kon ureueng meutuah
Han troh langkah keunoe teuka
Meukon ureueng hampe Tuhan
Toh pakriban rot geuteuka

Han soe jeuet jak keunoe saboh
Bakat jibeudoh raya raya
Bek antara bakat jijak
Kareueng pipak jeuet keu sira

Ureueng hampe ngon halarat
Laot darat bakjih sama
Teukeudi Allah peurintah Tuhan
Putroe intan lom bicara

Ureueng dua teungeut pangsan
Kutika nyan safan-safa
Putroe jak eh teuma sajan
Peunyum badan peujap dada

Putroe peurasa teuma badan
Nyo bit agam he geupak ma
Allah Allah ya Tuhanku
Han tom lon eu agam buya

Rab ceulaka ulon tuan
Wahe Tuhan tapeulara
Tapeulara lon he pangulee
Nibak sitree bek binasa

Putroe beudoh rijang-rijang
Neuriwang bak neuh nyang ka
Neuh teungeut po sambinoe
Seumeunga droe pura-pura

Teuma jaga Cut Usman
Beuet Quruan afai sigra
Teungoh malam beuet Quruan
Tamat simpan teubiet faja

Putroe deungo tumpang ulee
Moe meuree-ree ro ie mata
Mangat that su miseue gambang
Meunyum sayang dalam dada

Keunong uko jroh ngon ragam
Putroe intan ro ie mata
Makna keunong jroh that patot
Ate kuyut putroe muda

Abeh neubeuet Quruan tujuh
Putroe utoh neufam makna
Meurak Asanah leungo tuboh
Nyum ka runtoah alam donya

Tuleueng urat sang-sang putoh
Mata layoh mangat rasa
Miseue suleng gambang bangsi
Sang keucapi genggong Jawa

Meurak Asanahpi thah 'ali
Eleumee kari jeuet neubaca
Putroepe jeuet beuet Quruan
Jeuet neusimpan lafai makna

Putroe pike dalam ate
Jinoe pakri toh bicara
Meunyo meunan bah lon lakee
Lon meuguree mula-mula

Dudoe teuma buet lam baten
Lon meukawen deungon nisa
Meunan kasad puteh lisen
Ngon soe laen han lon rela

Baranggasoe han lon jinoh
Meuseuki geupoh ngon geusula
Bahle gob nyan di lon lakoe
Dudoe-dudoe pulang ija

Nyankeu di lon jinoe judo
Linto baro cutda dara
Abeh putroe buang undi
Neupeugah le ubak cutda

Wahe cutda putore tujuh
Lon peugah troh dum bak gata
Na peue ulon heundak tanyong
Cutda bungong lon pareksa

Ureueng binoe nyang troh malam
Pakri gop nyan nyo bit dara
Peugah cutda nyang mustahak
Bek tatulak tuto hamba

Putroe Meulu sosah ate
Han neutukri peugah haba
Bek teumakot he cutda droe
Peunyum kamoe sang kon dara

Bah di gata takheun putroe
Bak lon sidroe agam buya
Peugah cutda nyang mustahak
Tuto sikrak ubak hamba


Ulon cutda neupeunikah
Ngon cut indah baro teuka
Rindu lon that da meutuah
Taseuleuah uleh gata

Bak ate lon meunan peunyum
Nyankeu ureueng nyang cok ija
Bitpi meunan han lon jeuet kheun
Bak peunyum hana meutuka

Ureueng laen hana sidroe
Barangasoe han troh teuka
Jinoe cutda lon meukawen
Kadang geutem pulang ija

Bajee gadoh sangat lon syen
Tan soe laen bak lon kira
Meukon meunan da jeunulang
Han le pulang bajee hamba

Beuthat budok deungon seupak
Nyang ka layak han meutuka
Adat tapo dalam awan
Dudoe keunan lom meugisa



Beuthat aneuk barangapo
Han lon hiro he da raja
Ulon deungon bak simalam
Beuet Quruan mangat rasa

Nyankeu ureueng nyang that 'ali
Lagi sufi that wara'a
Mangat that su hana sakri
Ban kudangdi dap biula

'oh lon kalon ubak sifeuet
Sang mee jeuet po lam hawa
Ureueng hampe ngon halarat
Laot darat bak gop nyan sa

Jinoe cutda bek taiem le
Tapange syiah ulama
Bak lon kalon da boh ate
Ka sabe agam ngon dara

Putroe Meulu seuot yoh nyan
Nyoe bit meunan he adekda
Ka sibaloh roh sipadan
Tamse intan ngon mutiara

Miseue timphan lawanji on
Miseue lulon lawan jeureugha
Miseue sya'er lawan gandong
Miseue keubon lawan peunula

Jinoe adek ulon peuga
Usman Basyah geuhei nama
Meusyeuhu that lagi meugah
Di nanggroe Makah sideh teuka

Gop nyan jiba le Yahudi
Jiyue ek gle gunung raya
Jiyu jak cok on kayee meuh
Timoh ateuh gunung raya

Sare ase dum on kayee
Yahudi asee ka jibungka
Tinggai gop nyan di pucak gunong
Han pat tanyong ureueng hana

Teuma jijk tunong baroh
Han saho troh laot lingka
Troh sibuleuen jijk sabe
Ka jigrop le lam laot raya

Troh lam laot riyeuek jipoh
Hana saboh soe ja mita
Umu sithon dalam laot
Jicak le eungkat jipeulara

Teuma kamoe jak lam utcuen
Peurburuan paroh rusa
Me ngon areng glueh peulandok
Hingga trok babah kual

Lon eu teutiek lam uroe phok
Teuma lon cok puwoe lanja
Troh lon puwoe nyan u rumoh
Seupot beungoh lon usaha

Hingga puleh mangat badan
Cut intan keumala donya
Teuma kamoe meujak meuwoe
U nanggroe gampong Indra

Tinggai gop nyan sinoe sidroe
Keudeh keunoe meuraba-raba
Jeuep-jeuep simpang rot jilalo
Abek pinto dum jibuka

Leumah jieu dalam kitab
Haba 'ajab silagoina
Meurak Asanah putroe got that
Deuh jilihat dalam dafta

Teuma rindujih keu **putroe**
Dawok jimoe ro ie mata
Seubab jieu dalam surat
Galakji that ate suka

Kamoe adoe lon kheun teupat
Pakri pakat nibak gata
Putroe Meulu meunan peugah
Meurak Asanah ro ie mata

Teuka enseue dalam ate
Cutda bahle lon seureuta
Jinoe cutda lon meukawen
Ureueng malem jak tamita

Putroe Meulu seuot pantah
Insya Allah he adekda
Putroe Meulu le meukeumah
Meurak Asanah jiboh gaca

Dua ploh tujoh buleuen Ramadan
Malam Seunayan meukawen raja
Sare ase seukalian
Ubak Tuhan mohon pinta

Putroe seumbahyang dua raka'at
Bak halarat lakee do'a
Neupeujok droe ubak Allah
Putroe indah meuseumpeuna

Neubri beu troh keunoe langkah
Teungku Syiah asoe rimba
Lheueh seumbahyang dua raka'at
Putroe angkat jaroe dua

Teuma lheueh nyan na sikeujap
Tuhan intat Syiah lam rimba
Lhee droe Syiah keunan datang
Janggot panyang na lhee deupa

Tuan putroe bri horeumat
Peugah hajat bak Sviah Tapa
Wahe teungku lon wakuah
Neupeunikah putroe muda

Deungon Banta Usman Basyah
Hukom Allah ureueng dua
Teungku seuot insya Allah
Ban peurintah seuon hamba

Lheueh khanduri beuet fatihah
Teungku Syiah lakee do'a
Meurak Asanah puwakilah
Neupeunikah kamoe dua

Deungon Usman neupeunikah
Nanggroe Makah ayah bunda
Teungku seuot insya Allah
Han peue salah putroe muda

Teungku cok ie ngon srah babah
Lafat inkah le neubaca
Gata he nyak lon peunikah
Meurak Asanah nyang that eela

'oh lheueh ijab kabui sudah
Teungku Syiah woe neugisa
Putroe peuk Usman Basyah
Bungong kipah bandum cutda

'oh sare troh u rumoh inong
Putroe bungong beudoh lanja
Putroe seumbah nibak kaki
Cut putroe ti peumulia

Cut Usman duek beurdiri
Kanan kiri putroe muda
Ruhon Ensan duek di likot
Putroe tulet uneun banta

Nyang duek rot wie Meurak Asanah
Leubeh indah nibak nyang na
Hana saho kureueng leubeh
Han peue daleh timang saja

Umu baro teungoh baleh
Adat leubeh sithon dua
Putroe suleueng ranup sigapu
Yoh nyan teungku paleng muka

Teuma geubet le ngon idang
Raya manyang troh 'oh dada
Putroe suleueng bu lhee babah
Usman Basyah paleng muka

'oh lheuueh makeuen pinah idang
Bahle 'oh nan siat haba
Deungo lon peugah Meurak Asanah
Putroe indah that takwa

Beungoh seupot dawok bimbang
Han tom reunggang bak musalla
Neupuasa ngon seumbahyang
Hana lapang sikutika

Han ton saket baranggajan
Meuasoe bronpi han tom na
Suntok sabe dalam khaluet
Neutueng buet masok lam tapa

Putroe tujuh mangat ate
Hana tom cre ureueng dua
Umu lhee thon teutap sinan
Hame intan budak ka na

Hingga troh buleuen siblah
Aneuk lidah pandang donya
Lahe aneuk ureueng lakoe
Indah han soe baik rupa

Meurak Asanah duek di dapu
Putroe Meulu ate suka
Seungap ate han le tunu
'oh neuueu manyak baro na

Cuta putroe boh nama si nyak
Aneuk cut nyak putroe muda
Nama geuhei Hasyem Pari
Rumeh bibi peureuseh muka

Aneuk Meurak cut putroe ti
Nyang geuturi seugala donya
Umu sithon teutap sinan
Cut Usman ingat keu ma

Neupeugah le ubak putroe
Pakri jinoo toh bicara
Kareuna lon mantong umi
Gohlom mate bak lon kira

Putroe deungo kheun suami
Si nyak ti titek ie mata
Meunyo teungku mantong umi
Pakon ate sang meulila

Neuduek ngon lon padumna trep
Han tom siblet neupeuhaba
Meusiuroe tan meuteuoh
Pakon gadoh ingat keu ma

Jinoo teungku jak tariwang
Ulun sajan kuseureuta
Bek le lale he jeunulang
Bek le lintang jak tagisa

Cut Usman seuot pantah
Insya Allah putroe muda
Tapreh dilee he meuh meuntah
Ulun peugah ubak cutda

Teuma neuhei Putroe Meulu
He da teungku lon peuhaba
Idin keu lon da jeunulang
Heunadak laman jak saweue ma

Ka siploh thon lon cre nanggro
Han tom lon woe siklep mata
Saleh tan le ma lon sidroe
Trep ka keunoe sajan gata

Ban putroe deungo meunan peuneugah
Peunoh limpah ngon ie mata
Wahe adek Usman Basya
Lon takeubah tajak gata

Pakri tawoe he meuh mirah
Lon takeubah dalam rimba
Putroe kheun bak Meurak Asanah
He cut indah cahya mata

Meuyno tajak gata adoe
Bandum kamoe mate fana
Hana taweueh he boh ate
Kamoe mate 'oh tan gata

Wahe adek Cut Usman
Hana sayang bandum cutda
Lon pabanbah wahe putroe
Jinoe tawoe bak tuan tha

Wahe cut nyak putroe bintang
Pajan tariwang bungong jeumpa
Bak lon sangka han le jarak
Nyoe ka tajak tinggai cutda

Padumna trep lon peutimang
Ka tariwang he adekda
Bak uroe nyoe ka teukeudi
Ka trok had cre lon ngon gata

Jinoe tajak pajan riwang
He bintang pat saleh donya
Siri gampong patbu nanggroe
Po cut tawoe bak tuan tha

Putroe Meulu ka jibae
Ie mata ro basah ija
Po cut tajak deungon judo
Linto baro tinggai cutda

Wahe adek Usman Basyah
Pat takeubah lon he raja
'oh tan gata he cut inda
Jinoe sosah ate cutda

U Antara han jeuet woe le
Neupoh mate uleh raja
Seubab putroe ka lon peucure
Neueu han le 'oh troh cutda

Wahe adek putroe intan
Beu le sayang keu lon cutda
Allah Allah adoe payong
Tatinggai lon that seungsara

Wahe adek payong nanggroe
Pakri lon nyoe 'oh tan gata
Hana sampe lon peutimang
He cut intan ka tabungka

Nibak udep bahle mate
Meunyo tan le gata dua
Jinoe adek kamoe tapoh
Meunyo gadoh gata dua

Cut Usman seuot pantah
Neumoe bobah ngon ie mata
Bukon meunan cutda badan
Sajan-sajan lon ngon gata

Taintat lon beu troh jalan
Meukon meunan han seumporna
Meukon cutda intat kamoe
Rot toh jinoe ulon bungka

Peuraho han jeuet kapai karam
Toh rot ulon jinoe bungka
Seubab laot raya bakat
Lon taintat wahe cutda

Teuma seuot Putroe Meulu
Adoe teungku lon usaha
Tujoh uroe lon meutanggoh
Puteh leusoh iem tasaba

Yoh nyan putroe neumeuhajat
Bak halarat mohon pinta
'oh troh tanggoh tujoh uroe
Tuan putroe hei adekda

Wahe adek cut samlakoe
Ka sampoe janji ngon cutda
Tajak keunoe bandua droe
Bak uroe nyoe jadeh bungka

Mumat jaroe nibak kamoe
Ingat keudroe muda beulia
Beu kong mumat nibak kamoe
Bek lheueh jaroe pet ngon mata

Bandua ngon tuan putroe
Ngon aneuk droe sama-sama
Lhee ngon aneuk tangke ate
Budak keuce tingkue le ma

Wahe putroe bungong pade
Beu kong ate bek that lia
Tujoh putroe dong meuranjo
Bacut sapo mat adekda

Putroe Meulu kheun bak putroe
Ingat adoe bek binasa
Mumat beu kong he put cut droe
Talhok jaroe nibak cutda

Si nyak cut beu kong tatingkue
Tasimpue ngon ija sutra
Bek teumakot baranggapeue
Hana peue-peue Tuhan peulara

Yoh nyan putroe jiteureubang
U manyang dalam antara
Ureueng bungka sikureueng droe
Lapan putroe sidroe raja

Tujoh uroe jiteureubang
Leumah daratan nanggroe raya
Leumah Makah deungan Meuse
Pucok krueng Ne lam syeuruga

Indah sangat hana sabe
Putroe tren le pantah sigra
'oh troh jitren dum u bumoe
Pioh putroe sikutika

Putroe Meulu marit yoh nyan
Adoe badan lon kugisa
Tabri idin he samlakoe
Lon heundak woe he adekda

Han jeuet adek trep di sinoe
Tuan putroe kadang teuka
Lon takot that he samlakoe
Jeuet mupaloe akhe masa

Meunyo meuthee buatan kamoe
Neukoh takue uleh raja
Roh tan gata he cut intan
Kamopi tan le di donya

Kadang cit troh tuan putroe
Lon kheun meunoe ubak cutda
Meurak Asanah han le sinoe
Seutot lakoe po jroh rupa

Meunan lon kheun ubak putroe
Leupah kamoe nibak mara
Seuot teungku Cut Usman
Han jeuet meunan wahe cutda

Tajak beu troh ubak teumpat
Meunan jroh that nibak hamba
Meukon meunan tan mufeu'at
Hana mangat ate hamba

Adat han trep meusijameung
Lheueh meuteumeung deungon bunda
Meuhan cutda jak u rumoh
Mangat neupoh lon bu fana

Seuot putroe buleuen peunoh
Han kujinoh le meudawa
Wahe adek Cut Usman
Meunyo meunan ban kheun gata

He samlakoe tawoe dilee
Tajak bri thee ubak bunda
Meunan nyang got he samlakoe
Seubab putroe jeuoh donya

Meunanpi jeuet cutda putroe
Po samlakoe beudoh gisa
Tinggai sinan tuan putroe
Sikureueng droe ngon aneukda

Putroe pioh di yur asar
Cut bangsawan woe bak bunda
Cut Usman sampoe u leuen
Meunoe neukheun neuhei po ma

Putik pisang klat jantung pisang nu
He ma teungku mantong gata
Ban neudeungo ureueng meuhei
Rot lungkiek toi jingeuk sigra

Ban neukalon leumah aneuk
Sret mubruk le ie mata
Bunda seuot teuma yoh nyan
Wahe intan lon mantong na

Wahe aneuk Cut Usman
Taek bintang keunoe sigra
Taek keunoe aneuk rijang
Uleebalang ka troh gisa

Teuma neuk po samlakoe
Mumat jaroe deungon bunda
Putroe tajo neucom bak dhoe
He samlakoe mubahgia

Ka siploh thon cre ngon kamoe
Bak uroe nyoe lon eu rupa
Bak lon sangka han le tawoe
Cut samlakoe bijeh mata

Cut Usman neukheun meunoe
He bunda droe deungon hamba
Ulo peugah he po ma droe
Jeh pat putroe aneuk gata

Deungon cutda putroe tujoh
Neupioh yup asan raya
Meurak Asanah judo kamoe
Lon ba keunoe putroe muda

Jakleh tatueng putroe indah
Ma lon peugah nibak gata
Aneuk Raja Haliman Syah
Nyang meugah nanggroe Antara

Jinoe bunda jak tueng keunoe
Tuan putroe judo hamba
Syahri Banun beudoh **pantah**
Neuhei bagah ureueng lingka

Ngon dendayang dum sinaroe
Jak tueng putroe baro teuka
Teuma geuba ngon peurarakan
Gajah balohan teubiet sigra

Jak tueng putroe cut analan
Rakyat sajan ireng dumna
Peh ngon canang palee ngon gong
Jak tueng tanglong di blang raya

Jitren rakyat dalam gampong
Dum geusinthong agam dara
Kapeh-kapoh ureueng inong
Jitanyong toh pakri rupa

Meugah jroh that putroe bungong
Juep-juep gampong keunan teuka
Ladom inong beukah pinggang
Ladom subang teusuet mata

'oh troh keudeh ubak putroe
Tahe keudroe han le haba
Teudong tahe dum sinaroe
Teukap jaroe teuglong mata

Putroe tujoh duek meutamom
Rakyat bandum keunan mata
Tuan putroe Meurak Asanah
Hana leumah soe eu rupa

Jimeukheun dumna rakyat
Bit nyo jroh that wahe cutda
Lam nanggroe nyoe hana sapat
Ka lon lihat **aneuk** raja

Han tom lon eu meunan bagoe
Laen putroe ka lon juga
Syahri Banun neujak leugat
Han neutupat putroe muda

Sajan geuba ngon peurarakan
Saboh kandran indah rupa
Rakyat teudong dum geukalon
Meuhudom ban siseun lingka

Han teuingat ayah ibu
Peutroh napsu malee hana
Surot dilee aneuk teungku
Lon meung jak eu bijeh mata

Han jitem wehpi meusidro
Geusyik sagoe ngon panglima
Seubab galak keu cut putroe
Dum sinaroe tuha muda

Syahri Banun keunan ka toe
Ubak putroe indah rupa
Ka neutamong dalam kawan
Rakyat sinan dum seumua

Syahri Banun troh bak putroe
Teuma meunoe le neusapa
Assalamu'alaikom ha aneuk droe
Jeuh nanggroe keunoe teuka

Beudoh po cut bek le sinoe
Jak udeh woe u istana
Putroe tujoh seuot meunoe
Nabu kamoe wahe bunda

Com di teuot ngon di kaki
Horeumat neubri keu tuan tha
Syahri Banun lheueh mat jaroe
Ban sinaroe ngon aneukda

Han neuturi meulintee droe
Lapan putroe sabe rupa
Meurak Asanah dalam buni
Han neuturi uleh bunda

Seubab geusom Meurak Asanah
Geutakot meugah ubak raja
Geutakot meuthee ubak ayah
Haliman Syah di Antara

Bek neutuho le raja nanggroe
Geupoh dudoe banta muda
Putroe ek le ateueh kandran
Gajah hitam ban seumua

Putroe lapan sang situboh
Putroe tujoh saban rupa
Meurak Asanah sinan sajan
Lam kawan nyan leumah hana

Geucok laju le geupuwoe
Hingga sampoe bineh kuta
Rakyat ireng dum sinaroe
Deungon putroe leugat geuba

'oh sare troh le u dalam
Lhiet meuriam su meutaga
Geupeutren le ateueh kandran
Peuek yoh nyan u istana

Tuan putroe geupeujamee
Miseue lagee meukeurija
'oh lheuuh makeuen rakyat dum woe
Tinggai putroe lam istana

Teutap sinan tujoh uroe
Teuma jinoo laen kira
Bahle 'oh nan dilee siat
Lon riwayat putroe gisa

Putroe tujoh jikheun meunoe
He bunda droe deungo hamba
Jinoe ulon heundak riwang
Ma jeunulang aneuk gata

Syahri Banun seuot rijang
He bintang pakri tagisa
Pat takeubah cut meusubang
Bukon sayang sidroe saja

Putroe tujoh seuot meunoe
Deungo kamoe wahe bunda
Han trep he ma lon woe keunoe
Saweue adoe rijang teuka

Pulang uroe han lon jeuet kheun
Pulang buleuen han troh juga
Seubab lon duek dalam uteuen
That reuen-mareuen wahe bunda

Syahri Banun ka neuie me droe
Hana sapeue le beurkata
Putroe Meulu kheun bak adoe
Meunoe bagoe neupeuhaba

Wahe po cut bungong uroe
Siat lon woe idin gata
Meurak Asanah teuma seuot
Ie mata sret ban ie raya

Wahe cutda lon pabanbah
Kheundak Allah ka troh masa
Ka 'oh noe had abeh langkah
Han jeuet teulah buet Rabbana

Putroe Meulu kheun bak putroe
He adoe beu jroh seutia
He adek cut putroe intan
Bek kreueh ceukang ngon tuan tha

**Peue nyang geuyue beu taturot
Bek he po cut tameudawa
Deungon lakoe bek meudhot-dhot
Beu taikot jeuep peukara**

**Lom jimarit Meurak Asanah
Ka jipeugah ubak cutda
Wahe cutda lon amanat
Beu taingat nyan keu hamba**

**Proe hai teuka cutda keunoe
Saleuem kamoe tapeuhaba
Bek tabri jak gob nyan keunoe
Uroe dudoe lon kugisa**

**Takheun bak da lon meuteuntee
lja bajee han peue le ba
Insy Allah da pangulee
Meuteumeung bajee taeu teuma**

**Yoh nyan putroe jimumoe-moe
Banlapan droe jimuwa-wa
Teuma putroe tren u bumoe
Bantujoh droe sigo bungka**

**Jiteureubang dalam awan
Jipo tajam ban geulawa
'oh sare troh ubak teumpat
Sujud leugat putroe muda**

**Jiwoe laju troh u rumoh
Buleuen peunoh troh u tangga
Teuduek haba putroe riwang
Siat lintang bek trep lama**

III. MEURAK ASANAH WOE U NANGGROE ANTARA

Nyoe lon peugah Meurak Asanah
Putroe indah that takwa
Deungo judo banta indah
Waliyullah aneuk raja

Ho siuroe maken leubeh
Han tom teupéh ngon judonya
Suntok lale lam ibadat
Hana ingat le keu donya

Meurak Asanah putroe areh
Neuduek neuh ingat Esa
Bu neupajoh hana meuceh
Sineuk beureutehpi mumada

Teukeudi Allah peurintah Tuhan
Putroe intan lom hame ka
Ka na laen aneuk agam
That analan deungon rupa

Putroe rindu ate deumdam
Uroe malam ngon aneukda
Padum lawet lheuëh nibak nyan
Teukeudi Tuhan Po Nyang Esa

Tuan Putroe Meurak Asanah
Han tom leumah soe eu rupa
Teutap neuduek lam meuligoe
Ngon aneuk droe bijeh mata

Han tom neutren meusiuroe
Wasiet lakoe han meutuka
Han neubri jak keudeh keunoe
Neuduek keudroe lam istana

Deuek neupajoh reuoh neumanoe
Cok lam peutoe rukon ija
Cut Usman neujak neuwoe
Lheueng nom uroa siblet gisa

Dawok himbang lale keudroe
Samlakoe neujak lam rimba
Meunan sabe jeuep-jeuep uroe
Dalam uteuen neujak tapa

Han neuingat le reuen-mareuen
Meuneumakeuenpi han tom na
Nam uroe siblet baro neuwoe
Saweue putroe lam istana

Beungoh neujak po samlakoe
Tinggai putroe sidroe saja
Ka teupike tuan putroe
Ingat keudroe ro ie mata

'oh teuingat bunda ayah
Meurak Asanah duka cita
Bak siuroe teukeudi Tuhan
Marit intan ngon tuan tha

Syahri Banun neukheun meunoe
Ubak putroe nyang jroh rupa
Wahe aneuk tajak manoe
Sajan kamoe bak teulaga

Teuma seuot putik sukon
Pakon ulon ma tamaba
Lon takot that he ma putroe
Uroe dudoe teumeureuka

Wasiet teungku nibak ulon
Han neubri tren lam istana
Kadang teungku euntreuk neuwoe
Hana kamoe lam istana

Syahri Banun lom neupeugah
Bek tagundah he aneukda
Ateueh ulon meunyo marah
Hana salah ateueh gata

Lom meututo cut sambinoe
He ma putroe bek tamaba
Hana lon tren bak uroe nyoe
Ate kamoe sangat rugha

Peuebu seubab he aneuk droe
Peugah jinoe ubak po ma
Pakon aneuk ate sosah
Cuba peugah lon deungo nyata

Keupeue he ma ulon peugah
Sia payah hana guna
Napsu han troh ma meutuah
Got bahle bah ulon saba

Peue he putroe tameunapsu
Aneuk teungku peugah bak ma
Yoh nyan putroe peugah laju
He ma teungku nyang lon pinta

Ija bajee neubri keu lon
He ma ampon nibak gata
Meuhana nyan hana lon tren
Bah tinggai lon ajk di gata

Meunyo meunan he aneuk droe
Jeh lam peutoe bajee ija
Peue nyang heundak he sambinoe
Tacok keudroe ri nyang suka

Kon bajee nyan he ma teungku
Hana napsu po ma raja
Sarong badan lon meunapsu
Yoh jeh teungku jok bak gata

Hana bak lon wahe intan
Sarong badan pakri rupa
Tuan putroe lom kheun nyoeban
He ma intan bek meudawa

Bek takheun tan ma pangulee
Di lon kuthee na bak gata
Meuhan tabri nyan lon lakee
Ingat dilee wahe cut ma

Jicok sikin mat di jaroe
Jimeung top droe mangat fana
Bek he aneuk nyan tatop droe
Beungeh lakoe keu lon po ma

Ija bajee lon bri pulang
Nyoe he intan sarong gata
'oh ban jieu ka neupulang
Jicok rijang pantah sigra

Meurak Asanah jikheun meunoe
Udeh manoe wahe po ma
Jinoe ulon tren u bumoe
Tajak manoe dua dua

Tingkue aneuk tuan putroe
Saboh di droe saboh bak ma
Putroe jitren jijak leugat
Sapat sapat ngon tuan tha

'oh sare troh ubak teumpat
Kulam jroh that le mumata
Sidroe namiet jime beudak
Sidroe bawak gahru jeumpa

Syahri Banun ate galak
Putroe Meurak ate suka
Tuan putroe yoh nyan manoe
Sambinoe sajan tuan tha'

Dendayang uet kalang putroe
Jipleu asoe pat nyang leuta
'oh lheueh manoe suci badan
Glum bintang leumah bak dada

Jiek jahet cahya iman
Soe nyang pandang mabok gila
'oh lheueh manoe tuan putroe
Teungoh jinoe pantah sigra

Jicok aneuk bandua droe
Sambinoe ikat bak dada
Laloe cut ma teungoh manoe
Cut putroe laen bicara

Jisok bajee nibak asoe
Jihayak droe pura-pura
Laloe cut ma neuuet kalang
Ngon dendayang dua dua

Meurak Asanah jiteureubang
U manyang bak dheuen meuraksa
Syahri Banun tahe mandang
Neupandang bak putroe muda

Teuma marit Meurak Asanah
Ka jipeugah wasiet bak ma
Wahe cut ma deungo lon peugah
Saboh patah ubak gata

Ma neupeugah ubak teungku
Nyoe sigoutu narit hamba
Wasiet lon nyoe ubak ampon
Nyoe ho ulon leupah bungka

Bu ka lon boh dalam idang
Jehpat subang lam ceurana
Jehpat gleueng lon lhat bak tando
Nyanpat kaso deungon tika

Allah Allah wahe judo
Linto baro lon kubungka
Teutapi na bacut salueng
Tan meuteumeung ngon judonya

MILIK KEPUSTAKAAN
DIREKTORAT TRADISI
DITJEN NASF DEPBUDPAR

Wahe ulon kayee jatoe
Ka sampoe Allah karonya
Raja kayee jakleh kawoe
Kaduek keudroe bak sot nyang ka

Sampan bahtra ka jiriwang
Banta seudang teungoh sigra
Teungoh laju po samlakoe
Sampan jiwoe ka jiguda

Neujak laju hana pihoh
Hingga troh u leuen istana
Yoh masa nyan puteh leusoh
Neumeuuroh meuhei cutda

Putik pisang klat jantung pisang mu
Soe di leupu putroe muda
Putroe Meulu jingeuk yoh nyan
Cut Usman neuueu teuka

Neutren leugat putroe intan
Jak mat tangan ngön adekda
Putroe neuek le u rumoh
Buleuen peunoh duek bak tika

Pajok ranup he adoe jroh
Breueh seuharoh pade aga
Putroe Meulu marit meunoe
He samlakoe ho rot teuka

Ho rot tajak adoe keunoe
Lam laot nyoe le that bala
Samlakoe cut yoh nyan peugah
Karonya Allah wahe cutda

Nyang jeuet troh lon keunoe langkah
Raya sosah adek gata
Peue jeuet sosah wahe adoe
Peugah jinoe ubak cutda

Jipeugah le teuma meunoe
Sira jimoe ngon ie mata
He cutda cut da meutuah
Meurak Asanah ka jigisa

Putroe Meurak ka leupah woe
Aneuk dua droe sajan jiba
Tinggai kamoe sinoe sidroe
Pakri jinoo wahe cutda

Taintat lon da sambinoe
Ubak Putroe Meurak muda
Teuma seuot Putroe Meulu
Adoe teungku bek le hawa

Meurak Asanah bek le napsu
Han got laku lon eu rupa
Patot jiwoe jicok langkah
Han jipeugah sikrak haba

Bek le tatueng nyak meutuah
That bit payah jalan safara
Han got budi meurak Asanah
Nyan jeuet sosah ate gata

Ka hana jih bah tacok nyoe
Tujoh kamoe sidroe gata
Tacok nyang le taboh sidroe
Dumna kamoe ate suka

Lompi adoe ka na si nyak
Peue tagalak inong tuha
Kamoe tujoh aneukmeu tan
Muda saban jroh-jroh rupa

Putroe Meurak bek le napsu
Inong badu tan seutia
Meunan nyang got bak lon sidroe
Po samlakoe bek tabungka

Bek he cutda nyan tapeugah
Lelupah sumpah lon ngon gata
Pakri cit roe nyak meutuah
That bit sosah ate cutda

He adek cut po samlakoe
Deungo adoe lon peuhaba
Gampong jeuh jarak nanggroe
Barnaggasoe tumpoi do'a

Bek meunapsu le keu putroe
Han troh adoe jalan gata
Tujoh reutoh kuta di jalan
Ngon pahlawan han teukira

Baranggasoe han troh keunan
Jisimpan han jan tahei ma
Tujoh buleuen tacre sinan
Troh sampoe nyan bak pinto donya

Awai phon-phon nyang meulinteueng
Kuta Kareueng saboh raja
Ngon pahlawan han ek bileueng
Jiampeueng barangsoe teuka

Beuladeh nyan Kuta Beusoe
Nyapi nanggroe saboh raja
Maseng-maseng dum mat nanggroe
Sidroe sidroe ulah-lagoina

Beuladeh nyan Kuta Pirak
That meuhalak puteh safa
Po nanggroe nyan bungong meurak
Raja Palak geuboh nama

Beuladeh nyan nanggroe saran
Haliman Syahdan nama raja
Rakyat le that hana padan
Dum pahlawan sicupak lada

Beuladeh nyan nanggroë Pari
Sulotan Syahri nama raja
Pahlawan le hana sakri
Sipai meuribee laksa

Beuladeh nyan nanggroë Silan
Juhan Syahdan nama raja
Rakyat le that hana padan
Dum pahlawan teuga teuga

Beuladeh nyan nanggroë Sulek
Sulotan Tasek nama raja
Barangsoe prang keunan han ek
Payá Rubek lingka kuta

Kuta kong that hana macam
Luah dalam siribee gunca
Han ek abeh lon peugah trang
Adek badan sep dum nyang ka

Bandum taklok di raja nyan
Bak Haliman junjong sabda
Nyan he adoe ka lon peugah
Nyak meutuah ubak gata

Bek he adoe tameu langkah
Han ek leupah bak lon kira
Teuma seuot Usman Basyah
Cutda meutuah deungo adakda

Meuhan cutda intat kamoe
Bah lon top droe mangat fana
Bahle mate lon di sinoe
Meuna lon nyoe sosah gata

Ka neucok kreh mat di jaroe
Jimeung top droe banta muda
Teuma beudon Putroe Meulu
Jimat laju jaroe dua

Cut Usman neukheun pantah
Bek tareupah lon he cutda
Bahle mate lon uroe nyoe
Nibak dudoe sosah gata

Bek he adoe taboh iman
Bahle kaman ban kheun gata
Bah mate lon bantu joh droe
Gata adoe beu troh pinta

Teuma marit Ruhon Ensan
Jikheun rijang bak adekda
Wahe adek Putroe Meulu
Adoe teungku bek le subra

Udeh tajak jinoe laju
Intat teungku u Antara
Putroe Meulu lom kheun sunggoh
He adoe beh bek le gubra

Lhee uroe lheueng lon meutanggoh
Lon peutroh ban hajat gata
Putroe Meulu meuduek sapat
Jimupakat deungon cutda

Pakri laju da meutuah
Pat takeubah adek raja
Teuma seuot Ruboh Ensan
Meunoe padan he adekda

Tajak bak raja Kuta Karang
'oh meuteumeung tapeuhaba
Takheun adek si nyak meugleueng
Meuteumeung di Pulo Sumatra

Kareuna gop nyan syeedara ayah
Patot takeubah banta muda
Udeh adoe tameulangkah
Bek le sosah adek raja

Keumah pakat tujoh putroe
Jiheï adoe banta muda
Ka jimeuhei po samlakoe
He adoe jak udeh bungka

Cut Usman peukeumah droe
Tuan putroe ka jimaba
Jingui ija bajee jisok
Jigeutang ok bak keupala

Soe nyang kalon gila mabok
Bee minyeuk ok gahru ata
Jimat adoe bacut sapo
Ka jibapo u Antara

Jiteureubang pantah leugat
Jikarat miseue kleueng sama
Tujoh uroe jiteureubang
Troh datang bak pinto donya

Troh bak nanggroë Kuta Karang
Cut meugleueng neutren le sigra
Putore pioh di teungoh blang
Tamse bintang hu meucahya

Troh le ureueng keunan datang
Jipandang bak putore muda
Leumah jieu ureueng sidroe
That samlakoe baik rupa

Rupa jroh that hana bagoe
Tamse uroe cahya muka
Jimuplueng-plueng dum sinaroe
U meuligoe jak peuhaba

'oh troh keunan meuhah-meuhah
Meuseunoh peugah ubak raja
Jikheun deelat ka roh lalat
Bulat-bulat po meukuta

Raja neukhem hana marah
Peue kapeugah nyang kon haba
Teuma jikheun ampon deelat
Baro teupat keumeung nyata

Ampon tuanku meuribee katoe
Po cut putroe ka troh gisa
Putroe tujoh ka troh neuwoe
Jehpat jinoe di blang raya

Sidroeu ureueng han lon tusoe
Tan lam nanggroeu gampong Indra
Han tom lon eu timu barat
Barangapat aneuk raja

Rupa that jroh wahe deelat
Suara mangat sang biula
'oh tadeungo bak jimeusu
Han le lot bu po meukuta

Tunong baroh barat timu
Han tom lon eu meunan rupa
Puteh kuneng sang keululu
Glum meutabu peunoh dada

Ban raja deungo meunan peuneugah
Meulintah bak ate raja
Nyo aneuk nyoe ureueng meugah
Biek peunileh raja raya

Poteu raja neuyue peh gong
Rakyat jitren tuha muda
'oh meusapat dum meuhimpon
Raja suron u blang raya

Mee ngon teubee u meulason
Jiseuon ranup meuraga
Jakleh katueng cut ma ubon
Keumuen ulon aneuk syeedara

Me ngon usong tatah intan
Taarakkan ureueng meunama
Raja suroh mupeurasan
Jak tueng intan baro teuka

Jimuplueng-plueng agam inong
Han peue tanyong ate suka
'oh troh keudeh ka teuceungang
Jipandang muda beulia

Ureueng tuha le meututo
Tadeungo su bak seumapa
Ampon po cut bungong ceuko
Dara baro ka troh gisa

Nateu keunoe wahe po cut
Saleuem sujud bak ayahda
Kamoe datang tuha ngon cut
Nyang meukeusud suroh raja

Neuyue jak tueng putroe bungong
Po cut tamong u istana
Putroe meulu seuot pantah
Han peue salah he peurdana

Cit lon tamong ubak ayah
Hajat langkah bak meukuta
Beudoh rijang tuan putroe
Tamong jinoo deungon hamba

Sajan sajan deungon kamoe
Bek trep sinoe le di lua
Tuan putroe beudoh leugat
Sajan rakyat balatantra

'oh sare troh ubak deerat
Kru seumangat le neukata
Raja neukheun teuma meunoe
He aneuk droe ka troh gisa

Neutren po cut di meuligoe
Tuan putroe judo raja
Jak eu po cut meugah ka woe
Di nanggroe Pulo Sumatra

'oh sare troh u seuramoe
Beudoh Putroe Meulu Cina
Seumbah sujud ubak kaki
Peurmaisuri ate suka

Nateu keunoe he putroe ti
Saweue umi lon ka tuha
Nyoe na po cut ranup leupong
Pineung boh nibong sret lam paya

Kru seumangat he ma ampon
Mangat bak lon dum srikaya
Bak gata ma ranup leupong
Bak ulon hana sapeue na

Bak lon nyang na ranup jatoe
Jiek keudroe u cong buga
Lompi mirah pineung boh awe
Lon duek lam gle Pulo Sumatra

Kru seumangat he boh ate
Bak lon mise seulaseh Jawa
Sinoe puan sideh bate
Jisambot le putroe muda

Pajoh ranup baru bicah
Meulu indah peugah haba
Teuma geubet le ngon idang
Raya manyang troh 'oh dada

Putroe tuha marit rijang
Makeuen intan bu ngon sira
Sira buta camplipi tho
Eungkot baro lhee thon lama

Ampon meu'ah he aneuk e
Lon ba beuhe aneuk bak gata
Kru seumangat he ma ampon
Mangat bak lon dum srikaya

Makeuen sigo ma sajan lon
He ma ampon beuseureuta
Han peue he nyak bah tinggai lon
Meu'ah ampon nibak gata

Tuan putroe makeuen rijang
Po cut intan sangat bahga
'oh lheueh makeuen pinah idang
Tanyong rijang bak aneukda

Poteu rajapi di sinan
Tanyong yoh nyan pantah sigra
Wahe aneuk putroe intan
Lon tuan kureueng pareksa

Tan lon turi bungong uroe
Ureueng lakoe sajan gata
Dulee jameun tajak keunoe
Cit tujoh droe laen hana

Nyoe he aneuk lon eu lapan
Pane intan keunoe taba
Lon eu rupa tamse mambang
Miseue bintang meucuaca

Miseue uroe nyang peungeuh trang
Lang-geumilang cahya muka
Teuma seuot Putroe Meulu
Ampon tuanku lon calitra

Nyoekeu adek lon saboh ku
Saboh ibu tulet bak ma
Inong tujoh deelat makam
Sidroe agam Po karonya

Usman Basyah ayah boh nan
Nyang laen tan po meukuta
Beu le gaseh hë junjongan
Cut Usman adek hamba

Ampon tuanku meuribee katoe
Neueu jaroe di jeumala
Adek ulon tinggai sinoe
Dumna kamoe meujak gisa

Kareuna jih ate sosah
Meurak Asanah ka jibungka
Putroe jiwoe tan jipeugah
Adek leupah jak lam rimba

'oh ban jiwoe putroe tan le
Sosah ate pungo gila
Nyankeu seubab ulon pike
Udep mate bah bak gata

Beu le gaseh deungon sayang
Intat pulang bak judonya
Ban raja deungo narit meunan
Po junjongan ate suka

Raja pike lam ate droe
Bah lon gantoe aneuk hamba
Aneuk ulon kupeukawen
Puteh lisen Syamsu Kama

Meunan pike dalam ate
Hana lahe deuh u lua
Teuduek haba dilee siat
Lon riwayat putroe bungka

Abeh wasiet putik langsung
Beudoh leugat dum jigisa
Jiteureubang bantujoh droe
Tuan Putroe Meulu Cina

Tujoh uroe jiteureubang
 Sampoe yoh nyan bandum rata
 'oh sare troh ubak teumpat
 Jiwoe leugat u istana

Bahle 'oh na teuduek siat
 Ulon sambat muda beulia
 Cut Usman lon hikayat
 Sajan deelat raja raya

IV. USMAN BASYAH JAK SEUTOT PUTROE

Poteu raja ate rindu
'oh tee neuue muda beulia
Neueu patot jroh meulaku
Sikufu ngon Syamsu Kama

Umu sibuleuen teutap sinan
Cut intan sajan ngon raja
Padum lawet banta sinan
Cut Usman marit ngon raja

Ampon tuanku syahi alam
Gaseh sayang keu lon hamba
Lon boh gampong tinggai mawang
Heundak pulang bak judonya

Lon tuanku ate rusak
Tuanku petugrak langkah hamba
Lon meung jak eu Putroe Meurak
Deungon si nyak sajan jiba

Saleh na troh jiwoe u teumpat
Saleh di rot jih ka fana
Ngon si nyak cut dua sajan
Lon jak kalon na troh gisa

Poteu raja neukheun meunoe
He samlakoe tanglong donya
Bek le napsu Meurak Asanah
Aneuk meutuah tan seutia

Patot aneuk gata jikeubah
Han jipeugah yoh jibungka
Aneuk raja lam nanggroe nyoe
Nyang sambinoe meunanpi na

Na nyang kaya na nyang meugah
Nyak meutuah ri nyang suka
Teuma seuot Usman Basyah
Jaroe dua blah neubet sigra

Bek tuanku gantoe putroe
Nibak kamoe hana rela
Kareuna lon aneuk dagang
Lagi kureueng tuanku bangsa

Bek tuanku lon neusagang
Gaseh sayang siblah mata
Ngon keuramat tuanku ayah
Ngon afuwah po meukuta

Tulong Tuhan insya Allah
Bu phui langkah troh lon gisa
Com di teuot seumbah di kaki
Tuanku neubri ban lon pinta

Mayoh ate lon beureuhi
Keu putroe ti Meurak muda
Poteu raja lom meututo
He aneuk e bek meudawa

Gata sineo lon bri judo
Dara baro nyang jroh rupa
Meurak Asanah bek tatueng le
He boh ate tan seutia

Nyang jeuet aneuk lon kheun meunan
He budiman han tom nyang ka
Di gop nyang na baranggasoe
Mumat jaroe watee bungka

Meunyo tajak woe u nanggroe
Idin lakoe dilee beu na
Meunan adek di gop laen
Puteh lichen dum nyang ka-ka

Nyoe 'oh jitren di meuligoe
Leugat jiwoe bak ayahda
Meurak Asanah he boh ate
Han jipike jeuheut gata

Gata aneuk rayek irang
He buleuen trang keuji nama
Jinoe aneuk bek tatueng le
Bak lahe hana got guna

Sinoe gata lon peukawen
Putroe linteng aneuk hamba
Bahle deungon putroe seudang
Roh sipadan Syamsu Kama

Cut Usman yoh nyang pike
Sosah ate hana ngon sa
Meudeh meunoeka neusyawe
Neupike neuura-ura

Meulon dawa meuhad mate
Kadang pakri dudoe masa
Untong untong neupoh mate
Kaman bahle lon bri aja

Lom meutanggoh watee lon woe
Bek mupaloe lon ngon raja
Ampon tuanku meuribee katoe
Tuanku droe ban nyang suka

Insy Allah deelat ampon
Nibak ulon ateueh jeumala
Saboh napsu nibak deelat
Siploh lipat nibak hamba

Bek antara neubri putroe
Neukoh takuepi lon rela
Teutapi tuanku lon meutanggoh
Bahle beu troh dilee mula

Bek meusampe ureueng lon drop
'oh hana got hana guna
Bek pat laën ulon tuan
Bak junjongan lon tan guna

Bek geukheun lon aneuk barangpo
Hana hiro putroe bungka
Saleh udep saleh mate
Kadang pakri po meukuta

Poteu raja ka neuem droe
Hana sapeu le suara
Yoh nyan raja neumeukeumah
Aneuk meutuah udeh bungka

Ban kheun gatapi lon turot
Putik rambot mubek lupa
Cut Usman peugah keudroe
Ubak putroe judo raja

Wahe po cut ma sambinoe
Idin lon nyoe heundak bungka
Com di teuot seumbah di gaki
Leumoh ate putroe tuha

Pakri tajak nyak meutuah
Pat takeubah lon he raja
Wahe aneuk Usman Basyah
Gata leupah ka tabungka

Putroe bae taeu jojah
Peunoh limpah ngon ie mata
Syamsu Kamapi that gundah
Po lem meutuah bek tabungka

Tameuniet lon dalem teungku
Soe taguen bu di rumoh gata
Syamsu Kama antok ulee
Peugot lagee di nap banta

Dalam leumueng jisumpom droe
Neukoh takue lon meukuta
'oh lheueh mate ulon tuan
Neubeurjalan ho nyang hawa

Meuhan meunan po junjongan
Neuba sajan ngon adekda
Adat han jeuet neutueng keudroe
Neupubloe neutueng hareuga

Lon nyoe dalem bék neukeubah
Ate sosah 'oh tan gata
Meuhad lon top teuntang ate
Han lon eu le gata bungka

Cut Usman sosah ate
Hana jeuet le lon kubungka
Meunyo han got ulon pike
Putroe mate ulon fana

Bicara nyoe han jeuet iem le
Bah lon pike nyang seujahtra
Kadang-kadang ek meusampe
Puleh ate Putroe Kama

Han jibri jak dapat sosah
Got lon ilah nak jeuet bungka
He putroe cut bungong uroe
Han trep lon woe ubak gata

Lon dong sideh tujoh uroe
Troh lon keunoe rijang gisa
Taduek po cut lam meuligoe
Taleueng jaroe keu lon hamba

Meukon meunan he putroe ti
Lonpi mate rugoe gata
Bek tamoe le putroe intan
Troh lon riwang bukan seunda

Yoh nyan putroe leumoh ate
Teuma jibri banta bungka
Bek tuanku ubah janji
Troh bak titi hitam muka

Insya Allah bungong geutoe
Tuhan sidroe peutroh pinta
Banta gusuek ulee putroe
Wahe adoe beu mubahgia

Lon jak siat rijang lon woe
Deungon putroe meuteumeung mata
Meunyo mate nyawong sampoe
Troh sit lon woe putroe bak gata


Bek tamoe le bungong mirah
Lonpi sosah gata rugha
Meuhan taiem bungong uroe
Bah kutop droe mangat fana

Ban putroe deungo haba top droe
Seungap jimoe han le gubra
Teuduek dilee putroe bae
Bungong kundo neutren lanja

Poteu raja neujak sajan
Ngon cut intan banta muda
Na tujoh droe raja neujak
Peungon si nyak laen hana

Tujoh malam tujoh uroe
Troh sampoe bak kuta raja
Troh bak gampong Kuta Beusoe
Syeedara adoe raja raya

Nama geuhei Amat Kumiran
Nyanpi tuan raja beusa
'oh troh raja u leuen meuligoe
Peurdana meuntroe kalon rupa



Teuma jikheun ubak bujang
Jakleh rijang peugah bak raja
Kakheun deelat ka troh datang
Ka troh cut bang po meukuta

Bujang beudoh leugat pantah
Bak khalifah jipeuteuka
Ampon tuanku barang salah
Ka troh langkah keunoe raja

Poteu raja Kuta Karang
Keunoe teusrang lon eu teuka
Nyang ka dilee tuanku droe
Han tom meunoe neujak dua

Bak uroe nyoe po junjongan
Peue habaran saleh neuba
Yoh nyan raja neutren pantah
Bak khalifah junjong sabda

Neumeucom-com mumat jaroe
Tuanku droe pajan teuka
Peue na hajat payong nanggro
Nyang troh keunoe po meukuta

Nyang troh langkah lon jak keunoe
Bak uroe nyoe bak adekda
Nyoe si aneuk batee pudoe
Samlakoe lon jok bak gata

Adat kureueng beu tatambah
Usman Basyah hukom gata
Bek jeuet 'aeb deungan keuji
Adek lon bri nyoe keu gata

Peue nyang hajat beu tapeutroh
Meuseuki jeuh tajak mita
Seubab ka troh bak geutanyoe
Jiba le Putroe Meulu Cina

Meunyo di jih jikheun adoe
Di geutanyoe aneuk nyawa
Beuthat aneuk baranggasoe
Meuka meusoe biek meunama

Meunyo hana tapadoli
Geutanyoe keuji jeuheut nama
Nyan he adoe ka lon kheun kri
Si nyak ti wasiet ubak hamba

Ka jipeujok bak geutanyoe
Samlakoe muda beulia
Jijak seutot tuan putroe
Ka jiwoe u gampong Indra

Jiba aneuk bandua droe
Samlakoe budak baro na
Beu troh adoe jih bak putroe
He samlakoe hukom gata

Abeh wasiet raja riwang
Poteu pulang leugat gisa
Samlakoe cut tinggai sinan
Bak raja nyan siuroe dua

Poteu raja troh u nanggroe
Tuan putroe le pareksa
Ampon tuanku payong nanggroe
Ho samlakoe leupah neuba

Pat neukeubah bungong uroe
Tuanku droe ka neugisa
Poteu raja teuma peugah
Ka lon keubah bak adekda

Ubak adek ka lon pulang
Peue nyang alang lon yue mita
Lon yue intat ubak putroe
Ubak nanggroe raja raya

'oh jiriwang lon yue puwoe
Bak geutanyoe beu troh jiba
Meunyo rijang keunoe jiwoe
Lon yue keunoe lom peugisa

Bak adekda ka lon peugah
Bek that sosah dua gata
Ban putroe deungo sabda meunan
Han muban-ban ate suka

Teuduek haba raja ngon putroe
Kisah muwoe lom bak banta
Teutap sinan po samlakoe
Deungo jinoe lon calitra

Yoh nyan raja tanyong rijang
Bak cut intan banta muda
Wahe aneuk muda seudang
Peugah rijang bak ayahda

Ho tameung jak bungong uroe
Samlakoe peue tajak mita
Peue na hajat nyak meutuah
Nyang troh langkah keunoe gata

Bek tamalee he meuh mirah
Tapeugah bek malee mata
Ayahteu nyoe nyang seuleuah
Beuthat payah lon usaha

Samlakoe cut seuot meunoe
Neubet jaroe u jeumala
Ampon tuanku payong nanggroe
Hajat kamoepi that raya

Lon jak seutot tuan putroe
Judo kamoe po meukuta
Meurak Asanah tuanku droe
Ka jiwoe u gampong Indra

Aneuk dua ka jipuwoe
Nyang jeuet lon nyoe sosah raya
Tan jipeugah masa jitren
Hana ulon jak lam rimba

'oh troh lon woe u meuligoe
Han le putroe ka jibungka
Ulon tanyong ubak ibu
He ma teungku putroe hoka

Teuma neukheun ubak kamoe
He aneuk droe ka jibungka
Deungan aneuk jiba sajan
He budiman bijeh mata

Nyan tuanku ka lon peugah
Neubri leupah siklep mata
Ngon afuwah tuanku deelat
Beu troh hajat lon meukuta

Poteu raja neukheun leugat
Aneuk bek that tausaha
Sinoe aneuk lon peunikah
Putroe indah ulon mita

Sinoe laen lon bri putroe
Ulon gantoe nyang jroh rupa
Tadong aneuk gata sinoe
Nanggroe nyoe gata keu raja

Teuma seuot bintang pari
Ampon kami po meukuta
Bek tuanku jinoe neubri
Dudoe page 'oh lon gisa

Ampon tuanku payong nanggroe
Neueu jaroe ateueh jeumala
Bek trep tuanku lama sinoe
Beu troh lon nyoe siklep mata

Di akhe lon meuhad ratee
Nyan dilee tuanku kira
Gaseh sayang meuribee-ribee
Ulon lakee bak sripada

Bek trep tuanku lon di sinoe
Watee lon woe ban nyang suka
Ban nyang galak tuanku droe
Bak kamoe hana meudawa

Poteu raja ka neuem droe
Bit aneuk nyoe nyo eelia
Abeh ingat deungon pike
Udep mata bakjihpi sa

Beuthat takheun baranggakri
'aeb keuji that jirela
Ureueng hampe ngon halarat
Laot darat bakjih sama

Teuma raja neukheun meunoe
Udeh jinoo jak tabungka
Raja peugah ubak meuntroe
Deungo kamoe he peurdana

Tajak intat aneuk kamoe
Keu putroe nyang indah rupa
Intat beu troh u Kuta Pirak
Bak nanggroe wak Raja Beureuma

Takheun saleuem ulon sinoe
Aneuk kamoe hukom gata
Judo Putroe Meurak Asanah
Intat beu leupah ubak raja

Bek tabri dhot ngon gop pake
Cut boh ate aneuk hamba
Meunyo gop poh di rot di blang
Dudoe jeuet prang deungon hamba

Teutapi jih syeedara putroe
Bek'jeuet dudoe gop ceureuca
Meunan takheun haba tanggoe
Bek mupaloe akhe masa

Abeh wasiet raja nanggroe
Ubak meuntroe ngon bentara
Yoh nyan meuntroe jikrah rakyat
Meusapat dalam blang raya

Jipeh ngon gong jitet nubak
Tanda beurangkat raja raja
Rakyat le that subhanallah
Intat cut indah meulintee raja

Ladom giduek ateueh gajah
Saboh ulah ateueh guda
Ladom giduek guda tanji
Siteungoh ri ateueh unta

Jitet beude hana teudoh
Tadeungo kiroh sira bungka
Uroe malam hana pioh
Hingga troh u kuta raja

Hingga troh bak Kuta Pirak
Rakyat mubalak lam blang raya
Jipeh ngon gong ka jiarak
Sang meuhayak nanggroe raja

Meudeungong su suara geundrang
Raja tanyong bak peurdana
Hei panglima deungan meuntroe
Peue meusu nyoe di blang raya

Bunyoe su gong deungan geundrang
Saleh soe prang nanggroe raja
Napi tantra keunoe datang
Kajak rijang kapeunyata

Su geudumbak deungon beude
Rakyat rame lon eu teuka
Teubiet leugat bek kadong le
Tanyong pane han tom nyang ka

Adat nyoe jih jak prang nanggroe
Saleuem kamoe tapeuhaba
Yue preh dilee kukrah rakyat
Bek cubeueh that ureueng teuka

Meunyo raja jak bak kamoe
Tamong keunoe lon bri tahta
Yoh nyan meuntroe teubiet u blang
Uleebalang rakyat dumna

'oh sare troh keudeh u blang
Meukeumang rakyat meulaksa
Yoh nyan meuntroe akai sadak
Han jijeuet jak sang-sang lia

Sosah ukeue langkah jibet
Lom meusurot dua deupa
Teuma beudoh Juhan Syahdan
Nyang pahlawan meuntroe raja

Nyankeu meuntroe that pahlawan
Amat Kumiran raja raya
Jimeuhei le jikheun nyoeban
Wahe tuan mari sigra

Beuk teumakot dum angkatan
Lon surohan nibak raja
Meuntroe jijak yoh nyan laju
Leumah jieu ureueng dua

Deuh pahlawan raja Pirak
Yoh nyan galak ate suka
Meuntroe tajo com di gaki
Horeumat jibri peumulia

Teuma mentroe kheun bak Juhan
Wahe teelan deungo hamba
Saleuem raja nyang di dalam
Deelat makam suroh hamba

Neuyue tamong bek trep di blang
U dalam bak teumpat raja
Juhan deungo haba meunan
Beudoh yoh nyan pantah sigra

Beudoh rakyat dum di likot
Sangkot pawot lam blang raya
Rakyat le that troh meukatoe
Dilee meuntroe woe bak raja

'oh sare troh jibet jaroe
Ampon kamoe po meukuta
Ka troh lon jak tuanku droe
Nyoe ka lon woe po cut raja

Ureueng datangpi ka meusoe
Cit kawom droe po meukuta
Ka troh Juhan Kuta Beusoe
Aduen adoe sisyeedara

Lon eu geujak ngon peurasan
Peukakah prangpi na geuba
Geuba sajan ureueng sidroe
That samlkoe hana ngon sa

Rupa miseue mata uroe
Hana sidroe meunanpi sa
Adat jeuneh ureueng binoe
Baranggasoe ate suka

Puteh kuneng ban meuh seupoh
Muka peunoh sang purnama
Dalam seupot han peue tanyong
Peungeuh blet-blot sang peurmata

'oh takalon ubak badan
Putoh meukhan urat mata
Teuduek haba dilee siat
Lon riwayat ureueng teuka

'oh troh tamong dum u dalam
Po junjongan neubri tahta
'oh troh keunan po samlakoe
Ureueng nangroe dum ka teuka

Agam inong jimuplueng-plueng
Jak eu ureueng baro teuka
Troh u dalam bandum rakyat
Jilihat muda beulia

Ban jikalon Cut Usman
Rakyat yoh nyan publoe mata
Teuma ladam ureueng binoe
Jikheun meunoe aneuk dara

Dikee han le kutueng lakoe
Agam bisoe han ho kuba
Mata seupot ok ka puteh
Agam paleh hitam sukla

Han ho kuba agam paleh
Jaroe puteh supak raya
Jroh that rupa nyoepat teungku
Han tom kueu dilee nyang ka

Kulet puteh sang keululu
Glum meutabu peunoh dada
Allah Allah ma pangulee
Pakri lagee keu lon he ma

Cit han kutem masa dilee
Tabri keu kee agam buta
Inong tuha seuot pantah
Jikheun bagah meunoe haba

Bek kagundah buta lakoe
Kaeu jipuwoe gleueng suasa
Kaeu subang mata intan
Euncien tangan mata deulima

Gleueng di kaki meusarongan
Mata intan bak boh dada
Bek tagundah buta lakoe
'oh malam jiwoe hana reuda

Taloe keuieng mata intan
Jipeureugam peng rupia
Agam muda wahe nyak ti
Bak judi han ek tapubla

Han jikira keu inong jroh
Jipeuroh-roh watee seunja
Ija pinggangpi han ek bloe
Taeu phang-phoe bak angeeta

Keupeue katueng mate geucang
Katham u blang boh beude ba
Meuija han ek jippinggang
Mate geucang jak tham guda

Adakpi tari hana reunggang
Peng sigupang tan bicara
Bek katueng-tueng aneuk badan
Agam suang bek kahawa

Beuthat bit na lakoe carong
Kaeh mantong kauem ija
Bek katueng sigeukoh ulee
That phang-pheung kee akhe masa

Ban jideungo haba meunan
Seungap yoh nyan aneuk dara
Teuduek haba dilee siat
Lon riwayat ureueng teuka

Padum lawet teutap sinan
Marit yoh nyan meuntroe tuha
Ampon tuanku payong nanggroe
Taeu jaroe di jeumala

Kareuna lon ureueng surohan
Intat kireman keu meukuta
Nyoeapat surat tuanku droe
Bak po kamoe raja raya

Yoh nyan raja buka surat
Ka neulihat dalam dafta
Meuteumeung haba dalam surat
Geuyue intat muda beulia

Wajeb taintat wahe akhi
Lakoe cut ti putroe muda
Nyoekeu lakoe Meurak Asanah
Usman Basyah adek hamba

Wahe raja payong nanggroe
Adek kamoe bek tabri aja
Peue nyang hajat beu tapeutroh
Puteh leusoh banta muda

Dum talakee barat laot
Bek tatakot buet nyang sibeuna
Meuseujid nyang brok beu tapeugot
Tateumee rot le that fahla

Tatueng fahla bak Po tallah
Bek meuilah bak buet donya
Tadeungo he raja meutuah
Usman Basyah hukom gata

Peue nyang hajat jimeunapsu
Adoe teungku tausaha
Kareuna gata that meusyuehu
Barat timu dum jipuja

Abeh neukalon dum habaran
Hireuen yoh nyan raja raya
Meuntroe duapi ka seumbah
Bak khalifah raja muda

Ampon tuanku payong nanggroe
Idin kamoe po meukuta
Samlakoe cut tinggai sinoe
Dumna kamoe heundak gisa

Yoh nyan meuntroe leugat jiwoe
Samlakoe tinggai bak raja
Dumna rakyat abeh jiwoe
Ban sinaroe tuha muda

Teuduek dilee ureueng nyang woe
Cut samlakoe lom meugisa
Ureueng nanggroe bandum sinan
Jimoe yoh nyan tuha muda

Inong agam abeh jimoe
Miseue bagoe ureueng gila
Seubab jieu muda seudang
Ate leukang tuha muda

Teuduek 'oh nan dilee sita
Lon sambat muda beulia
Padum lawet teutap sinan
Cut Usman buka haba

Ampon tuanku meuribee katoe
Bek trep kamoe sinoe lama
Bek tuanku lama sinoe
Intat kamoe siklep mata

Poteu raja neukheun nyoeban
Adek badan bek tabungka
Lon peukawen gata sinoe
Pulang nanggroe dum keu gata

Takeurajeuen bak nanggroe nyoe
Bahle kamoe keu panglima
Samlakoe cut seut meunoe
Tuanku droe 'oh lon gisa

Lon jak siat han trep lon woe
Saweue putroe ngon aneukda
Beu roh untong uroe dudoe
Keunoe lon woe po meukuta

Poteu raja lon kheun nyoeban
Wahe intan bek meudawa
Bek tabungka adoe badan
Jeuoh jalan han troh safara

Meurak Asanah bek tatueng le
Han got pie tan seutia
Patot jiwoe tan jipeugah
Buetan salah silagoina

Sinoe gata lon peunikah
Putroe indah aneuk hamba
Samlakoe cut seut pantah
Ampon meu'ah po meukuta

Nyoe lon peugah nyang mustahak
Narit sikrak he sripada
Keudeh keunoe tan lon minat
Nyang lon ingat keu meukuta

Lon tuanku ureueng gareb
Lagi ubit hina-dina
Ulon ingat uroe dudoe
Tuanku droe bek ceureuca

Bek tuanku hilang pangkat
Nibak adatpi bek cupa
Nyang lon ingat po junjongan
Bek trep laman bak meukuta

Poteu raja yoh nyan neumoe
Sang neumanoe ro ie mata
Ka teupike lam ate droe
Nyo aneuk nyoe bit eelia

Nyo aneuk nyoe ureueng meusoe
'aeb bunyoe han jirela
Bahle jinoe kuyue intat
Ubak deelat raja raya

Yoh nyan raja neukrah rakyat
Meusapat tuha ngon muda
Raja suroh ubak meuntroe
Intat adoe bak ayahda

Beu troh tajak nanggroe Tasek
Sulotan Malek raja raya
Sakti utoh hekeumat tarek
Mee taculek lam-lam mata

Takheun saleuem keu junjongan
Nyoe kireman saboh taba
Meuntroe beudoh yoh masa nyan
Beurangkat dum deungon tantra

Rakyat jijak dum mupadoe
Jicre nanggroe teumpat raja
Sibuleuen jak jeuoh nanggroe
'oh nan sampoe jarak safara

Geujak intat cut samlakoe
Malam uroe geumeusafara
Umu sibuleuen lhee ploh uroe
Ka troh sampoe bak kuta raja

'oh sare troh u bineh nanggroe
Geubri sidroe ureueng tuha
Geujok saboh surat kireman
Wasiet peusan bek meutuka

Surat jime yoh masa nyan
Jiba rijang ubak raja
'oh sare troh u leuen meuligoe
Bujang jinoe buka haba

Ampon tuanku payong nanggroe
Taeu jaroe ateueh jeumala
Tren le sabda nyan di manyang
Ubak bujang tanyong raja

Wahe bujang takheun pantah
Cuba peugah peue na haba
Ampon tuanku doli halarat
Saboh surat ulon puba

Seumbah saleuem nibak deelat
Dalam surat sinan haba
Surat jijok ubak jaroe
Raja nanggroe yoh nyan buka

Neueu tuto dalam surat
Haba mangat dum srikaya
Seureuta horeumat deungan takdem
Lagi takrem keu meukuta

Wahe raja Sulotan Malek
Lon peujok adek hukom gata
Neuintatjih ubak putroe
Samlakoe muda beulia

Judo Putroe Meurak Asanah
Haliman Syah nama bapa
Abekh dumpueu ka jipeugah
Raja meutuah ate suka

Sabda raja ubak bujang
Teubiet u blang dumna gata
Jakleh tatueng keunoe rijang
Muda seudang meulintee raja

Lakoe Putroe Meurak Asanah
Ureueng meutuah lagi eelia
Teuma mentroe teubiet u blang
Jak tueng bintang baro teuka

'oh sare troh u bale keumang
Jijulang ngon jaroe dua
Ampon tuanku raja meutuah
Suroh titah bak meukuta

Neuyue tuanku keudeh langkah
Tamong leupah dalam kuta
Beu jinoe le sajan kamoe
Tuanku droe beu seureuta

Teuma beudoh uleebalang
Waki bujang ngon panglima
Yoh nyan troh bak bale keumang
Meutamon rakyat meulaksa

Seureuta ngon Usman Basyah
Keurusi indah saboh geuba
Geupeutamong laju leupah
Bak deelat syah raja raya

'oh sare troh bak babah pinto
Geupeulalo lam istana
Sang geuarak linto baro
Syam kasyum sye su biula

Rakyat tamong ulee-ili
Hana sakri le lagoina
Teubiet sireutoh tamong siribee
Ban lagee sidom seureungga

Dalam peunoh mideuen sarat
Rakyat le that troh meulaksa
Geusie keubeue muploh ribee
Geupeujamee muda beulia

Laen lumo kameng gasi
Han èk kheun kri boh had hingga
'oh seuleusoe lheueh khanduri
Laen lagi lon calitra

Teuma meuntroe deungon wadi
Ubak doli junjong sabda
Ampon tuanku po junjongan
Wasiet peuneusan bak aneukda

Haba laen tan lon peugah
Jeuet bedeu'ah surat ka na
Jinoe tuanku ulon kisah
Ngon ijadah po meukuta

Cut Usman tinggai sinoe
Dumna kamoe meujak gisa
Neubri idin tuanku droe
Kamoe muwoe bak meukuta

Han peue salah wahe meuntroe
Bak kamoe ateueh jeumala
Ngon mukjizat Nabi Muhammad
Beu seulamat dumna gata

Teuduek haba ureueng nyang woe
Po samlakoe lon calitra
Nyoe lon peugah Cut Usman
Teutap sinan sajan raja

Jinoe raja neuteumanyong
Bak cut bungong nyang jroh rupa
Wahe aneuk kheun beu keunong
Lon teumanyong sipatah haba

Jinoe takheun he meutuah
Meurak Asanah pakri rupa
Han tom dilee lon deungo gah
He meutuah sinoe hana

**Bek nyang lon eu meugahpi tân
Padum jameun nibak po ja
Bak uroe nyoe lon deungo gah
He cut indah peugah rupa**

**Pakri bangon kuluk badan
Deungon ruman tacalitra
Teuma seuot Cut Usman
Neubet rijang jaroe dua**

**Ampon tuanku payong nanggroe
Sifeuet putroe lon calitra
Di hadapan surat kalimah
Bandua blah banja dada**

**Jaroe uneun phon bismillah
Alhamdulillah blah kirinya
Lambong uneun a'uzubillah
Astagfirullah rot kirinya**

**Di beulakang lam jalalah
La ilaha illallah di keupala
Nibak idong nama Muhammad
Gigoe teusurat Allahu Akbar**

**Abeh bandum neupeugah ban
Raja yoh nyan asek keupala
Meuto bibi meucit babah
Allah Allah le neukata**

**Poteu raja hireuen dasyah
Aneuk nyoe sah bit eelia
Sabet beuna ban jipeugah
Waliyullah ureueng takwa**

**Poteu raja marit yoh nyan
Neupeugah ban ubak banta
Wahe aneuk cut boh ate
Han mupat le putroe muda**

Jeuoh that rot raueh han le
That meuseuke jalan safara
Jinoe aneuk bek le napsu
He teungku pat saleh donya

Usman deungo raja peugah
Peunoh limpah ngon ie mata
Allah he Po Ilahon Hak
Han troh lon jak bak judonya

Abeh umu lo di jalan
Wahe Tuhan tulong hamba
Tengah u langet teukui u bumoe
Meuteutaloe ngon ie mata

Ya Tuhanku tulong kamoe
Beu troh lon woe bak judonya
Deungon keuramat Meurak Asanah
Neubri mudah jalan hamba

He putroe cut bungon uroe
Untong lon nyoe lam seungsara
Pihak nanggroe hana mupat
Lon lam sisat rok-rok masa

Abeh sinanggroe bak sinanggroe
He putroe ho lon jak mita
Abeh sirumoh bak sirumoh
Buleuen peunoh ho lon mita

Hana sapat nyang na leumah
Meurak Asanah meugah hana
Ka neupoh droe muda seudang
Rasa hilang nyawong keulua

Raja kalon meunyum sayang
Allah he bintang that seungsara
Rajapi ka sosah ate
Leugat ile ngon ie mata

Wahe aneuk bek tamoe le
Lon cuba ci nyoe bicara
Samlakoe cut han le jimoe
Raja nanggroe peugah haba

Bek that gundah he boh ate
Baranggakri lon usaha
Kareuna jalan that meuseuke
Kadang mate ajai teuka

Tacre sinoe he bangsawan
Laot intan nyang that duka
Tajak rot darat hana jalan
Kapai tuan han kuasa

'oh jiteubiet cahya intan
Uroe keunong nibak mata
Mata seupot han jeuet le bleut
Kapai teusuet dudok sigra

Padum-padum ureueng mate
He boh ate hilang nyawa
Nyankeu aneuk nyang that sosah
Pakri tabah han jeuet bungka

Bitpi meunan he boh ate
Meuna bagi leupah gata
Meuek leupah laot intan
Nyankeu ensan nyang eelia

Baro tathee na Po tallah
He meutuah aneuk raja
Laot miseue laot teehid
Ingat bu bit he aneukda

Bek meureubot dalam ate
Rabbon Kade peutroh pinta
Jinoe aneuk lon meutanggoh
He po cut beh jeuet tabungka

Nibak thon nyoe he aneuk beh
Intan jeuoh jiplueng cahya
Bek antara laot tabloh
Di jeuoh ka buta mata

Keupeue guna he boh ate
Mata han le ka binasa
Baranggadum ubat taboh
Han le peungeuh silama-lama

Aneuk mata sret dum luroh
Han sakon roh tinggai rungka
Thon nyoe bandum intan beudoh
Ateueh kuboh hu meucahya

Jiplueng cahya hu mublak-blak
Lhee buleuen jak pasang guda
Bak thon teungoh intan ka sret
U pusat laot dum teurhanta

Nyankeu aneuk ka lon peugah
Bek le gundah he bentara
Usman deungo raja peugah
Gadoh sosah teuka suka

Teutap sinan Cut Usman
Kakeu seunang ate lam dada
Sajan raja neuduek dasyah
Masya Allah pujoe Rabbana

Samlakoe cut that bit saleh
Han tom neuweh bak musalla
Nyoe lon peugah ureueng nanggroe
Geunap uroe keunan teuka

Jijak kalon cut samlakoe
Bungong jaroe bandum jiba
Ladom me meuh ladom pirak
Ban nyang layak gasien kaya

Padum lawet teutap sinan
Le that meuteumeung dum areuta
Padum-padum meuh ngon pirak
Bak ureueng jak soe nyang teuka

Ureueng nanggroe ate mangat
Seubab jroh that jieu rupa
Padum putroe lakee meukawen
Hana neutem muda beulia

Di gop teulangke bak ureeng agam
Di putroe nyan droeji saja
Aneuk meuntroe seukalian
Bak Usman dumji teuka

Jijak lakee dum meukawen
Baek rajin jieu rupa
Hana sidroe nyang na neutem
Bak meukawen galak hana

Bak meukawen hana hiro
Lale ngon Po Tuhan Esa
Samlakoe cut hana hajat
Hana ingat le keu donya

Nyankeu ureueng manyang pangkat
Bak halarat Tuhan Esa
'oh troh tanggoh janji sampoe
Samlakoe tanyong bak raja

Ampon tuanku payong nanggroe
Pajan jinoe mee tabungka
Raja teuma peugah nyoeban
Aneuk badan preh kutika

Lom he aneuk lon hareutoe
Bek jeuet dudoe meulah teuka
Saboh nanggroe he budiman
Hana agam bandum dara

Raya panyang badan ban gle
Beuteh sabe bak u dara
Pakri tajak he boh ate
Cuba pike peue na laba

'oh jiteumeung jipoh mate
Baranggabe hana bela
Me'oh jithee ureueng agam
Uroe malam jijak mita

Nyankeu aneuk beu got tafam
Afai tajam eleumee mintra
Sinoe he nyak jeuet lon intat
Troh u darat gata fana

Meuhad mate gata jipoh
Hana saboh soe tueng bela
Nyankeu aneuk cuba pike
Bek weueh ate lon peuhaba

Nyang got aneuk bek le tajak
Putroe Meurak bek le meuhawa
Bek tuanku tatham kamoe
Beuthat sampoe nyawong hamba

Bahle mate nibak 'aeb
Bak lon ka sep han peue kira
Meuka mate ka lheueh adat
Nyang pangkat mantong sit raya

Le that nanggroe ka lon tinggai
Patot ajai jinoe fana
Raja peugah meunoe meudeh
Han jipateh ube seuma

Baranggadum raja peutakot
Hana kuyut banta muda
Meunyo meunan he samlakoe
Dalam peutoe lon troh gata

Keunoe talop dalam peutoe
Lon jok bak nanggroe raja angkara
Nama raja he puteh di
Nan geurasi Syarwan Indra

'oh troh gata dalam nanggroe
Barangasoe peugah haba
'oh jitanyong bek tapeugah
Nyak meutuah iem tasaba

Meugoh aneuk jimeusumpah
Bek tapeugah baranghaba
Meunyo jitem jimeusumpah
Nyan tapeugah peue nyang suka

Bek takheun-kheun haba putroe
Jikoh takue mata fana
'oh ka jikheun lafai sumpah
Jeuet tapeugah dumpeue haba

Wasiet lon nyoe he meuh mirah
Bek taubah banta muda
Abekh narit raja peugah
Usman Basyah han le haba

Gata lon boh dalam peutoe
Gunci bak droe he aneukda
Di lua peutoe lon boh surat
Lon peuleukap bak tutopnya

Dum makanan lon boh u dalam
'oh tamakeuen bek gop thee na
Poteu raja abekh wasiet
Yue peuteubiet peutoe raya

Samlakoe cut duek di dalam
Han soe tuban asoe ka na
Teuma raja kheun bak pawang
Beudoh rijang jak tabungka

Wahe pawang deungo kamoe
Peutoe nyoe lon jok bak gata
Taintat bak nanggroe Hairan
Nanggroe inong agam hana

Ureueng inong panglima prang
Miseue agam duëk lam kuta
Geunap uroe jak u peukan
Inong uram keu panglima

Abeh haba raja peusan
Peutoe yoh nyan leugat jiba
Jiba laju troh u laot
Jiboh lam bot sampan bahtra

Troh lam kapai cut bintang sret
Saoh jibet leugat bungka
Jipeulayeue beungoh seupot
Jibapot le angen raya

Tujoh uroe peulayaran
Troh tuan laot mutiara
'oh sare troh laot intan
Pawang yoh nyan pucat muka

Jieu akat meugeulumbang
Miyup manyang raya raya
Jibeudoh cot miseue gunung
Manyang lambong u antara

Tamse gunung nyang raya that
Muka pucat bandum rata
Teungku pawang mohon tulong
Han le untong bak keunira

Ngon keuramat panyot tanglong
Tuhan tulong hana mara
Po lem pawang peusak untong
Neujamprong laot Sikatra

Umu sibuleuen lam laot nyan
Troh bak jalan nyang seujahtra
Troh bak laot ie nyang seungap
Ate ka rab rakan dumna

Sangkira kon kutika jroh
Han le saboh ka beh fana
Riyueuk sumpom ureueng gadoh
Kapai reuloh ie laot ba

Padum-padum nyang ka dilee
Muploh ribee buta mata
Ureueng bandum gadoh euntee
Han meuteumee eungkot seuba

'oh troh kapai laot seunang
Kapai jiplueng miseue guda
Umu nam uroe peulayaran
Troh tuan bak nanggroe raja

Troh bak nanggroe raja inong
Leumah gunung hitam sukla
Seupot uroe troh bak malam
Tamong curam bak kualala

Troh u bineh kapai beusoe
Jicok peutoe sigra-sigra
Jipeuteungoh le u darat
Peuduek leugat di mieng kualala

Ka jikeubah ateueh pante
Jiplueng sare dum jiguda
Surot kapai lom u laot
Jiplueng ban buet hana ngon sa

Pawang kapai that mupot-pot
Jicarot nanggroe ceulaka
'oh troh tajak bak nanggroe nyoe
Tan meusidroo nyang seutia

Tajak goh troh taplueng dilee
Nanggroe asee that ceulaka
Nyang tan di gop na di sinoe
Ureueg binoe keu panglima

Nanggroe paleh hana adat
Bak jad majad han tom nyang ka
Teuduek 'oh nan dilee siat
Riwayat jinoe meugisa

Teubiet ureueg dalam nanggroe
Jeuep-jeuep sagoe jak mumita
Ladom u tunong ladom u baroh
Sare kiroh 'oh ka seunja

Ngon seunapang dum bak baho
Tadeungo 'a-'u kiam gubra
Ladom rakan jak u baroh
Hingga ka troh u kuala

Buleuen peungeuh hu seumeuloh
Leumah jeuoh jiplueng cahya
'oh ban jieu jimuplueng-plueng
Inong bajeueng kiroh raya

Peutoe teuduek miseue bateueng
Han le ureueg ka jibungka
'oh troh keunan jieu peutoe
Hana sidroe po areuta

Jimupakat sabe keudroe
Peutoe nyoe tame bak raja
Han tom dilee nyang ka puroe
Pane peutoe di kuala

Cuba buka wahe adoe
Peue na asoe di dalamnya
Teuma jikheun ladom rakan
Pakriban peutoe tabuka

Aneuk gunci hana sajan
Bah tuan taba bak raja
Bek tabuka dilee sinoe
Seubab peutoe jroh that rupa

Meutabuka peutoe sinoe
Dum geutanyoe teumeureuka
Taba dilee wahe adoe
Kadang soe-soe po areuta

Raja inong po nanggroe nyan
Geurasi nan Syarwan Indra
Keumah pike dumna rakyat
Jime leugat ubak raja

'oh sare troh jiba peutoe
Jibet jaroe dum peutua
Ampon tuanku payong nanggroe
Meuteumeung peutoe di kual

Saleh peue-peue na di dalam
Guncipi tan ngon tabuka
Poteu raja kalon peutoe
Tahe keudroe neuu rupa

Ban raja eu nibak tutop
Ngon ie daweu et geucap nama
Nyang jok meusoe surat meujan
Lam peutoe nyan muda beulia

Meunoe haba dalam surat
Saleuem horeumat keupadanya
Wahe raja ureueng binoe
Haba kamoe ubak gata

Nyoe na saboh ulon peusan
Badai haluan pulang pusaka
Ulon bri thee wahe tuan
Asoe di dalam bek binasa

Nyoe lon peugah haba tanggoe
Bungong jaroe lon bri keu gata
Wahe raja nyang meutuah
Usman Basyah pulang keu gata

Jih bek tapoh ngon tatipee
Bek meusitree lon ngon gata
Lom bek tadhoh ngon tapake
Beu jroh sabe siumu donya

Kareunajih aneuk kamoe
Lon bri jinoo hukom gata
Meunyo tapoh cut boh ate
Musoh sabe lon ngon gata

Phon jinoo kon hinga page
Cut boh ate lon cok bela
Laen nibak nyan tan bak kamoe
Tanyong bak droe wahe raja

Ban nyang jikheun bek tabantah
Beuna salah beu tabeda
Peue jilakee dum beu tabri
Bek meuungki jeuet keu dawa

Ulon jokjih teukeudi mate
Tadeungo he Syarwan Indra
Meunyo tapoh ngon tapake
Dudoe akhe malee mata

Jeuet keu musoh deungon kamoe
Uroe dudoe saboh masa
Kareunajih aneuk lam tuboh
Jijak jeuh sambat seutia

Tujoh laot jijeumeurang
Hajat datang sit bak gata
Cit han jeuet han tapeusayang
Peue nyang alang tulong sigra

Nyang jeuet paleh ureueng binoe
Jisangka droeji that raya
Jipeuhina baranggasoe
Tuhan sidroe han neurela

Wahe raja payong nanggroe
Aneuk kamoe bek tabri jra
'oh tabuka peutoe lon nyoe
Tahei meunoe wahe raja

Wahe aneuk Usman Basyah
Buka pantah bijeh mata
Bek tatakot baranggasoe
Na ulon nyoe sajan gata


Udep mate ateueh kamoe
He samlakoe han binasa
Adat gop poh aneuk lon tham
Bek tawaham han lon sangga

Abek haba dalam surat
Raja lihat jeuep-jeuep banja
Raja pike lam ate droe
Bek sinoe peutoe lon buka

Meulon buka di nap rakyat
Jipoh meuhad aneuk hamba
Meuri seubab aneuk agam
Sangka waham musoh teuka

Yoh nyan raja kheun bak rakyat
Tabet leugat dumna gata
Tajak jaga dalam nanggroe
Jeuep-jeuep sagoe tapareksa

Jeuep-jeuep gampong beu takeumisi
Patah rudi dumna gata
Pat na karu dalam nanggroe
Baranggasoe tapufana



Bek takeubah takoh-koh peuet
Kriban nyang jeuet takeurija
Jakleh teubiet bek le sinoe
Dum sinaroe takeulua

Bah lon sidroe tinggai nyoepat
Ulonpi that teungeut mata
Lon jak tido jinoe siat
Bek rame that dalam kuta

Rakyat teubiet dum sinaroe
Han le sidroe dalam kuta
Neutop pinto raja nanggroe
Samlakoe neumeuhei sigra

Ban nyang haba dalam surat
Dum amanat han meutuka
Wahe aneuk Usman Basyah
Teubiet pantah bijeh mata

Bek tatakot he meutuah
Ulon nyoe sah po ma gata
Syarwan meuhei dua lhee seun
Cut buleuen peutoe neubuka

Buka peutoe gunci di dalam
Teubiet yoh nyan bintang kala
Troh u lua mubri saleuem
Neueu ureueng sidroe hana

Cit meuraja sinan sidroe
Po samlakoe peumulia
Cut Usman seumbah gaki
Horeumat neubri le cut banta

Ampon-ampon he ma ampon
Jaroe lon seuon di jeumala
Ampon meu'ah ma jeunulang
Uleebalang po meukuta

Nyawong tuboh milek Tuhan
Lon sra' hadan ma bak gata
Nyawong badan milek Allah
Tatang karah di sripada

Ampon ampon he ma payong
Lon meulindong ma bak gata
Meuhan udep bahle mate
Baranggakri ulon rela

Beu le he ma gaseh sayang
Taniet dagang lon ban teuka
Taniet namiet lon seuneuboh
Soe me kawoh po meukuta

Geulantoe he ma tabloe namiet
Lon tameuniet hamba sahya
Adat mate han soe teuoh
Adat gadoh han soe mita

Adat tatiek dalam laot
Han soe po cut tuntut bela
Raja Syarwan kheun le yoh nyan
He budiman aneuk raja

Peugah aneuk ulon tanyong
Kheun beu keunong aneuk bak ma
Patbu gampong pane nanggroo
Samlakoe peueajak mita

Peugah rijang bungong keumbee
Bek tamalee marit ngon ma
Wahe aneuk batee ulee
Peue talakee lon jak mita

Samlakoe cut teuma seuot
Leumah-leumbot ngon sura
Narit cidah jroh mupatot
Seureuta sret ngon ie mata

Ulon he ma nanggroe jeuoh
Na lheueng tujoh laot raya
Ateueh ulee jaroe siploh
Wahe ma beh that seungsara

Suara leumoh miseue santan
Raja Syarwan ate suka
Ate mangat hana bagoe
Sang aneuk droe ban keulua

Syarwan neuue sang teumakot
Meusurot-surot bak meuhaba
Hana jeuet le bak neupeugah
Nyang na bobah meuie mata

Raja sosah hana sakri
Peukeu lon bri he bentara
Bek he aneuk teumakot gli
Bintang pari peugah bak ma

Raja Syarwan neumeusumpah
Aneuk tapeugah bek gli geunta
Tapeugah he aneuk bungong
Lon teumanyong bek sia-sia

Cuba peugah he boh ate
Bu meusampe tanyong po ma
Poteu raja lom meusumpah
Wallah billah le neukata

Hareuem tuboh nyawong darah
Han le ubah ban kheun gata
Meunyo lon poh he boh ate
Lon bu mate siklep mata

Bak lon duek nyoe bek minah le
Bek syok ate he bintara
Wahe aneuk bek syok ate
He boh ate han lon poh gata

Peue nyang napsu tameuharok
Ulun cok ngon siklep mata
Lam laot lon cok u darat
Peugah leugat bek meuriba

Raja Syarwan lom meusumpah
Usman Basyah peugah sigra
Jeuh gampong ma meutuah
Hajat langkah lon bak gata

Peue na hajat he meuh mirah
Cuba peugah ubak po ma
Ngon tulong Po insya Allah
Mudah-mudah ek lon peuna

Gata lon niet aneuk lam jasad
Cit siurat laen hana
Miseue josan surat ajimat
Sang malakat mutiara

Meunan bak lon he Usman
Aneuk badan bek syok sangka
Bak nyum rasa jantung ate
Bak lon mise aneuk mata

Jinoe aneuk kheun beu teupat
Peue nyang hajat ulon mita
Jipo u langet kupeugandoe
Jitren u bumoe kutheun cintra

Beuthat bak raja nyang mat nanggroe
Siribee katoe meuh kubawa
Meuhan jibri bahle kubloe
Silaksa katoe han kutaba

Meunyo hana jitem sayang
Bah kumuprang rakyat kuba
Taeu sigo ulon muprang
Raja-Syarwan bah jicuba

Wahe aneuk jantung ate
Bek tamoe le bijeh mata
Meunyo tamoe sabe-sabe
Sosah ate lon ngieng gata

Bek le gundah bungong keumang
Lon peutroh ban hajat gata
Usman deungo haba meunan
Peugah rijang pantah sigra

Ampon he ma payong nanggroe
Lon jak keunoe ma bak gata
Lon jak seutot tuan putroe
Patbu nanggroe teumpat he ma

Nama Putroe Meurak Asanah
Haliman Syah nama bapa
Gaseh sayang ma meutuah
Tapeuleupah bak judonya

Syarwan Indra tayong rijang
Putroe nyan pakriban rupa
Pakri rupa he bintang cut
Peugah sifeuet lon deungo nyata

Banta peugah bak ma seubot
Sifeuet po cut miseue nyang ka
Syarwan deungo banta peugah
Allah Allah le neukata

Keupeue jeuet lom he meutuah
Leupah sumpah lon ngon gata
Jinoe han le kutukri bah
That bit sosah bak lon kira

Bak rot tajak he boh ate
That meuseuke bijeh mata
Tan kuasa jalan lam gle
Gunong sabe raya raya

Kareueng tajam hana bagoe
Keunong asoe mate fana
Jeuep-jeuep gunong jiboh hekeumat
Gadoh iingat teupet mata

Peunyaket le jeuep simpang rot
Ureueng got-got jeuet keu cidra
Adatajak rot meulaot
Sangkot pawot le that bala

Kapai le that dum meusangkot
Laot seupot glap-gulita
Bitpi meunan he boh ate
Beukit mate ulon rela

That bit sosah 'oh lon pike
He boh ate aneuk raja
Troh bak laot nyang barollah
Nyanpi gundah hana tara

Bala le that han peue peugah
Angen bagah geulanteue raya
Padum bala bak malaikat
Sret di langet dalam hawa

Cicem le that meuribee bagoe
Jipujoe Tuhan Nyang Esa
'oh jan jikheun subhanallah
Geutanyoe reubah pangsan dumna

Allah he po nyak meutuah
Lon pabanbah ka troh masa
Han jeuet aneuk le lon ubah
Ka lheueh sumpah lon ngon gata

Raja Syarwan yoh nyan jimoe
Meuteutaloe ngon ie mata
Teuma marit cut samlakoe
Pakon neumoe wahe po ma

Nyang jeuet lon moe nyak meutuah
Laot barollah le that bala
Teuma di lon hana sosah
Insy Allah han binasa

Keu gata nyoe ulon takot
Silap lupot jeuet keu cidra
Meutan gata he meutuah
Sia payah ulon bungka

Teuma seuot Usman Basyah
Bek tagundah wahe po ma
Tuhan kaya lagi murah
Neubri mudah jalan safara

Teuduek 'oh nan dilee kisah
Nyoe lon peugah ureueng jaga
Adat jithee uleh rakyat
Jipoh leugat muda beulia

Kareuna seubab ureueng agam
Cit ka meunan suroh raja
Rakyat bandum hana jithee
Keunong tipee Syarwan Indra

Poteu raja neukheun nyoeban
Bak bangsawan banta muda
Wahe aneuk meuntroe intan
Lon peugah ban ubak gata

Jinoe aneuk ulon bri thee
Laen lagee taboh daya
Ngui pakaian miseue inong
Bek soe tanyong agam gata

Meunyo jithee gata agam
Meuhad karam jipoh fana
Cut Usman neukheun meunoe
Ma teungku droe ban nyang suka

Han peue salah ma junjongan
Meunyo buet nyan lon biasa
Yoh nyan raja bri salenan
Pakaian nyang indah rupa

Jipinggang plang sawak sungket
Jiek jahet bak ie muka
Bajee geutang jroh mupalet
Meuh meusingklet kasab Roma

Peusok ngon gleueng ikat subang
Dhoe mupatam meuh teuupa
Bungong sunteng ulee tujuh
Leugat neuboh di keupala

Euncien salen sok di jaroe
Jeuet bloe nanggroe siblah donya
Ayeuem sanggoi yum nam ribee
Keunong lagee meucлак mata

Soe nyang kalon mata ladat
Nyum jikap-kap soe eu rupa
'oh lheueh neungui dum pakaian
Neutren yoh nyan di istana

Tren u bumoe Raja Syarwan
Cut Usman sajan neuba
Teubiet laju jak u peukan
Seutot jalan ateueng raya

Watee neujak cut samlakoe
Rakyat sinaroe keunan mata
Jimeukheun-kheun dum sinaroe
Pane putroe sajan raja

Han tom kueue di kee adoe
Jeuep-jeuep nanggroe han sapat na
Raja di keue putroe di likot
Ban leuk meulot ngon cempala

Taeu jihak leumah-leumbot
Langkah jibet dum geujangka
Jitiek aleh linteueng-linto
Ulee baho ban leuek kua

Jipoh linggang han peue daleh
Jipoh aleh han peue kira
Taeu jihak jroh meulinggang
Sang reuloh blang nanggroee raja

Soe nyang kalon mata mandang
Mata subang jiplueng cahya
Dumna rakyat abeh wang-woe
Seubab putroe pungo gila

Rakyat le that teubiet u blang
Jihak pandang putroe muda
Taeu jidong dum mupadoe
Ubak putroe keunan mata

Jimeukheun-kheun dumna rakyat
Bukon jroh that han pat mita
Le that ureueng dum jipandang
Leugat jitham poteu raja

Panglima inong jikheun deelat
Neudong siat po meukuta
Seubab rakyat le that u blang
Jimeupandang putroe muda

Han tom taeu meunan macam
Tiwah mambang aneuk indra
Abek pungo uleebalang
Pioh rijang siklep mata

Rakyat barollah keunan mupadoe
Dong sinaroe di keu raja
Jitham bak ret han jibri jak
Ladom rusak buta mata

Bak meukong-kong jimeusak-sak
Mata rusak le nyang buta
Ladom ureueng reuloh idong
Putoh geulunyeng tan jikira

Teubiet darah dum ka ile
Di jih sabe keunan mata
Ile darah seutot badan
Cut Usman meunoe kata

He cutda cut po da intan
Peue bak badan ban keusumba
Lon eu mirah bandum badan
Le manisan nanggroe gata

Meunan neukheun Cut Usman
Teukhem yoh nyan Syarwan Indra
Wahe aneuk Cut usman
Bek takheun nyan putroe muda

Rakyat le that hana macam
Lon ka jitham di rot raya
Han jeuet jak le bungong puteh
Rakyat paleh pakri daya

Raja Syarwan neukheun meuceh
Minah keudeh dumna gata
Meunyo taeu putroe intan
Keudeh u peukan tajak gata

Han jeuet sinoe teungoh jalan
Surot bandum teungku raja
Neudong dilee deelat ampon
Galak that lon putroe muda

Neubri siat po junjongan
Putroe intan meucom meuwa
Beepi harom lon eu badan
Neubri rijang bungong jeumpa

Peue tapeugah nyang kon **tuto**
Haba bek le dumna gata
Meuhan neubri po junjongan
Bahle neucang kamoe dumna

Cut putroe nyoe han jeuet lon bri
Meuhad mate tacom tawa
Surot dilee aneuk teungku
Saja taeu dumna gata

Bah jipioh lhee peuet uroe
Seubab putroe baro teuka
Dalam kutaajak dudoe
Kubri beu troe dumna gata

Jinoe han jeuet dumteu sare
Meuhad mate putroe muda
Rakyat deungo haba meunan
Ka jiriwang dum jigisa

Yoh nyan raja mangat ate
'oh hana le rakyat that bha
Masa bunoe raja sosa
Takot meugah agam teuka

Jipoh mate han jeuet leumah
'ohi meusinggah keunan teuka
Yoh nyan raja leugat jalan
Ngon Usman aneuk dara

'oh sare troh dalam peukan
Raja yoh nyan duek cong geuta
Saboh geuta di yup asan
Gaki lapan meuh suasa

Jampang troh-troh raja keunan
Teumpat ureueng deelat raja
'oh troh keunan raja deelat
Duek bak teumpat ateueh geuta

Samlakoe cut peuduek sapat
Rakyat le that jieu rupa
Ban jikalon rupa jroh that
Jipeurab keunan bak raja

Ureuteng inong dum meusapat
Jijak deelat Syarwan Indra
Lheueh ngon raja mumat jaroe
Ubak putroe lom jigisa

Ka jimat muda samlakoe
Jicom bak dhoe ngon jiwa-wa
'oh ban jicom nibak talak
Bee keulumbak gahru ata

Rindu ate sangat galak
Pajan cut nyak keunoe teuka
Cut Usman seuot rijang
He da badan lon ban teuka

Lon meulayeue dalam awan
Lon jak sajan ngon syeedara
Kureueng ingat lon he bulan
Hana meujan siklep mata

Sret lon keunoe bak meulayang
Rab-rab hilang nyawong hamba
Abeh cre-bre angen tampoe
Sret lon keunoe troh bak gata

Abeh neupeugah dum sinaroe
Rakyat jimoe ro ie mata
Bandum gundah soe nyang deungo
Rakyat pungo bansineuna

Lom jitanyong bak Syarwan
Pane intan keunoe teuka
Wahe deelat raja nanggroe
Cut putroe nyoe peue karonya

Pat meuteumeung ngon tuanku
Han tom lon eu dilee nyang ka
Jroh that rupa bak lon lihat
Hana sapat meunan nyang sa

Dumna putroe lam nanggroe nyoe
Tan meusidroeu meunan nyang sa
Ulah bangon budiadari
Sang putroe ti lam syeuruga

Meunyo hamba lam donya nyoe
Hana sidroe aneuk raja
Nyang meugah jroh Meurak Asanah
Ngon cut indah han sit ek sa

Han ek sabe ngon putroe nyoe
Beuthat Putroe Meurak muda
Laen bandum hana sapat
Timu barat aneuk raja

Teuma seuot raja deelat
Kheun bak rakyat meunoe haba
Nyang lon teumeung sinoe baroe
Lon jak sidroe hana gata

Ka teukeudi nibak Tuhan
Roh meuteumeung deungon hamba
Bit meuuntong he tuanku
Putroe bungsu elok rupa

Jinoe tuanku bek le jarak
Bek tabri jak le sideupa
Saket mangat beuthat sajan
Dara agam kamoe rela

Dali sifeuet ureueng inong
Han peue tanyong ate suka
Adat agam kamoe galak
Bek tabri jak kamoe rela

Wahe deelat raja nanggroe
Duek ngon putroe lam istana
Mangat ate dumna kamoe
Jampang meuwoe meueu rupa

Raja Syarwan seuot leugat
Ban nyang pakat nibak gata
Di lonpi that galak ate
Han lon bri cre le sideupa

Seungap haba rotdeh rotnoe
Raja nanggroe beudoh gisa
Teuma raja laju neuwoe
Cut samlakoe sajan neuba

'oh sare troh u meuligoe
Teuduek keudroe lam istana
Cut Usman bungong meurak
Han tom jarak meusideupa

Han tom jarak meusipade
Hana tom cre siklep mata
'oh troh rakyat keunan tamong
Cut bungong rupa ka dara

'oh tan rakyat leupah jiwoe
Po samlakoe muwoe rupa
Meunan sabe banta seudang
Siat agam siat dara

Dum dendayang lam meuligoe
Jisom bunyoe suroh raja
Watee neuh Cut Usman
Dum dendayang kawai lingka

Dendayang dum khadam sajan
Raja Syarwan suroh dumna
Meunan sabe uroe malam
Cut Usman dalam kuta

Limong buleuen teutap sinan
Cut Usman sajan raja
Bak siuroe bungong mirah
Cut meutuah marit ngon ma

Wahe ma po ma meutuah
Pajan leupah intat hamba
Toh bicara keu lon jinoe
Bek trep lon nyoe hana laba

Bek le he ma lon di sinoe
Jeuet keu rugoe he meukuta
Raja Syarwan seuot pantah
Insyallah po bentara

Jinoe nyang got he boh ate
Bek tajak le bungong jeumpa
Tadong aneuk sajan kamoe
Peukong nanggroe uleh gata

Takeurajeuen bak nanggroe nyoe
Bahle kamoe keu panglima
Lon bri putroe tainse bintang
Rupa na ban Syamsu Kama

Rupa indah hana sakri
Tiwah hari ban keulua
Leubeh nibak Putroe Meurak
Bek le tajak nanggroe Indar

Bek tatueng le Putroe Meurak
Badan apak jih ka tuha
Sidroe putroe lam nanggroe nyoe
Hana bagoe ngon tapeusa

Bek tajak le po samlakoe
Bah nanggroe nyoe gata raja
Cut Usman seuot rijang
Neubet tangan u jeumala

Ampon he ma payong nanggroe
Watee lon woe ban nyang suka
Saboh siploh bak lon tuan
Lon jeunulang ateueh keupala

Bak tuanku neutem sayang
Ulun dagang mate rimba
Meuna umu neubri panyang
'oh lon riwang po meukuta

Bahle lon jak siat dilee
Lon jak puteuntee ngon aneukda
Yoh nyan raja teuduek tahe
Neudeungo tuto banta muda

Sang jitamong troh bak ate
Hana jeuet le neuboh dawa
Han peue salah he boh ate
Lon peuase jinoe bungka

Lon hei rakyat dum kupangge
Nyang tem mate sajan gata
Nyang jeuet jipo dalam awan
Nyang han pangsang 'oh na bala

Lon ba rakyat lapan ribee
Nyang meuteuntee keu ngon gata
Lon takot that aneuk pangulee
Gata layee 'oh troh bala

Hana soe cok gata mate
Lon takot cre lam laot bha
Limong uroe lon meutanggo
Puteh leusoh iem tasaba

Cut Usman seuot pantah
Insya Allah po meukuta
Troh bak tangoh Raja Syarwan
Bungka yoh nyan poteu raja

V. SYARWAN INDRA BANTU USMAN BASYAH

Raja bungka kon rot dara
Hana meuhad deungon bahtra
Jiduek ateueh kandran sakti
That bit 'ali Syarwan Indra

Hekeumat le that hana sakri
Duck lam sunyi trep jitapa
Jitren angen nyang saktian
Bapo yoh nyan tantra raja

Jiteureubang dalam awan
Seukalian babtantra
Umu sibukeuen jiteureubang
Leumah meureuntang Pulo Bala

'oh sare troh bak pulo nyan
Phon di sinan baro bala
Rupa cicem sinan le that
Malaikat po karonya

Cicem jidong di cong kayee
Le that lagee ngon suara
Ucap teuseubeh pujoe Tuhan
Hana lawan that bit eela

Suara geulanteue jiteumeutak
Sang ka pipak di keupala
Adat tadeungo le geutanyoe
Hanco asoe jeuet keu sira

'oh sare troh bak pulo nyan
Cut Usman neubri haba
Wahe aneuk Usman Basyah
He meutuah bek gli geunta

Beu kreueh ate beu kong ingat
Keu halarat bek talupa
Meunyo aneuk kureueng ingat

Jadeh meuhad jeuet binasa

Raja Syarwan tamong lam pulo
Ngon aneuk po banta muda
Troh u dalam bungong meulu
Neudeungo su miseue nyang ka

Neudeungo su sang geulanteue
Kilat soseue ban seulingka
Samlakoe cut sang ka mumang
Ingat rijang ban kheun raja

Wahe aneuk Cut Usman
Beu kong iman bek meutuka
Samlakoe cut ka bantangan
Rasa hilang han le nyawa

Reubah laju sinan pangsang
Raja Syarwan drop neuhila
Angen sakti teungoh jijak
Jihayak meugisa donya

Adat meukon rijang neudrop
Ka meulungkop lam laot raya
Sakti yoh nyanpi jikarat
Jilumpat ka lheueh u lua

Hingga troh bak teupnat mangat
Ka teuingat po jroh rupa
Ka teuingat po samlakoe
Neupujoe Tuhan Nyang Esa

Wahe Allah Po lon Tuhan
Neubri jalan nyang seujahtra
Beu troh ulon bak cut intan
Jeuh jalan ka lon bungka

Raja Syarwan lom beurangkat
Sakti leugat po lam hawa
Hingga troh bak saboh teupnat
Leumah bakat puteh safa

Nyoe baro troh laot timah
Leumah puteh safan-safa
Troh u laot ie nyang puteh
Pulo meujeh di teungohnya

Le that sinan malaikat
Pujoe halarat Tuhan Nyang Esa
Suara troh siuroe jak
Rasa utak dum teupanca

Syarwan neukheun bak Usman
Ingat bek han he aneukda
Beu kong ingat he boh ate
Bek meugule miseue nyang ka

Cut Usman seuot pantah
Insya Allah Tuhan Peulara
Troh u dalam bak pulo nyan
Miseue labang lam teulinga

Rasa badan abeh hanco
Sang teupeuro jeuep angeeta
Samlakoe cut ka mubalek
Syarwan tarek neudrop neuwa

Hana jan troh neumat badan
Beukah meukhan ka jeuet dua
Jimoe rakyat dum sinaroe
Seubab paloe muda beulia

Allah he po cut po samlakoe
Tinggai kamoe han le gata
Jimoe bae dum jipoh droe-
Cula-caloe rakyat dumna

Syarwan neukheun bek that gundah
Poteu Allah that kuasa
Meudum nyang tan ek neupeujeuet
Yoh di riyeuet asai mula

Nyoe nyang ka na tuboh ka jeuet
Siploh lipat ek neupeuna
Yoh masa nyan teuma rakyat
Jipeusapat asoe nyang na

Badan hanco abeh cre-bre
Jantong ate ka u lua
Beudoh raja yoh nyan neujak
Neusudoh neuboh lam ija

Raja Syarwan beuet hekeumat
Bak halarat neulakee do'a
Neucok asoe dum neupeukap
Na sikeujap ka meurupa

Samlakoe cut teueh teupat
Hana ingat le keu donya
Angen saktipi jikarat
Jilumpat ka lheueh u lua

Troh bak laot beuladeh pulo
Dum meusaho bak cut banta
'oh troh keunan bak Usman
Dumna rakan lakee do'a

Geubeuet do'a **bandum sunggoh**
Udep tuboh **muda beulia**
Usman **beudoh bak beuradu**
Nyoekeu **baro ingat teuka**

Kakeu puléh nibak pangsán
Lom beurjalan miseue nyang ka
Geujak laju hana pioh
Hingga troh bak laen rupa

Troh bak laot nyang raya that
Nyanpi arat seulagoína
Leubéh nibak nyang ka dilee
Laen lagee he syeedara

'oh troh keunan dumna rakyat
Malaikat deumpek sigra
Seubab leumah neuueu ensan
Sang ka tan umu donya

Neukheun han le umu nanggroe
Neukliek teungku 'oh meutaga
Sangkira lheueh bumoe meuhapit
Teugeutit muda beulia

Syarwan peucrok le di likot
That mupot-pot hana tara
Wahe aneuk cut boh ate
Saleh han le lon eu rupa

Samlakoe cut ka meugule
Syarwan troh le neumat sigra
Badan hanco jeuet keu kuboh
Abeh tijoh asoe dumna

'oh ban neuueu jeuet keu kuboh
Neucok saboh teumpat neuba
Neucok teumpat bak hakikat
Neupeusapat lam ie raya

'oh meusapat lam kuboh nyan
Hana sapeue le mumara
Syarwan neukheun bak Usman
He budiman bijeh mata

Lon peupuleh he boh ate
Bu meusampe lon usaha
Syarwan neukheun ngon bismillah
Alhamdulillah nyang keudua

Raja Syarwan teuma rajah
Dua lhee patah neubeuet do'a
Cut Usman muwoe ban sot
Tuboh ka got hana cidra

Kakeu puleh nibak mate
Neubeudoh le miseue nyang ka
Ka neudong le di hadapan
Neukheun nyoeban ubak raja

Wahe ma po ma teungku droe
Laen bagoe na lom bahya
Raja Syarwan seuot rijang
Aneuk badan sapat trek na

Laot sidom goh troh jalan
Bak teumpat nyanpi na bala
Sakti jipo dalam awan
Rab troh tuan laot raya

Hingga troh bak saboh laot
Neueu seumut ube rusa
Ucap teuseubeh dum keu Tuhan
Baranggajan han tom lupa

Sidom jidong ateueh batee
Uneun ngon wie kalon mata
Jikalon ie tabeue masen
Jiek jitren jaga jaga

'oh sare troh bak pulo nyan
Jikheun nyoeban Syarwan Indra
Wahe kawom beu mupakat
Sigo talumpat bandum rata

Meukon meunan han ek leupah
Tuleueng patah 'oh meusua
Teuma jigrop bandum rakan
Leupah jalan lheueh u lua

Abek jigrop bandum rakan
Tinggai sinan banta muda
Sinan teutiek han le ingat
Abek teusuet aneuk mata

Syarwan kalon tan Usman
Tanyong yoh nyan patah sigra
Ho aneuk lon wahe da po
Bunoe lon eu sajan gata

Tanyong keudeh tanyong keunoe
Po samlakoe han meuho ka
Masa bunoe Cut Usman
Lam laot nyan ka sret banta

Tan soe tupeue sret lam laot
Samlakoe cut sayang raya
Nyoe lon peugah sret lam laot
Sidom sambot pantah sigra

Adat meukon sidom sambot
Ka lam laot mate fana
Leumah jieu nibak talak
Hu mubhak-bhak sang purnama

Raja sidom baplueng laju
Seubab jieu jroh that rupa
Syarwan beudoh jigrop jiteugom
Jipeucrok sidom teungoh beurjalan

Jimeung jak som lam keuleumbu
Po cut teungku mita keunan
Syarwan tanyong ubak sidom
Hoka tasom aneuk laman

Teuma sidom meungucap syuko
Rabbon Gafo pujoe Tuhan
Lompi jikheun teuma meunoe
Pane keunoe teuka ensan

Han jeuet ensan jijak keunoe
Nyang lon me nyoe wali Tuhan
Kon di gata nyang lon me nyoe
Rakan kamoe di gata tan

Adat meunyo gata jroh-jroh
Hana taboh lam beurjalan
Hana di gop na di gata
Manusià tatiek tabuang

Gaseh sayang keu Usman
Seubab gob nyan wali Tuhan
Lom Syarwan jikheun meunoe
Deungo kamoe wahe teelan

Kon meugatapi ri wali
Lonpi sabe nibak Tuhan
Hana sidroe kureueng leubeh
Han peue daleh bak timbangan

Sidompi han jitem talo
Kiam 'a-'u beurdawaan
Raja Sayrwan that amarah
Muka mirah ban meunisan

Meuhan kapulang bak uroe nyoe
Hanco nanggroë kupeukaram
Laotpi tho gata mate
Nyang got bak le kameuayang

Meuhan pulang bintang pareh
Kupeuabeh kah dum simpan
Kah dum sinoe kameung tham kee
Hana kathee Raja Syarwan

Nyang got pulang rijang keunoe
Bek trep kamoe lam beurjalan
Dum kah sidom tan kuthee na
Dumna raja abeh simpan

Kah dum sinoe keumeung gila
Hana mata kakalon trang
Laen bandum abeh jithee
Meunyo ngon kee ka jipantang

Raja Syarwan beungeh raya
Deumpek sigra leungo alam
Nanggroe seupot sikutika
Laot raya that meuguncang

Meuhubo-hubo tamse geumpa
Ie laot jipo dalam awan
Uroe tan le seupot raya
Bumoe donya sang ka karam

Dumna sidom yo angeeta
Bak jisangka nanggroe ka lham
Dumna sidom abeh phang-phoe
Jipeugah droe ubak Tuhan

Wahe Tuhan Po Nyang Esa
That angkara Raja Syarwan
Cut Usman waliyullah
Adat jipeugah han kupulang

Suroh Tuhan ubak wali
Neuyue jak bri hukom rijang
Suroh Tuhan troh le keunan
Bak ureueng nyan beurdawaan

Wahe sidom deungo kamoe
Lon kheun jinoo firman Tuhan
Bek mupake gata jinoo
Ureueng jak nyoe ate seunang

Jijak intat cut samlakoe
Keu putroe nyang gaseh Tuhan
Cut Usman tabri rahmat
Beu na nekmata kon salahan

Seubab gata ucap teuseubeh
Lafai saheh kitab Quruan
Ngon seubab nyan Usman tinggai
Gadoh akai dalam badan

Teuma sidom bri peunuleh
Beudoh bek ek cut bangsawan
Neuduek sapat deungon wali
Eleumee neubri teuma yoh nyan

Sampoh ulee rahop muka
Cahya mata meutamah trang
Teuma wali kheun bak raja
Beudoh lanja tabeurjalan

Bek trep di rot tajak laju
Intat teungku bak cut intan
Raja Syarwan lom beurangkat
Sajan rakyat seukalian

Troh bak gunong teungoh laot
Sangkot pawot bak beurjalan
'oh sare troh bak pulo nyan
Pioh sinan dumna kawan

Malaikat teudong sinan
Yoh masa nyan pujoe Tuhan
Syarwan kheun bak Cut Usman
Ingat bek han aneuk badan

Ingat beu kong bungong pade
He boh ate cahya intan
Bek tatakot barangapeue
Cit hana peue tulong Tuhan

Malaikat ucap istigfa
Su meutaga hana macam
Tadeungo su that meugrang-grang
Bungong keumang reubah pangsang

Ka reubah mubalek-balek
Syarwan tarek neucok pulang
Neucok pantah neuplueng laju
Han jan taeu dum boh sungkam

Hingga troh bak pulo saboh
Kayee timoh cut ngon seudang
Bohpi damoh muda masak
Cok le si nyak saboh karang

Jipajoh le po samlakoe
Mameh asoe sang meunisan
Raja Syarwan bungka laju
Troh teungku Pulo Seumbilan

Sinan limong droe malaikat
Rupa hebat hana lawan
Ucap teuseubeh maseng-maseng
Dong meujandreng jroh meurumpan

Teuma nyang sidroe malaikat
Rupa jroh that miseue ensan
Suara mangat hana tara
Ate suka soe deungoran

Ya Tuhanku Po lon Ahad
Neubri rahmat dum keu ensan
Nyang sidroe treuk wahe po lem
Miseue cicem keulakuan

Cicem nyanpi pujoe Rabbi
Hana khali baranggajan
Ya Tuhanku rahmat neubri
Hamba ini nyang beurjalan

Nyang saboh treuk rupa laen
Miseue po lem lumo agam
Han tom siatpi na tuwo
Seulaweuet keu Po baranggajan

Ya Tuhanku neubri rahmat
Keu umat nyang ateuh jalan
Dum binatang nyang peuet gaki
Rakmat neubri seukalian

Rupa uleue saboh bagoe
Neukheun meunoe baranggajan
Ya Tuhanku rahmat limpah
Droeneu murah lom ngon sayang

Nyang jak ngon pruet ateuch bumoe
Do'a kamoe wahe Tuhan
Nyang sidroe treuk rupa ikan
Meunoe neukheun baranggajan

Ya Tuhanku neubri rahmat
Laot darat bandua si
Nyang jak lam ie jibeurjalan
He Tuhan neubri redeuki

Syarwan deungo nyan suara
Su meutaga hanqo bumi
Ka neulalo troh bak pulo
Ingat he po bek beureunti

Ingat he nyak jantong ate
Bala akhe abeh suci
Nyoe saboh treuk bala akhe
Laen tan le seukali-kali

'oh abeh nyoe he samlakoe
Troh bak nanggroee tuan siti
Troh bak nanggroee Meurak Asanah
Haliman Syah nama abi

Nyankeu aneuk beu kong ingat
Lakee rahmat nibak Rabbi
'oh sare troh bak teupat nyan
Cut Usman sang-sang ka gli

Ban neudeungo su meuree-ree
Akai padee hilang budi
Sang meugum-gum sang meugup-gup
Raja ngon cut hana sakri

Cut Usman sret lam laot
Syarwan sambot plueng jilari
Leupah sinan bri peunuleh
Beudoh bak eh cut juhari

Ka neuduek le meuhadapan
Raja Syarwan neutanyong le
Wahe aneuk pane tawoe
Samlakoe pane peureugi

Wahe po ma ma junjongan
Karonya Tuhan Poku Rabbi
'oh troh he ma dalam seupot
Ulon hanyot han lon tukri

Roh lon he ma dalam rahmat
Hana ingat donya ini
'oh fana lon bak beurjalan
He ma badan troh bak Rabbi

Ka troh lon woe bak hakikat
Buet halarat han soe tukri
Hana sidroe na troh akai
Nibak asai Poku Rabbi

Abeh nyata nyang tan leumah
Ma meutuah lon kalon kri
Raja Syarwan deungo meunan
Hireuen yoh nyan teupak bibi

Raja Syarwan gaseh meutamah
Keu cut indah nyang juhari
Cut Usman neukheun nyoeban
He ma badan jinoo pakri

Udeh he ma bek le lintang
Tajak rijang bek le lanti
Teuma beudoh dumna rakyat
Jak meusapat bungka lagi

Geujak laju pantah leugat
Troh bak teumput putroe siti
Usman troh bak nanggroe uwak
Hana jarak ngon teumput ini

Troh bak nanggroe Meurak Asanah
Banda luah hana sakri
Syarwan neukheun bak samlakoe
Nyoekeu nanggroe cut nyak siti

Nyoekeu nanggroe Meurah Asanah
He meutuah ka teurjali
Samlakoe cut yoh nyan tahe
Meungucap syuko pujoe Rabbi


Neueu nanggroe jroh that baro
Rakyatpi le hana sakri
Cut Usman suka galak
Nyum bek jarak banta ahli

Siribee nanggroe nyang ka lon jak
Tan meurumpak bagoe ini
Geupeudong keude taloe jalan
Kiri kanan jroh meuriti

Taeu geudong baro baro
Geulabo ngon cawareudi
Rakyat le that nanggroe aman
Syah Haliman nyang mufeuti

Kuta kong that hana macam
Luah dalam siuroe lari
Lapeh nyang phon kuta keumaga
Nyang keudua pirak meuseundi

Lapeh nyang lhee labo ie meuh
Cahya peungeuh sang-sang hari
Dalam kuta lom meuligoe
Teumput putroe deungon doli



Aneuk tujoh laen teumpat
Meuhad meuhad dumna bagi
Teutapi jih goh na lakoe
Bantujoh droe tan suami

Han jeuet jiek baranggasoe
Raja nanggroe meuntroe wadi
Seubab raja raya meurtabat
Han jeuet jimat cut putroe ti

Teuduek 'oh nan dilee siat
Lon riwayat laen lagi
Raja Syarwan neukheun meunoe
Bak samlakoe bintang pari

Wahe aneuk jak udeh woe
Ubak putroe nyang juhari
Jak kuintat he samlakoe
Ka sampoe hajat Tuhan bri

'oh troh gata u meuligoe
Lon heundak woe bek trep lanti
Cut Usman seuot pantah
Ma meutuah lon peugah kri

Han jeuet he ma lon woe dilee
Bek meuthee ubak cutda ti
Kareuna gop nyan goh na lakoe
Bannam droe hana suami

'oh meuthee lon lakoe adoe
Geupoh dudoe he ma pakri
Bah lon preh dua lhee uroe
Bah lon iem droe lon seumbunyi

Mantong jitueng lon le putroe
Kadangpi roe han le asi
Lon kalon hai raja nanggroe
Kadang putroe han le rali

Raja Syarwan seuot rijang
Aneuk badan lon peugah kri
Meuhan jitueng gata intan
Prang kulawan raja ini

Kusrom kuta dalam awan
Tulong Tuhan Poku Rabbi
Rakyat kuboh dalam laot
Bahle eungkot pajoh khanduri

Bek that gundah he samlakoe
Kuboh taloe raja 'asi
Mangat jituri Raja Syarwan
Aneuk tuan Raja Ade

Nyoekeu aneuk raja angkara
Bah jicuba mangat meuri
Bah kupuwoe u meuligoe
He samlakoe bek saba le

Bek tapreh le bungong keumbee
Untong na kee he boh ate
Meuraja nyan han kuthee na
Beudoh lanja bungong pade

Takalon buet Raja Syarwan
Kupeukaram nanggroe ngon gle
Han kupeutroh sikhian uroe
Po samlakoe bek gli ate

Sia-sia kujak intat
Meugoh sapat ngon putroe ti
Bek le aneuk tameutanggoh
Kuba beu troh bungong giri

Gohlom seunang ate kamoe
Meugoh tawoe ubak cut ti
Meuhan jitueng bungong karang
Han kuriwang le keumbali

Cut Usman neubet tangan
Bek buet meunan wahe umi
Hana neuyue di Po tallah
Ma meutuah bek meunan hi

Bahle ulon turot dilee
Lon eu lagee raja neugri
Allah Allah bungong geutoe
Ban kheun kamoe han tatem ti

Meunyo meunan he samlakoe
Lon kujak woe idin tabri
Meuna sosah uroe dudoe
Pangge kamoe cut puteh di

Meunoe takheun he samlakoe
Tulong lon nyoe wahe ma ti
Wahe ma po lon sosah that
Beu troh siat tapeureugi

Lon deungo le ngon geulunyueng
Lon timpeueng laot hayati
Troh le aneuk deungon siat
Hana lambat dua hari

Bitpi taeu trep lam laot
Sangkot pawot he boh ate
Meunyo lon jak ngon rakan droe
Troh siuroe Po tallah bri

Cut Usman seuot pantah
Insy Allah wahe doli
Raja Syarwanpi beudoh le
Jipangge angen yang sakti

Ka jibapo dalam hawa
Sajan tantra dum peureugi
Sikhan uroe jiteureubang
Ka troh peujam uabak neugri

Keunong pasa uroe reumbang
Raja Syarwan tan trep lanti
Cut Usman tinggai sidroe
Samlakoe pulang peureugi

Neueu rakya rame tuloe
Ureung nanggroe ulee-ili
Ka teupike lam ate droe
Pakri lon woe bak putroe ti

Kadang putroe han le hajat
Seubab trep that lon keumbali
Teuma leumah dalam dada
Bah lon saba siat lanti

Lon eu laku putroe muda
Na lom rela keu suami
Ngui pakaian po samlakoe
Miseue bagoe ureueng faki

Neucok tungkat ngon geunandoe
Neupeutoe bak rumoh po Ni
Nyankeu sidroe ureueng tuha
Umu lama trep ka lawi

Ok ka puteh nyan di ulee
Eunceck Ajee nan geurasi
Lhee ploh raja ka neupandang
Eunceck suang mantong tari

Mantong galakneu keu lakoe
Han thee keudroe ka krot bibi
Rumoh sinan di lampoh soh
Laen saboh tan di sini

Samlakoe cut neujak leugat
Ngon tungkat awih di kiri
'oh sare troh u leuen rumoh
Neumeuuroh hoka po Ni

Soe di rumoh ma meutuah
Peue na mudah keu lon neut i
Ban neukalon uleh maja
Neueu rupa jroh han sakri

Teutapi na bacut salah
Kupiah mirah bajee guni
Adat teungku na pakaian
Cahyaji ban matahari

Po Ni meuhei dong di ramba
Neuek leugat teungku faki
'oh sare troh u seuramoe
Ni sambinoe ranup neubri

Jinoe po Ni neuteumanyong
He bungong saleh pat neugri
Patbu gampong pane nanggrae
Namateu soe nan geurasi

Samlakoe but seuot nyoban
Deungo lon tuan wahe ma Ni
Nama ulon Usman Basyah
Nanggroe di Makah teumpa' umi

Hajat ulon he ma keunoe
Seutot Putroe Meurak siti
Deungon si nyak bandua droe
He ma putroe pat beureunti

Neuseuot le Euncek Ajee
He pangulee bek tasudi
Meunyo judo Meurak Asanah
Han jueut leumah seukali-kali

Geupoh mate uleh raja
Seubab cutda goh na laki
Nyankeu seubab he pangulee
Saba dilee taseumbunyi

Dudoe dudoe jeuet tapeuthee
Taeu lagee putroe siti
Meuka jitueng dilee bak droe
Raja nangroe han neutukri

Jinoe aneuk jakle teubiet
U meuseujid teumpat kali
Beungoh seupot keunoe tawoe
Di sinoe taguen khanduri

Tameuniet lon po ma seubot
He aneuk cut peue na lon bri
'oh neudeungo haba meunan
Beudoh yoh nyan bintang pari

Ka neujak le u meunasah
Seumbah Syiah horeumat neubri
Neutanyong le Teungku Syiah
Pane langkah cut juhari

Ho tameung jak he aneuk cut
Peue meukeusud nibak kami
Patbu gampong pane nangroe
Han tom keunoe lon kalon hi

Banta seuot yoh nyan teuma
He syekhuna payong kami
Gampong nangroe lon that jeuh
Na lheueng tujoh nangroe ini

Hajat ulon heundak jak beuet
Lon meununtut ubak syekhi
Meunyo meunan he aneuk cut
Sinoe tabeuet sajan kami

Han peue salah he syekhuna
Ban nyang suka ulon rali
Yoh nyang teungku kheun bismillah
Alhamdulillah lafai puji

Samlakoe cut tarek ayat
Suara mangat hana sakri
Miseue bangsi suleng gambang
Siulah sang dap napiri

Teungku tahe akai wang-woe
Teukap jaroe hilang budi
Cut Usman Quruan neubeuet
Deungo po cut lon peugah kri

'oh ban neukheun saboh ayat
Dumna rakyat that beureuhi
Taeu jiplueng dalam jurong
Agam inong jak kalon kri

Jideungo su Cut Usman
Suara ban suleng bangsi
Teuma meuthee jeuep meunasah
Sidroe Syiah that bit 'ali

Neubeuet kari utoh leupah
Paseh lidah hana sakri
Teuka ureueng jeuep-jeuep sagoe
Peurdana meuntroe bujang kali

Jijak laju u meuseujid
'oh jieu bit nyo seukali
Bak malam hana teudoh
Usman sungoh neubeuet kari

Agam inong abeh teuka
Miseue rimba dong meuriti
Na sikeujap seupot uroe
Samlakoe woe ubak po Ni

Troh u rumoh samlakoe jroh
Po Ni beudoh bet khanduri
Lheueh bu buleuen peunoh
Eh di rumoh malam hari

Yoh nyan rakyat abeh kiroh
Tadeungo rioh jeuep-jeuep seugi
Hoka ureueng nyang beuet bunoe
Han le sinoe he ya akhi

Cuba kalon bak teumpat toh
Bek teuboh lon me khanduri
Abeh jieuep-jeuep teumpat
Jimita pat nyang beuet kari

Teuma jikheun ubak rakan
Salhe kop nyan nyobit wali
Jikalee kon waliyullah
Han leupah keunoe seukali

Teuduek haba dilee siat
Lon riwayat haba cut ti
Putroe tujuh jak bak Ajee
Jikalon jamee datang keumari

Abeh jijak bantujuh droe
Geujak eu soe mangat meuri
Troh bak Ajee mumat jaroe
Sideh sinoe bungkoh geubri

Ajee tanyong bak Usman
Aneuk badan toh esteuri
Cut Usman neukheun meunoe
Peurumoh kamoe wahe umi

Nyang mupatam surat kalimah
Uram lidah keumala sari
Soe meuteumeung mumat jaroe
Baranggasoe horeumat jibri

Nyankeu Putroe Meurak Asanah
Ma meutuah ka taturi
'oh troh keunan tuan putroe
Mumat jaroe deungon po Ni

Cut Usman po samlakoe
Neuduek keudroe iem beurdiri
Putroe tujoh jak mat jaroe
Han jitusoe teungku faki

Nyang jeuet jijak tuan putroe
Samlakoe meugah beuet kari
Meurak Asanah pike keudroe
Sang-sang lakoe neukalon hi

'oh sare lheuuh mumat jaroe
Putroe jiwoe tinggai banta
Singohpi lom putroe jijak
Lom meurumpak banta muda

Cutda nam droe hana geujak
Putroe Meurak sidroe saja
Nyum bak ate tuan putroe
Sang-sang lakoe ka troh teuka

Sangka waham putroe indah
Usman Basyah judo hamba
Teutapi han neupeulahe
Dalam ate mantong saja

Peunyum rasa dalam ate
Sang ka lahe po cut banta
Geunap uroe jijak sabe
Han neutukri pubicara

Tuan putroe jakt tiep-tiep uroe
Jak kalon soe nyo judonya
Di teungkupi han neukheun droe
Di putroeipi han neutanya

Teutap jijak geunap uroe
Cut putroe sosah lagoina
Jitakot kon teuma lakoe
Malee dudoe gop ceureuca

Bak simalam tuan putroe
Jimohon droe bak Rabbana
Tangah u langet teukui u bumoe
Meuteutaloe ngon ie mata

Ya Ilahi wa ya Rabbi
Poku neubri ban lon pinta
Meunyo ka troh judo kamoe
Meunyo neuwoe u Antara

Simalam beungoh neuduek sabe
Putroe pike toh bicara
Uroe beungoh putroe tren le
Neujak bak Ni pantah sigra

Neujak sidroe bungong keumbee
Hana jithee uleh cutda
'oh sare troh ubak po Ni
Neueu sunyi ureueng hana

Nyang na sinan ureueng sidroe
Han neutusoe eh teurhanta
Putroe peurab laju keunan
Neueu pangsan ureueng muda

Ban neukalon ureueng tido
Peurab laju neuëu rupa
'oh troh keunan putroe canden
Sang ka laen balek rupa

Neueu rupa miseue inong
Putroe bungong pungo gila
Bit utoh that bungong rubek
Putroe baek gadoh kira

Putroe gisa wie ngon uneun
Ban buleuen neukalon rupa
Neueu rupa lagee inong
Saboh bangon agampi na

Meurak Asanah ka teuceungong
Cut bungong ile ie mata
Usman balek bak beuradu
Putroe meulu kalon rupa

Bak nyum sang nyo judo teungku
Ate tunu putroe muda
Bitpi meunan salah waham
Kadangpi kon malee mata

Samlakoe cut teungoh mangat
Hana ingat keu judonya
Cut Usman balek aleh
Putroe saheh kalon rupa

Adat inong na meunalee
Manyang bajee teuntang dada,
Nibak ate putroe intan
Gop nyan agam bukon dara

Neupinta bek jeuet keu keuji
He ya akhi malee mata
Nibak rupa bintang canden
Hana laen nyo meukuta

Neudeungo nafah pujoe seubot
Pujoe Makbud Tuhan Esa
Abeh neukalon putroe bintang
Nyo Usman ka troh teuka

Ka troh keunoe judo payong
Jak saweue lon po meukuta
Yoh nyan putroe moe meurep-rep
'oh sabet neukalon rupa

Putroe seumbah nibak gaki
Cut putroe ti ate suka
Ka neuceupet teuntang teuot
Neuurot bak gaki raja

Ingat aneuk cut bangsawan
Han muban-ban ro ie mata
Jimueng ulee pangkee badan
Cut intan jimoe that rugha

Cut Usman ka putroe mueng
Tamse ujeuen ro ie mata
Putroe neukheun sira neumoe
He jido droe raja muda

Pakon judo han neupeugah
Ulun payah jeuep kutika
Beungoh seupot lon mupayah
Han neupeugah sikrak haba

Pakon meunan he pangulee
Han neubri thee bak adekda
Han neupeugah ubak Ajee
Neuseubee bek meuho punca

Sira neuwa sira neumoe
Teukeujot nyoe raja muda
Ban teukeujot nibak pangsang
Neueu badan cut putroe wa

Neueu jimueng uleh putroe
Teungoh jimoe neueu rugha
Usman balek nap ho laen
Putroe canden jibeurkata

Pakon meunan neubalek lagee
He pangulee hana haba
Pakri ulon han neutueng le
Teugo ka cre siuroe dua

Bek antara na neuseuot
Meuneubet han bulee mata
Tuan putroe sosah ate
Han neutukri pubicara

Han neutukri mita ilah
Bungong mirah hana haba
Dua lhee seun putroe marit
Hana isip bungong jeumpa

Meurak Asanah jimoe bae
Wahe judo po meukuta
Pakon judo han neuseuot
He bintang sret peue kareuna

Putroe neukheun lom bak teungku
He judo bak le neusaba
Jinoe teungku ulon peugah
Wallah billah bukon seunda

Meuhan teungku le meututo
Bahle laju lon bu fana.
Malam neupoh malam neuseubee
Bek kawom thee keuji nama

Wahe judo bungong karang
Hana sayang keu lon hina
Padumna trep teungku peujam
Bu sireugam tan lon rasa

Abeh jikheun macam-macam
Jimoe kiam taeu gubra
Bak pihak lon bangsa kureueng
Han le neutueng po meukuta

Pihak kureueng hana sabe
Han neutueng le kamoe hina
Pakon teungku ate ngeuren
Han le neusyen lon ka tuha

Bek neuingat keu ulon nyoe
Keu aneuk droe cahya mata
Usman deungo jikheun aneuk
Laju neuduek ngon ie mata

Bitpi neuduek neumarit tan
Putroe yoh nyan ate gila
Putroe neukheun panton sikrak
Deungo he nyak lon peuhaba

Cicem himbee teureubangkan daya
Meurak diwangga jinari-nari
Meurak Asanah ha le meuguna
Seubab laen ka na nyang juhari

Lom sikrak trek neukheun panton
Kon lagee phon wahe akhi
Di nanggroë Meuse geupula gadong
Di nanggroë Röm geupula pade

Seubab putroe jiwoë u gampong
Han le untong bak suami
Putroe neungieng bak Usman
Sang buleuen trang cahya muka

Jibeudoh hu cahya iman
Seubab gop nyan that takwa
Maken putroe leubeh galak
Miseue budak ñeueu rupa

Cahya muka miseue intan
Jiek iman bak ie muka
Lom jimarit Meurak Asanah
Teungku meutuah neudeungo hamba

Jinoë ulon takue neukoh
Bahle gadoh nyawong fana
'oh' meuteumeung laen nyang jroh
Ulon taboh han meuguna

Seubab gaseh ngon Cut Meulu
Sang panyot hu nyum di mata
Kareuna lon ka na si nyak
Han le galak lon ka tuha

Nibak udep bahle mate
Bek kueu le po meukuta
Adat udep hana sakon
Tan soe kalon han got rupa

Rupa tan got bangsa kureueng
Bah seulinteueng mate fana
Neucok sikin mat di jaroe
Neumeung top droe nibak dada

Ka neupeujap nibak reukueng
Eh lam leumueng banta muda
Cut Usman gundah ate
Meuhad mate putroe muda

Samlakoe cut mat bak jaroe
Bek he putroe hana guna
Ka neureupah sikin neucok
Rab ineura'ok nibak dada

Putroe neuhe lon lam leumueng
Hana neutueng lon he raja
Cut Usman seuot rijang
He bintang pakon that rugha

Kru seumangat wahe adoe
He putroe cahya keumala
Kareuna lon ureueng ubit
Lagi gareb hina dina

Bak pihak tan lon mat nanggroe
Patot tawoe hana haba
Han tapeugah wahe judo
Dara baro woe tagisa

Han tabri thee ubak kamoe
Seubab lon nyoe ureueng hina
Gata adek ureueng meusoe
Raja nanggroe ayah gata

Pihak gata ulon gaseh
Di sideh nyoe ho lon teuka
Padum laot lon jeumeurang
Rab ka hilang nyawong hamba

Patot jinoo nyan tapeugah
He cut indah maen mata
Padum hanco jeuet keu kuboh
Padum gadoh lam ie raya

Padomna trep lon beurjalan
He intan lon seutot gata
Meureutoh laot lon jeumeurang
Meuribee blang ka lon hala

Patot jinoo takheun meunan
Pihak laman ureueng hina
Abeh nanggroo abeh uteuen
He buleuen lon mita gata

Abeh lon lop dalam peutoe
Abeh deuk troe ka lon rasa
Udep mate sabe lon jak
Bungong meurak that lon cinta

Patot takheun 'oh troh keunoe
Meudeh meunoe tapeurasa
Abeh gunong abeh padang
Lon jeumeurang seutot gata

Pihak gata ureueng meugah
Han tapeugah yoh tabungka
Bak pihak lon ureueng ubit
Han taisip taniet bue kra

Allah Allah he putroe jroh
'oh lon teuoh budi gata
That tabeunci keu lon tuan
He intan Meurak diwangga

Abeh haba Cut Usman
Putroe yoh nyan moe that rugha
Tuan putroe teuma peugah
Neukheun pantah bak cut banta

Wahe teungku uleebalang
He cut bintang maen mata
Jinoe ulon neupoh mate
Nak pueh ate po meukuta

'oh mate lon wahe teungku
Ngon Cut Meulu sambat seutia
Bek neutueng lon he tuanku
Bah Cut Meulu nyang jroh rupa

Bak pihak lon ka na si nyak
Peue lom galak lon ka tuha
Cutda Meulu beepi harom
Mangat neucom-com beungoh seunja

Cut Usman ka teusinyom
Mameh reunom ngon ie muka
Sira neukhem neukheun meunoe
He sambinoe bek le rugha

Udep mate peue taingat
Saket mangat peue takira
Beudoh putroe bek le taeh
He cut puteh bungong jeumpa

Usman peugah meunoe meudeh
Ka puleh cut putroe muda
Han le jimoe Meurak Asanah
Ka ramah ngon cut banta

Mangat ate cut putroe ti
Keu suami baro teuka
Com di teuot seumbah di gaki
Leumoh ate banta muda

Teuma neukheun bak cut bintang
Bungong karang bek that rugha
Kareuna lon aneuk dagang
Tapeusayang he meutia

Tameuniet lon he meuh mirah
Soe tueng upah duek bak gata
Meurak Asanah lom ka gundah
Maken bobah lom ie mata

Putroe marit deungon Usman
He junjongan hana guna
Keupeue jeuet na ulon di sinoe
Han jeuet neuwoe u istana

He teungku cut bungong geutoe
'oh troh keunoe tan mulia
Meu'oh meuthee wahe teungku
Jeuet keu 'a-'u beungeh cutda

Gotkeu bahle abeh umu
Malee laju ateueh donya
Miseue ureueng jak meudagang
Hana mawang ngon ayahda

Meunan miseue lon kheun macam
Bu sireugam han neurasa
Keupeu jeuet na neumeukawen
Han soe salen sikrak ija

Bek antara duek di juree
Meu 'oh meuthee jeuet binasa
Kadang teungku dudoe geupoh
Lon nyoe saboh keupeue guna

Nibak meunoe bahle mate
Bek 'aeb le ateueh donya
Teungku neuwoe han meusampe
Saket ate dum syeedara

Putroe poh droe hana laku
Han jeuet taeu sayang raya
Adat meukon Usman bantu
Abeh umu hilang nyawa

Cut Usman kheun bak putroe
Deungo kamoe he meutia
Bek he putroe takheun meunan
Di jalan meuteumeung dua

Meuna umu he meuh mirah
Cut indah dapat istana
Keu redeuki bek that gundah
Sidroe Allah nyang karonya

Bek tamalee he cut putroe
Bak kamoe ateueh jeumala
Baranggapeue wahe putroe
Tuhan sidroe nyang ek peuna

Jakleh tawoe bungong riwat
Si nyak siat keunoe taba
Tame si nyak siat keunoe
Rindu kamoe maen mata

Bek taduek le gata sinoe
Lon takot woe ureueng donya
Meurak Asanah seumbah lakoe
Gaki jaroe siseun dua

Wahe judo uleebalang
Bek neubuzng lon he raja
'oh putroe deungo neuyue ba si nyak
Ka seungkak ate lam dada

Neutakot that 'oh troh keunoe
Si nyak nyoe neupuwoe bak ma
Teungku neuwoe u nanggroe Makah
Tinggai jariah keupeue guna

Si nyak han le teungkupi tan
Wahe Tuhan neutueng hamba
Yoh masa nyan neukheun nyoeban
Cut intan jimoe that rugha

Bukonkeu that lon weueh ate
Bungong pade neumeung bungka
Neueu putroe jimoe sabe
Beukah ate meugrak rasa

Banta neukheun bek tamoe le
He boh ate jak tagisa
Putroe jitren leugat jiwoe
U rumoh droe le jigisa

Uroe malam dawok jimoe
Ingat lakoe baro teuka
'oh troh putroe u meuligoe
Jikheun meunoe meuseurapa

Bukon paleh tilam kaso
Han got uko jipriek ija
Sayang lon eu linto baro
Duek teupako han soe puba

Bukon paleh lom tika eh
Han got ureh yoh jilaya
Ulon sinoe teungku sideh
Bak rumoh jeh po Ni tuha

Bukon paleh bantai sujoe
Han got jaroe ureueng rika
Di lon kueh lam meuligoe
Jehpat lakoe bak nek tuha

Bukon paleh tameh sago
Han got uroe bak jicok lha
Keupeue jeuet lon ka na lakoe
Han jeuet neuwoe beungeh cutda

Bukon paleh neuduek binteh
Han-le lon eh lam istana
Ulon sinoe teungku sideh
Sajan ma teh po nek tuha

Bukon sayang lon eu sipot
Dalam laot dum mubanja
Han jeuet le lon idang surot
Beungoh seupot miseue nyang ka

Bukon sayang lon eu bambang
Jijeumeurang laot raya
Tuboh lon nyoe bukon sayang
Jinoe meulang-lang troh 'an tuha

Bukon sayang angen ribot
Dawok jipot han tom reuda
Allah Allah ya Tuhanku
Pakri teungku lon bicara

Teutap putroe jimoe sabe
Ka meugule dalam tika
Dalam ate bukon weueh that
Pirak lipat nyang jeuet rugha

Seubab judo han jeuet neuwoe
U meuligoe dalam kuta
Teutap rugha geunap uroe
Sayang putroe that keu banta

Putroe rugha teuduek siat
Lon riwayat laen macam
Seureuta lon balek ayat
Deungo sahbat dumna teelan

Nyoe lon peugah cut samlakoe
Deungo adoe lon atoran
Leupah putroe leugat jiwoe
Samlakoe turon beurjalan

Neujak laju u meunasah
Sajan Syiah beuet Quruan
'oh ban neukheun a'uzubillah
Ro ie babah teungku Miram

Meuasek ulee meucip babah
Teungku Syiah tahe mandang
'oh neudeungo bak jiwakaf
Leungo 'arasy loh meuguncang

Langet bumoe rasa beukah
Rakyat reubah dum meutimphan
Teubiet ureueng dalam gampong
Plueng meukong-kong inong agam

Reuloh muka beukah idong
Prtoh geulunyueng han jituban
Samlakoe cut neubeuet sunggoh
Teubiet reuoh taeu peusam

Cahya muka that seumeuloh
Cahya tuboh miseue intan
Nyankeu seubab rakyat karu
Han tom jieu meunan macam

Adat sosah gadoh tunu
'oh tee taeu muda bangsawan
Teuma meugah ubak putroe
Ureueng nanggroe nyang peuhaba

Wahe po cut han lon tusoe
Ureueng nanggroe that analan
Jehpat jinoe di meunasah
Sajan Syiah Teungku Miram

Rupa jroh that masya Allah
Rumeh babah paseh lisan
Han tom lon eu he po cut droe
Jeuep-jeuep nanggroe lon beurjalan

Aneuk raja baranggasoe
Ngon si nyak nyoe hana lawan
Umu baro dua ploh thon
Leubeh kureueng lhee peuet buleuen

Adat judo po cut ampon
Galak that lon hana lawan
Meusoe laen han sikufu
Bintang timu kon siwadan

Meurak Asanah nyang meusyeuhu
Nyankeu teungku nyang roh padan
Ban putroe deungo haba meunan
Teusinyom yoh nyan Meurak intan

Peue tapeugah nyang han patot
Tuto karot aneuk jalang
Teuduek 'oh nan siat kisah
Lon peugah muda bangsawan

Pioh neubeuet po samlakoe
Rakyat jiwoe seukalian
'oh abeh dum rakyat jiwoe
Samlakoe turon beurjalan

Woe u rumoh samlakoe cut
Bak ma seubot Ni Kubayan
Po Ni neubet bu samlakoe
Neuduek le toe sinan sajan

'oh lheueh makeuen banta muda
Tanyong haba bak Ni intan
Cut Usman tanyong bak Ni
Jinoe pakri he ma badan

Lon that sosah ate tunu
Goh troh napsu toh pikeran
Tuan putroe hana lon eu
Pakri laku toh amilan

Pakri he ma lon meuteumeung
Ngon cut meugleueng Meurak intan
Teuma po Ni leugat neukheun
Hom he buleuen han lon tuban

Tapreh dilee he samlakoe
Cut putroe keunoe lom datang
Han ek jiduek di meuligoe
Samlakoe kon ulon wayang

Keunoe singoh lom jipeurab
Bek teudap-dap he jeunulang
Adat han trep meusikeujap
Bak lon harap meunan nyum sang

Hingga suboh le ngon uroe
Tuan putroe ka troh datang
Samlakoe cut tinggai di rumoh
Uroe beungoh jak seumbahyang

'oh troh keunan tuan putroe
Po Ni jinoe tanyong rijang
Pane tajak he putroe jroh
Suboh suboh ka troh datang

Putroe seuot pantah laju
He ma teungku bek meuayang
Po Ni teukhem leumah gigoe
That sambinoe miseue dandang

Yoh nyan po Ni neuteumanyong
Bak cut bungong Meurak intan
He putroe na peue lon tanyong
Kheun beu keunong wahe bintang

Cuba peugah po cut meugleueng
Na meuteumeung deungan Usman
Teuma seuot po cut ampon
Pane ureueng he ma cut nyan

Po Ni seuot neukheunmeunoe
Nyankeu lakoe gata intan
Meurak Asanah seuot meunoe
Di kamoe hana tunangan

Teuma po Ni ka neukheun lom
Bek le tasom bungong peukan
Cut Usman na meurumpak
Hai cut Meurak peugah rijang

Putroe neukheun lom bak po Ni
Han lon turi pane urang
Han tom di lon ku deungo gah
Peue tapeugah he ma rumpang

Kareuna lon goh na lakoe
Pane keunoe ureueng agam
Han lon turi han lon tusoe
Peue buet keunoe he ma badan

Teuma po Ni laju neukheun
Wahe buleuen bek meuayang
Wahe po cut jinoe lon peugah
Kon beurakah meuh keunarang

Dua aneuk jak cok pantah
Usman Basyah neukheun meunan
Hajat teungku ate galak
Kalon si nyak meuh teuupam

Tuan putroe lom kheun sikrak
Pane si nyak he ma badan
Lom sikrak treuk haba putroe
Hana lakoe lon he mawang

Pane aneuk meutan lakoe
Bit datok nyoe le that wayang
Kamoe tujoh sisyeedara
Sidum cutda tan tunangan

Po Ni Euncek lom kheun meunoe
Bek ngon kamoe le meuayang
Lcm jimarit puteh licen
He ma canden kon lon wayang

Gohlom ulon kumeukawen
Cutda laen toh pakriban
Kareuna lon ureueng tulet
Pane patot buet han reumbang

Teungoh putroe neumeututo
Troh le lalo bungong karang
'oh troh keunan po samlakoe
Tuan putroe jak com tangan

Po Ni Euncek neukheun meunoe
Nyan he putroe Cut Usman
Saleh pane teuka keunoe
Bek ngon kamoe temeuyang

Saleh teubiet dalam laot
Saleh sret sajan ie hujan
Pane teuka he bintang sret
Putroe tulet cahya intan

Po Ni neukhem raya raya
Ro ie mata putroe intan
Po Ni peugah lom bak putroe
Samlakoe jeuh beurjalan

Padum mate sret lam laot
Keunong ribot riyeuek hantam
Seubab gata putik langsung
Bak pihak that gaseh sayang

Han le umu bak takalon
Adat meukon tulong Tuhan
Putroe deungo Ni peuhaba
Ro ie mata meugeulumbang

Yoh nyan putroe beudoh pantah
Neujak seumbah banta seudang
Bek tuanku lon neumarah
Ampon meu'ah dum sibarang

Buet ka leupah bek neuingat
Saket mangat he buleuen trang
Bek neumarah po junjongan
Neuniet laman mante hujan

Jampang neujak nanggroe duson
Adat na lon tameuniet tan
Miseue dagang nyang baro tren
Meunankeu lon wahe abang

Adat di gop geuba u rumoh
Hana meu'oh he jeunulang
Sapat lakoe sapat peurumoh
Ate mayoh rindu deundam

Padum uroe teungku ka trok
Ie siteugok tan mubayan
Samlakoe cut neukheun meunoe
Taba keunoe aneuk badan

Putroe seuot insya Allah
Bungong mirah ka lon simpan
Jak cok keunoe pirak lipat
Lon meung lihat pakri macam

Ban putroe deungo meunan haba
Tren le sigra putroe seudang
Tinggai judo sajan po Ni
Cut putroe ti neuwoe rijang

Troh u rumoh tuan putroe
Sosah han soe bungong peukan
Ingat aneuk malam uroe
Seubab lakoe yue ba keunan

Deungo lon peugah aneuk putroe
Masa bunoe cre ngon tuan
Tan jipuwoe u meuligoe
Cutda nam droe bek neutuban

Jikeubah bak rumoh maja
Ureueng tuha sidroe sinan
Nakeu jeuh siuroe jak
'oh nan jarak he ma badan

'oh troh putroe u meuligoe
Malam uroe ate reunggang
'oh jiating keu aneuk droe
Hana tom troe bu jimakan

Meuri seubab mantong keuce
Reuloh ate putroe intan
Neuingat neupike-pike
Jinoe bahle ulon simpan

Bah lon jak cok kaman jinoe
Lam meuligoe lon troh sajan
Adat meuthee lon pabanbāh
Han jeuet ubah janji Tuhan

Jitren laju tuan putroe
Hana sidroe ureueng tuban
Teungoh malam putroe neujak
Jak cok si nyak bak nek Rihan

Putroe baplueng le jipuwoe
Cut samlakoe bungong peukan
Troh u rumoh cut putroe jroh
Ka neuboh lam geudong intan

Han tom jiklik meusiuroe
Ureueng nanggroe han jituban
Ka limong thon sampoe umu
Kulet hu seubagoe intan

Teuma jinoe ka troh po du
Patot jieu keulaheran
'oh sare troh putroe neuwoe
Cut samlakoe aneuk badan

Uroe beungoh teubiet hari
Putroe ti jinoe beurjalan
Nedba si nyak tuan putroe
Hana sidroe na soe tuban

Hana soe eu putroe neujak
Tan meurumpak sidroe urang
'oh troh keudeh Putroe Meurak
Ate galak muda seudang

'oh meuteumeung ngon samlakoe
Neucom bak dhoe bungong karang
Teutap sinan bungong uroe
Ngon aneuk droe dua sajan

VI. DIENANYA LE A PUTROE

Teukeudi Allah peurintah Rabbi
Ka teukeudi nibak Tuhan
Ka meuthee bak putroe siti
Hasyem Pari aneuk badan

Lakoe Putroe Meurak Asanah
Usman Basyah geuseubot nan
Meunan meugah ubak putroe
Cutda nam droe Meurak intan


Meurak Asanah jak bak lakoe
Aneuk dua droe neuba sajan
Deungon aneuk bandua droe
Ureueng lakoe aneuk agam

Aneuk ngon ku ka troh jiwoe
Ubak Putroe Meurak intan
Putroe tuha Daraman Ali
Nyang neurasi deelat makam

Jroh that ate cut putroe ti
Hana deunki deungon deundam
Bak siuroe Daraman Ali
Jak bak cut ti Meurak intan

'oh troh keunan neukheun meunoe
He adoe ka troh tunangan
Meurak Asanah seut sigra
Pane teuka sret di manyang

Daraman Ali meunoe neukheun
He buleuen bek le meuayang
Bek tapeugah baranggapat
Jeuet meularat adek badan



Hana saban ate geutanyoe
Wahe adoe meuh keunarang
'oh jikalon lakoe gata
Jroh that rupa sang buleuen trang

Lagi saleh ngon keuramat
Sang azimat sret lam awan
Lon peuingat he adekda
Bek peuhaba bandum urang

Meunyo meuthee dum bak cutda
Aneukda takue jireupang
Deungon lakoe han jitinggai
Kadang ajai nyawong simpan

Nyang jeuet adoe lon jak bri thee
Bungong keumbee that lon sayang
Hana meunan cutda laen
Hana geusyen adek intan

Meurak Asanah marit sigra
He cutda bek le neusayang
Kareuna lon ureueng iku
Han mee geueu ulon paban

Gata cutda goh na lakoe
Bannam droe goh tapandang
Aneuk ngon lakoe na tatukri
Gaseh sabe baranggajan

Meunyo ka meukeumat gaseh
Ate peudeh han jan leukang
Gata cutda goh meukawen
Hana malem bak meureusam

Di lon cutda ka meukawen
Mate lon tem ngon sikarang
Adat matepi beu sare
Udep sabe sajan sajan

Ingat-ingat he cutda jroh
Ulon saboh han soe sayang
Meutan aneuk lom meusaboh
Han neutu'oh peurasan

Lom meututo Daraman Ali
Deungo lon kheun kri adek badan
Gata adek hana meuhad
Meuhan sapat ngon lon tuan

Meurak Asanah lom meututo
He cutda e ulon paban
Bahle mate bak siseun nyoe
He cutda droe bungong asan

Keupeue cutda tatham kamoe
Lon ngon lakoe bahle geucang
Teutapi cutda ulon peugah
Jipoh gajah le cicem subang

Dudoe cutda meuhad teulah
Nanggoe nyoe sah keu Cut Usman
Han neupateh he cutda droe
Neueu dudoe jan laheran

Yoh goh 'aeb jeuep-jeuep nanggroe
Yoh goh rugoe bek neumuprang
Tadeungo lon wahe cutda
Bandum gata cutda bannam

Cut Usman waliyullah
That meutuah pangkat manyang
Lagi alem that keuramat
Raya meurtabat nibak Tuhan

Soe nyang paleng keu Usman
Di ureueng nyan jeuep-jeuep uteuen
Meunyo hana ban kupeugah
Dalam babah neusak peudeueng

Bek taharap droeteu meugah
Bak po tallah hana kureueng
Han jeuet cutda **deungki** deundam
Meuriwang ateuh droeteu trang

Han tapateh taeu dudoe
Gata nam droe pangkat kureueng
Ingat-ingat gata nam droe
Meuhad| tamoe jeuep-jeuep uteueh

Baranggadum tapeulaku
Han troh napsu ban nyang takheun
Nyang got cutda bah tasaba
Bek meuseunda cutda buleuen

Bek tameuen bak teumpat gajah
Gata reubah sret dalam krueng
Sayang lon that bandun gata
Bek meuhawa pangkat kureueng

Hana galak duek lam kuta
Harok raya duek lam leubeueng
Hana galak lam meuligoe
Gata nam droe galak lam trueng

Bukon sayang bungong langsung
Keunogn kilat abeh leukang
'oh lon kalon pade leukat
Yum murah that dua gupang

Pade jatoe meuhai abeh
Dua naleh troh lhee gupang
Wang keupala han tom abeh
Keunoe keudeh jiplueng urang

Geusyk gampang nyang jeuet reugeh
Keunoe keudeh jak meuutang
Tulong rakyat dalam gampong
Bek meukong-kong ngon uleebalang

Meukon meunan tulong-mulong
Geusyk gampong jeuet keu musang
Nibak raja tan peucahya
Baranghaba padoli tan

Bukon sayang bungong geutoe
Angen tampoe uroe malam
Jinoe haba putroe laen
Maseng-maseng putroe intan

Teuduek dilee 'oh nan siat
Lon riwayat keu Putroe Phang
Putroe Hijopi lon seubot
Deungo ma cut lon atoran

Meuthee adek ka na lakoe
Ureueng nanggroe Cut Usman
Ka dua droe jimeuaneuk
Lakoe ka trok keunoe datang

Jimupakat meunoe jikheun
Cutda buleuen pakri padan
Meurak Asanah ka na lakoe
Di geutanyoe han tatuban

Aneuk ka na dua dua
Bit ceulaka aneuk jalang
Nyang got cutda tapoh mate
Nak bek keuji seugala alam

Aneuk dua takoh lihe
Bahle mate nyawong simpan
Meunan jikheun jiboh padan
Seuot teuman\putroe tuha

Teuma marit putroe intan
Deungo laman he adekda
Pakon meunan he adekda
Aneuk syeedara taneuk buang

Han tatupeue gop ceureuca
Jeuheut nama gata irang
Teuma marit Putroe Hijo
Bek cutda e meunan kalam

Meuhan tapoh he cutda ti
Malee keuji dum sibarang
Meuhan tatem taduek keudroe
Bah buet kamoe meujak simpan

Teuma jijak dum sinaroe
Ubak Putroe Meurak intan
'oh troh keudeh ubak adoe
Tanyong meunoe rijang-rijang

Wahe adek tuan putroe
Aneuk dua droe pat tarohan
Bek le tasom wahe adoe
Di kamoepi aneuk badan

Aneuk gata keumuen di lon
Lon heundak com rindu deundam
Lom Putroe Phang jikheun meunoe
Ngon kamoe bek le meuayang

Bek jeuet pake gata ngon lon
Putik sukon tacok rijang
Teuma seuot panyot tanglong
He cutda lon putrik rihan

Pakon meunan cutda tanyong
Hana keunong lon deungo kalam
Teuma seuot Putroe Hijo
Haba bek le aneuk jalang

Meurak Asanah aneuk jime
Boh ate jitingkue julang
Aneuk tuha tinggai bak du
Jimeututo tilo alang

Aneuk tulet putroe puwoe
U meuligoe baranggajan
Lakoe tinggai bak rumoh Ni
Hasyem Pari dua sajan

Meurak Asanah tingkue si nyak
Aneuk manyak bukon sayang
Deuh jikalon le Cut Hijo
Jitajo miseue boh sungkam

Jicok aneuk Meurak Asanah
Ka jireupah meutang-ilang
Di jih limong adoe sidroe
Lheueh aneuk nyoe han le bak nang

Ka jiantok bak pha rinyeun
Leupang-leupang hana sayang
Ladom cutda jidrop adoe
Jikiloe cut bungong peukan

Meurak Asanah Putroe canden
Teupat baten han neulawan
Nyansa jipoh uleh cutda
Jitampa meulayang-layang

Neucok aneuk han ek le trok
Bungong tajok bukon sayang
Meurak Asanah gadoh ingat
Jilumpat taeu meulayang

Putroe Hijo jitheun peudeueng
Putroe buleuen hana hiram
Jitajo jimeung cok aneuk
Jaroe han trok ka meutumpang

Sira neugrop meunoe neukheun
He buleuen ka grak bak Tuhan
Aneuk jikliek hana lagee
He pangulee soe eu sayang

Allah he ma tacok kamoe
Lon uroe nyoe nyawong hilang
Janji Tuhan bak geutanyoe
Ka meunoe neubri le Tuhan

Tinggai gata lam meuligoe
Di lon kulwoe bak mulaan
Uroe dudoe lom meuteumeung
He buleuen di blang padang

Kareuna lon hana soe tueng
Bangsa kureueng aneuk agam
Banta cut lom jikheun meunoe
Bek poh kamoe cutwa badan

Maken leugat laju jipoh
Hana saboh soe tem sayang
Ureueng gampong jidong lingka
Han jeuet bela toh pakri ban

Ureueng bandum ro ie mata
Jimoe subra inong agam
Bukon sayang bintang rusa
Han le cahya reudok awan

Meurak Asanah sang ka mate
Jaroe kaki ka jitapang
Jaroe kaki ka jirante
Bak lihe kangkong jipeugang

Putroe Hijo putoh geulunyueng
Ka bujeueng hai mate geucang
Han meuteumeung le meulakoe
Jipoh adoe hana sayang

Aneuk manyak sayang raya
Jipoh lanja inong jalang
Aneuk jiklik lagee raya
Bek le cutwa tapoh laman

Allah Allah he cutwa droe
Pakon meunoe gata bannam
Han tatem tueng ulon sidroe
Tapoh kamoe bunda sajan

Bak pihak lon tan syeedara
Sidroe saja keunoe datang
Allah Allah he po ma jroh
Ulon saboh han soe sayang

Taba lon keunoe tayue jak poh
He po ma jroh kawom lon tan
Di putroeipi jipoh sabe
Tan jipike banyak seudang

Hana sayang muesigeutu
Jipoh laju Allah he wang
Beukah ulee reuloh muka
Patah ngon pha bukon sayang

Ka jiantok bak-bak batee
Patah singkee cut buleuen trang
Teungoh putroe jimupake
Lakoe cutti keunan datang

Nyang jeuet neujak cut samlakoe
Neudeungo putroe teungoh meucang
Deungon aneuk neuba sajan
Ateuh gulam bungong karang

'oh troh keunan cut samlakoe
Neueu putroe meutang-ilang
Teungoh jipoh le da nam droe
Po samlakoe tajo rijang

Cut Usman neupeugah le
Bek mupake cutda badan
Pakon cutda tapoh aneuk cut
Hana patot bak teuladan

Putroe jikheun narit bacut
Kadrop po cut teungku Seumän
Dumna rakan han jitem drop
Cut rupa got nyang analan

Cap musalla deuh bak talak
Hu mubhak-bhak miseue intan
Tuan putroe meunyum galak
Ate rusak rasa leukang

Sang beu jiwa 'oh jikalon
Adat meukon judo intan
Cutda nam droe teuhah babah
Sang-sang reubah 'oh jipandang

Puleh hireuen nibak tahe
Jitajo ateueh cut intan
That meutamah saket ate
'oh jipike malee badan

Rupa jroh that hana sakri
Judo cutti Meurak intan
Ganceng gigoe jikap bibi
Cut putroe ti beungeh han ban

Jidop laju banta muda
Bandum cutda ate leukang
Jikeumeung poh hana meukri
That beureuhi 'oh jipandang

Jitajo le tuan putroe
Ngon taloe na saboh linggang
Banta cut ate tan beungeh
Ureueng saleh gaseh Tuhan

Jidrop teungku ngon aneukda
He syeedara bukon sayang
Jiboh taloe jaroe gaki
Si nyak ti ka reubah pangsang

Putroe jimoe ngon ie mata
He raja ka grak bak Tuhan
Lon pabanbah he jido droe
Jeuoh nanggroe tabeurjalan

Hajat tawoe jak eu si nyak
Goh pueh galak nyawong simpan
Lompi judo bahle mate
Meunyo han le aneuk badan

Putroe Hijo that amarah
Jireupah cut banta seudang
Ikat jaroe jibeureukah
Jihue pantah u teungoh blang

Deungon aneuk jipeusapat
Jiba leugat sajan-sajan
Jipeh labang nibak jaroe
Dalam uroe sina diam

Jiple minyeuk dalam kulet
Abeh saket hana macam
Lom jipeuek u cong sula
Hana haba banta seudang

Samlakoe kheun bak aneukda
Tasaba peurintah Tuhan
Bukon sayang bungqong meulu
Teungoh lon eu abeh leukang

Bukon sayang aneuk ngon du
Ka jipalu le jen hutan
Bukon sayang aneuk miet cut
Hana patot jiboh keukang

Ladom jipoh deungon kayee
Hana lagee wahe abang
Ladom jisrom ngon tanoh cak
Ladom jitak ngon geuliwang

Soe nyang kalon ate rusak
Tangkurak rasa ka leukang
Bukon sayang bungong uroe
Reudok tampoe sang ka malam

Bukon sayang cut samlakoe
Mata uroe hana le trang
Dumna ureueng dalam nanggroe
Taeu jimoe hana reunggang

Dara agam tuha muda
Ro ie mata meugeulumbang
Tuan Putroe Meurak Asanah
Han peue peugah wahe teelan

Jaroe gaki jibeureukah
Sayang leupah cut buleuen trang
Bukon paleh putroe nam droe
Jipoh adoe hana sayang

Han jeuet takheun le geutanyoe
Dum ayah droe han ek larang
Daraman Ali nyang na publa
Putroe tuha aneuk sulotan

Jibri ingat dum syeedara
Pakon gata buetteu meunan
Pakon tapoh Meurak Asanah
Peue na salah peurbuatan

Teugo di jih ka na lakoe
Tapaban proe kheundak Tuhan
Meunyo tapoh wahe adoe
Teulah dudoe gata intan

Kareuna putroe that meutuah
Gaseh Allah pangkat manyang
Han jipateh jipoh laju
Jicok teungku jihue u blang

Sajan aneuk bandua droe
Samlakoe jiikat sajan
Tujoh uroe dalam kulèt
Abeh saket hana macam

Bandum jipoh wahe taleb
Meukulet han jitem leukang
Nyansa jipoh hana beungeh
Muka rumeh muda seudang

Teuma aneuk kheun bak teungku
Pakri laku he du badan
Saket lon that wahe po du
Bak ri laku han le tahan

Wahe aneuk bijeh mata
Allah Ta'ala nyang bri meunan
Saba beu that he puteh di
Pangkat tinggi akhe datang

Bukon sayang aneuk banyak
Nyang hana hak jiboh keukang
Jipoh laju hana lagee
He sampee bukon that sayang

Nyandum jipoh hana beungeh
Ate saleh po cut bintang
Nyansa jipoh han jikira
Jamok seuba dalam padang

Dumnan di gop he syeedara
Ek geusaba bala datang
Di geutanyoe bacut bala
Ngon ie mata meugeulumbang

Meusaket pruet peuneng ulee
Hana lagee muka reuhang
Teuduek haba 'oh nan siat
Deungo he sahbat lon atokan

Ureueng lhee droe jiba leugat
Hana sapat ngon cut intan
Tuan Putroe Meurak Asanah
Ka jipinah han le sajan

Peuek po cut u meuligoe
Ikat jaroe ngon taloe nyan
Yoh masa nyan putroe bae
Jihue judo ngon anakan

He aneuk cut puteh lisen
Bintang canden ho beurjalan
Hoka tajak he panglima
Tatinggai ma lam sukaran

Gohlom mēudeuh lon eu teunglu
Ka jibalu le jen hutan
Allah he teungku uleebalang
Goh lon pandang meulhee uroe

Meureutoh laot tajeumeurang
Pihak sayang keu aneuk droe
'oh troh keunoe jipeukeuji
Bek roh jibri bu siseun troe

Wahe aneuk putik langsung
Cut Ahmad rup'a samlakoe
'oh troh po du meusampe that
Bungong riwat apon jaroe

Geupoh gata hana salah
Buet jariah cutda nam droe
Meuek lheueh lon bungong mirah
Kupoh balah jih kuseudoe

Meuek lheueh lon dalam rante
Kupoh mate jalang bisoe
Han kutinggai jih meusaboh
Akai teuboh han got budoe

Gata aneuk bu phet kulet
Umu beu trep mangat asoe
Allah he aneuk boh ate nang
Teungoh lon timang sret bak jaroe

Bukon sayang bungong jaloh
Han tom na boh angen tampoe
Tinggai ulon he aneuk jroh
Gata geupoh ngon bapak droe

Allah he aneuk uleebalang
Tamse subang reuloh keudroe
Meusampe that he judo payong
Gata ngon lon bukon rugoe

Gata geupoh lon geuikat
Bukon weueh that ate lon nyoe
Allah Allah ya Tuhanku
Pakri po du ngon aneuk droe

Ulon sidroe bahle mate
Nak pueh ate bandum cutda
Ie di laot puteh hijo
Keude baro Lampoh Saka

Neupoh ulon he cutda e
Deungon judo sinan dua
Bukon sayang lon eu bileh
Dum mupayeh dalam raga

Allah he teungku nyang lon gaseh
Ngon soe lon eh 'oh tan gata
Putroe bae hana lagee
Antok ulee Tumbok dada

Tuan putroe dalam ikat
Seungsara that bungong jeumpa
Dawok bae putroe indah
Taeu jojah lam istana

Allah he judo bukon rugoe
Cutda nam droe geupoh gata
Bukon sayang lon eu awe
Jikoh sabe 'oh troh Jawa

Wahe teungku uleebalang
Han soe sayang sidroe saja
Pihak jarak nanggroo mawang
Bukon sayang teungku raja

Keupeue jeuet na ulon sidroe
Cutda nam droe han ek sangga
Ulon-ulon sigo geupoh
He teungku jroh kon meugata

'oh lon ingat reuloh ate
Lon bu mate sajan gata
Wahe aneuk bungong puteh
Gata sideh nyoepeat po ma

Bukon sayang cabeueng asan
Pañah meukhan angen timpa
Ulon tinggai dalam makam
Judo badan ho leupah ka

Putroe bae hana teudoh
Puteh leusoh sayang raya
Teuduek dilee 'oh nan siat
Lon riwayat banta muda

Jiboh rante kong jiikat
Jipeusapat deungon aneukda
Dua gaki jiboh pasong
Jaroe jisurung dalam singkla

Jihue laju u teungoh blang
Bukon sayang bungong jeumpa
Ka jipeueh di teungoh padang
Jireupang takue bantiga

Samlakoe cut nyawong hilang
Sajan-sajan ngon aneukda
Aneuk ngon ayah sigo mate
Bungong pade ka binasa

Teuma jitiek laju bangke
Boh ate u dalam paya
Nyankeu paya salen-malen
Iblich ngon jen sinan that bha

Putroe nam droe mangat ate
'oh ka mate ureueng nyan tiga
Bak jikalon kakeu mate.
Bak lahe hana le nyawa

Troh lam paya po cut intan
Deungo teelan lon beuhaba
~~Dun ien pari nyang di sinan~~
Beudoh yoh nyan bandum rata

Jen apeuret cok Usman
Seureutakan ngon aneukda
Ban jikalon aneuk ensan
That sukaan hana tara

Ie peunuleh jicok rijang
Boh bak badan ureueng nyan tiga
Puleh pangsan po samlakoe
Nyawong muwoe miseue nyang ka

Jiboh ubat lom bak badan
Pat nyang leumbam puleh sigra
Tujoh uroe jipeulaku
Puleh teungku miseue nyang ka

Muwoe nyawong nibak pangsan
Ingat rijang po jroh rupa
Banta pike keuhai untong
Meugulong-gulong ngon ie mata

Neukheun ubak jen apeuret
Gata sabet nyang syeedara
Sira neumoe that meurep-rep
Jen apeuret enseueh teuka

Raja jen kheun teuma meunoe
Ulonteu nyoe duek lam paya
Kamoe teungku bangsa pari
Trep ka lawi duek lam paya

Asai ulon bak urueng saleh
Lon kheun saheh bak meukuta
Ulon raja lam paya nyoe
Laen sinaroe rakyat hamba

Jinoo teungku lon bri maklum
Neutueng bandum keu meukuta
Neupeuhamba dumna kamoe
Lam paya nyoe droeneu raja

Phon jinoo kon troh 'an dudoe
Dumna kamoe hamba sahya
Seuot banta insya Allah
Lon keubah ateueh jeumala

Kawom lon han syeedara tan
Tatem sayang uleh gata
Maku lon han mawang lon tan
Meulaenkan ngön gaseh gata

Gampong nanggroe lon tan mupat
Lon siurat keunoe teuka
Adat gop poh dirot di blang
Han soe sayang meukon gata

Jen apeuret seuot pantah
Insya Allah po meukuta
Droeneu teungku wali Tuhan
Ka lon tuban asai mula

Jinoe teungku ulon peugah
Lon seuleuah akan gata
Bek tagundah he pangulee
Saboh lagee na bak hamba

Jinoe teungku na amilan
Saboh padan lon peuhaba
Sidroe Syiah dalam uteuen
Trep ka jameun dalam tapa

Geumeuaneuk na dua droe
Ureueng lakoe sisyeedara
Jimupake seupot beungoh
Jimeuseunoh tueng pusaka

Wahe teungku panyot tanglong
Neujak hukom jih bandua
Masa Syiah duek lam hutan
Pujoe Tuhan rok-rok masa

Sireutoh thon neuduek sampoe
Teuma dudoe ajai teuka
Areuta tinggai dua bagoe
Aneuk dua droe jimeudawa

Tinggai tudong deungon tungkat
Jimeuhajat jih bandua
Kasiet tudong wahe teungku
Saboh laku sangat gura

Tudong tungkat raya meukeusud
Teungku po cut neujak sigra
Jeuet lon tupeue teungku badan
Ngon lon rakan dilee masa

Teutapi teungku lon bri ingat
Tanyong kasiet bak eumpunya
Peuebu kasiet tungkatteu nyoe
Uba kamoe tapeuhaba

Meukon meunan han lon hukom
Hana mufom keupeue guna
Laen nibak nyan han lon peugah
Jeuet beurakah he meukuta

'oh troh neujak bak gunong nyan
Cit di sinan jimeudawa
Neuk laju ubak pucak
Cit meurumpak ureueng dua

'oh troh gata hukom jilakee
Meunan dilee mula-mula
Abeh haba jen apeuret
Usman bangket le neubungka

Aneuk dua tinggai bak jen
Jibri salen ban nyang kada
Jieu rupa puteh lisen
Dum raja jen ate suka

Jipeulara le jen kuput
Bek hayut si nyak baro na
Bek tamoe-moe wahe po cut
Peue nyang meuheut lon jak mita

Po du neujak hana jeuoh
Na lheueng tujoh gunong raya
Teuma keunoe lom neuwoe troh
Puteh leusoh jak tueng gata

Mangat tawoe u meuligoe
Samlakoe jak saweue bunda
Ate po ma that teugoe-goe
Malam uroe ro ie mata

Dusyik gata raja nanggroe
Buta tuloe akai hana
Patot gata jiboh keunoe
Hana sidroe na bicara

Insya Allah he samlakoe
Uroe dudoe gata raja
Teuduek dilee 'oh nan siat
Lon riwayat teungku bungka

Neujak laju pantah leugat
Neupeuteupat dalam rimba
Peusak tuah deungon untong
Neujamprong leugat neubungka

Nibak udep bahle mate
Malee sabe ateueh donya
Haba teungku teuduek 'oh nan
Lon karangan laen haba

Nyoe lon peugah ureueng nanggro
Bandum jimoe meuseurapa
Meuthee teungku ka jibuang
Lam paya nyan umpung beurahla

Bukon paleh raja bajeueng
Han jiteueng meulintee teuka
Rupa jroh that bungong seupeueng
Hana ureueng meunan nyang sa

Ureueng malem that reuen-mareuen
Geuheundak kheun han kuasa
Han tom di gop nyang na puroe
Buet nyang meunoe dilee nyang ka

Nyankeu raja hana tuah
Han jiteugah dum aneukda
Han got akai dumna putroe
Jipoh adoé han kareuna

Adat meukon raja nanggro
Ngon uroe nyoe hilang nyawa
Ureueng gampong ban sinaroe
Bandum jimoe geupoh banta

Seubab gop nyan that meutuah
Gaseh Allah Tuhan Esa
Le that ureueng gadoh akai
Ladom jawai pungo gila

'oh meuthee bak Meurak Asanah
Aneuk ngon mbah ka binasa
Putroe bae hana lagee
Dalam juree ka teurhanta

Wahe judo uleebalang
Bukon sayang he bentara
Jinoe ulon ka meulang-lang
He jeunulang 'oh tan gata

Bukon sayang bungong situngkoi
Lam seulangoi ulee ceumara
Baranggadum lon meukaoi
Han meukabui he panglima

Bukong sayang bungong meulu
Teungoh lon eu luroh mala
Bukon sayang aneuk ngon du
Teungoh lon eu ka neubungka

Puteh puteh bungong geutoe
Ayeuem jaroe aneuk raja
Aneuk tapoh bandua droe
He da putroe ingat gata

Bukon sayang lon eu lawah
Ka reubah angen barat ba
Tatinggai lon he meuh meutah
Gata leupah deungon bapa

Bahle 'oh nan dilee kisah
Nyoe lon peugah keu cut banta
Amma bakdu teuma dudoe
Kisah muwoe ureueng bungka

Barat timu neujak sidroe
Samlakoe neuarong rimba
Ka neuek gle neutren paloh
Teubiet reuoh lam-lam mata

Umu sibuleuen hana pioh
Hingga troh bak gunung raya
Manyangpi that hana sabe
Teumap pari nyang peurkasa

Nyankeu teumpat teungku kali
Nyang duek lam gle rimba raya
Samlakoe ek laju keunan
Gunong manyang silagoina

Siploh uroe nyang ka neujak
Ka meurumpak saboh bala
'oh troh banta ubak pucak
Apui mubhak jilet banta

Yoh nyan sosah po samlakoe
Tahe keudroe po jroh rupa
Leumah pike bak ate droe
Lon uroe nyoe hilang nyawa

Teuma neubeuet saboh isem
Apui dum len mate fana
Neujak laju rot geunireng
Ka troh po lem bak deyah raya

'oht roh banta bak tempat nyan
Deungo teelan lon calitra
Ureueng dua nyang na sinan
Laen bak nyan han saboh na

Ureueng dua sinan rumoh
Jimeuseunoh tueng pusaka
Jimeuseunoh tudong tungkat
Jimumat-mat meuhue hila

Bandua peue beu roh sidroe
Di adoepi han jirela
'oh troh keunan banta jieu
Ka neulalu ureueng dua

Jipeurab le laju keunan
Ubak Usman meulumba-lumba
Wahe teungku payong alam
Kamoe tuan ka meudawa

Neuhukom lon rijang-rijang
Bek meusagang ngon sibeuna
Pusaka ayah nibak kamoe
Teungku jinoe hukom sigra

Meugoh putoh bukom sampoe
Be neuwoe dilee neugisa
Cut Usman tanyong rijang
Peue peunulang dua gata

Wahe teungku kon peunulang
Peuninggalan bak ayahda
Teuma seuot puteh lumat
Bek barangpat ngadu dawa

Duek bak teupat nyang meusambot
Hana patot bak rot raya
Tiep-tiep hukom kon barangpat
Duek bak teupat nyang meusaja

Teuma jiba bak meunasah
Bak deyah teupat seunia
'oh sare troh ubak teupat
Jijok leugat ngon areuta

Jok bak jaroe panyot tanglong
Tungkat tudong neumat sigra
Nyoekue teungku nyang meuseunoh
Pakri nyang jroh bak syekhuna

Bandua peue beu roh sidroe
Bek le kamoe nyang meudawa
Cut Usman neukheun meunoe
Peue seubab nyoe jeuet meudawa

Sidroe tudong sidroe tungkat
Meunan adat hukom beuna
Jiseuot le pantah rijang
Han jeuet meunan he syekhuna

Meunyo meunan he teungku droe
Dua kamoe han peue gata
Adat meujeuet meunan bagoe
Tan le kamoe pake subra

Samlakoe cut lom kheun meunoe
Deungo kamoe dua gata
Peugah kasiet ubak kamoe
Uroe nyoe lon hukom gata

Jipeugah le pantah leugat
Tudong tungkat raya guna
'oh taseuon ateueh ulee
Hana soe thee seupot mata

Teuma tungkat glong bak bumoe
Jeuet le jinoe saboh kuta
Dalam kuta na meuligoe
Peunoh asoe sianeka

Ngon dendayang han peue peugah
Rupa indah muda muda
Rakyatpi le that barollah
Guda gajah kandran rata

Ngon pahlawan hana sakri
Gunong tinggi jigeulawa
Ngon peurise dum jisandang
Peudeueng sajan deungon cokma

Pahlawan dum juah juah
Muka mirah sang nuraka
Rakyatpi le that barollah
Cidah cidah muda muda

Dum peukara sinan ase
Hana peue le tajak mita
Barangsoe prang keunan han troh
Sakti utoh dum lasyeuka

Han ek mate dum pahlawan
Paku Tuhan nyang karonya
Abeh jipeugah awai akhe
Ka neutukri dum peukara

Cut Usman neukheun nyoeban
Deungo kaman dua gata
Meunoe hukom nibak kamoe
Wahe adoe bek meudawa

Aneuk batee jinoo lon srom
Plueng tateugom dua gata
Soe nyang teumeung beu kong jimat
Tudong tungkat keu jih jeumba

Neusrom batee Cut Usman
Ban boh sungkam plueng jiguda
Sigo jidrop aneuk batee
Hana lagee jeuet lom dawa

Kheun di aduen awai that kee
Meuteumeung batee dudoe gata
Jimeudawa kiam leupah
Jimeureupah nibak nyang ka

Teuma jiwoe ubak Usman
Neukheun nyoeban bek meudawa
Bahle lon srom batee laen
Gata po lem bek that gubra

Teuma batee neusrom lagi
Plueng jilari jih bandua
Neusrom jarak batee jeuoh
Jiplueng sunggoh silagoina

Jiplueng pantah padok linggong
Neucok tudong top keupala
Neucok tungkat mat u jaroe
Leugat neuwoe banta muda

Ureueng dua jipreh neusrom
Rimueng teugom keunong daya
Keunong taki bandua droe
Geunap uroe jimeudawa

Hana neubri uleh Syiah
Jimeureupah adoe ngon a
Teuma jikheun uleh adoe
Meunoe bagoe jibeurkata

Pakon batee hana teusrom
Tariwang lom jak udehta
Kadang gop nyan biek pancuri
Biek teumaki waba puta

Cuba riwang tajak kalon
Pakri bangon peue bicara
Meunan pike aneuk bisoe
Bandua droe lom jigisa

'oh troh keunan jih dua droe
Samlakoe han le deueh rupa
Seubab tudong ka bak ulee
Han le lagee seupot mata

Cut Usman sinan teudong
Di hadapan ureueng dua
Neukheun sikrak haba wayang
Peue tapandang gata dua

■ Gata salah bandua droe
Geunap uroe tameudawa
Han tom hukom meunoe bagoe
Dilee puroe nibak ja ja

Tudong tungkat bahle keu kee
Jak tham asee gata dua
Kon hak gata pusaka nyoe
Ulon sidroe nyang po jeumba

Jinoe lon kheun haba nyang trang
Hukom simpan bek le dawa
Meunan hukom nibak Tuhan
Gata abang jakleh gisa

Bek dawa le baranggajan
Lon kuriwang tinggai gata
Ban jideungo meunan tuto
Jitajo ateueh cut banta

Jikeumeung dorp muda samlakoe
Bandua droe beungeh raya
Neugrop bacut muda seudang
Po rimueng cang seupot mata

Teugom keunoe teugom keudeh
Payah abeh po ceulaka
Lom banta kheun haba meunoe
He dalem droe bek meuseunda

Idin gata bandua droe
Pusaka nyoe bah keu hamba
Nyang kon tuto peue tapeugah
Gata Syiah that ceulaka

Bak kusangka kon pancuri
Bajee haji kueur rupa
Ngon syeureuban ateueh ulee
Raya lagee ube raga

Peurupa droe miseue teungku
Kajak tipu kamoe dua
Kon lon tipee he dalem droe
Pusaka nyoe nibak gata

Ka lheueh neubri uleh Syiah
Ka neupeugah ubak hamba
Neuyue jak cok keu lon tuan
Han neupulang keu dua gata

Jitajo lom aneuk bisoe
Bandua droe ateueh banta
Jiteumeung le bak jiteugom
Jimat ngon kong punca ija

Cut Usman sang meukarat
Neubet leugat jaroe dua
Neutampa le bandua droe
Aneuk bisoe ka teurhanta

Saketji that hana bagoe
Lheueh le jaroe punca ija
Teubiet meuk mata na sigantang
Banta seudang ate suka

Hana daya jicok pulang
Jikheun rijang meunoe haba
Cok keu gata tudong tungkat
Bit salah that kamoe dua

Peuet thon sabe lon meureupah
Teungku ayah hana rela
Adat jibri masa dilee
Bahle keu kee aneuk tuha

Han jitem bri peue kupeugah
Jireupah geunap-nap masa
Muka paleh hana tuah
Got bahle bah cok keu gata

Cut Usman deungo meunan
Neujak yoh nyan lugat gisa
Hoka gata teungku Syiah
Taço langkah jakleh gisa

Uleh aduen jikheun meunan
Cut Usman jarakpi ka
Bak jisangka mantong sinan
Jikheun nyoeban bak adekda

Hoka geujak Teungku Syiah
Ka geureupah lon ngon gata
Seubab kasiet ka tapeugah
Allah Allah ka ceulaka

Meunyo meunan wahe adoe
Kon geutanyoe po areuta
Hana neubri uleh ayah
Seubab salah tameudawa

Bek taweueh le he puteh di
Niet khanduri keu ayahda
Meunyo hana takhanduri
Hana asi tueng pusaka

Tudong tungkat keu seudeukah
Samadiah satu laksa
Meunan jikheun ubak adoe
Sira jimoe ngon ie mata

Jiseuot le pantah rijang
Gata suang kreueh that jungka
Kukheun meunoe kakheun meudeh
Han kapateh lon kakanda

Jinoe peue lom tameung peugah
Teungku Syiahpi that buya
Geupeugot droe miseue teungku
Syiah hantu waba puta

Adat meuteumeung masa bunoe
Kuplah asoe beu jeuet dua
Seungap haba bandua droe
Aduen adoe leugat gisa

Teuma jiwoe ubak ibu
Nyoekeu baro jiwoe bak ma
U rumoh han tom jiwoe le
'oh ltheueh mate po ayahda

Lale dawok jimupake
Sinan lam gle meuhee hila
Leugat jiwoe bandua droe
Troh sampoe ubak bunda


Teuduek haba dilee siat
Lon riwayat po cut banta
Lon peuriwang ubak bunoe
Deungo adoe dumna gata

Samlakoe cut woe keumbali
Ubak pari dalam paya
'oh troh keunan saleuem jibri
Cut juhari ka troh gisa

Pari tanyong pantah laju
Na troh napsu nyang tamita
Cut Usman seuot pantah
Insya Allah troh ban pinta

Ka meuteumee tudong tungkat
Bri halarat Tuhan Esa
Cut Usman ploh payah
Aneuk lidah tanyong sigra

Peue meuteumeung he ayah droe
Nyang tapuwoe nyang tamita
Wahe aneuk bungong uroe
Po samlakoe troh ban pinta



Bak meuseuke buet halarat
Troh dapat ban napsu hawa
Wahe aneuk po samlakoe
Bak lon jak nyoe that seungsara

Kareueng tajam han lon ingat
Lon puteupat gunong raya
Ka troh lon jak deungon lon woe
Po samlakoe tuah gata

Wahe ayah payong nanggroe
Keu ma putroe teh bicara
Jinoe ayah neuleueng jaroe
Bak uroe nyoe lon jak tueng ma

Saleh pakri bunda kamoe
Lam meuligoe kadang hana
Saleh udep saleh mate
Saleh han le trep ka lama

Saleh mantong lon jak kalon
Idin keu lon he ayahda
Meuna umu bak lon jak nyoe
Rijang keunoe ulon gisa

Lon ba keunoe ma lon putroe
Rijang lon woe bak ayahda
Banta Hasyem jibeudoh le
Cut boh ate that seutia

Cut Usman neukheun nyoeban
Aneuk badan bek that lanja
Buet nyang ka trep bek tatuntut
He banyak cut deungo hamba

Barangpeue buet bek teudap-dap
Bak halarat hana rela
Meugoh neubri uleh Allah
Toh pakribah tabicara

Uneun jijok wie bek jithee
Meunan lagee he aneukda
Tapreh dilee bungong mirah
Dang lon peugah bak syeedara

Ulon peugah nibak pari
Lon keumbali sajan gata
Cut Usman meupeugah kri
Ubak pari nyang lam paya

Teuma neukheun le bak pari
Awai akhe neupeuhaba
Ulon heundak teubiet sinoe
Lam paya nyoe lon keulua

Gaseh sayang bak uroe nyoe
Keu lon sidroe dagang hina
Syeedara han kawom lon tan
Meulaenkan ngon tulong gata

Tan pat laen lon peugah droe
Gata sinoe dum syeedara
Pari seuot insya Allah
Han peue salah he sripada

Cit patot mee ulon ikot
Hana patot lon meudawa
Beudoh teungku cut bintang sret
Lon ikot barangpeue sabda

Jadeh teungku tatueng putroe
Taprang nanggroe tapoh raja
Hana patot buetjih meunoe
Tuanku droe jiboh singkla

Abek laot neujeumeurang
Nyawong hilang han neukira
'oh troh keunoe jimeuayang
Raja suang akai hana

**Adat mate geutanyoe siblah
Hana salah buetteu beuna
Raja pari beungeh leupah
Dum blah-bicah jen lam paya**

**Pahlawan dum gagah gagah
Ek jiplah gunong raya
Jinoe teubiet po samlakoe
Jen meukatoe sajan neuba**

**Deungon aneuk bandua droe
Cut samlakoe banta muda
Neujak laju hana pioh
Paya neubloh troh lam data**

**Troh bak padang nyang that luah
Rupa indah hana tara
Luahpi that hana macam
Teumplat muprang pari paya**

**Tan ureueng duek bak padang nyan
Di sinan pioh lasyeuka
Sinan teumplat jen apeuret
Han tom siblet ureueng teuka**

**'oh dum cicem nyang teureubang
'oh troh keunan mate fana
Pari jikheun bak Usman
Bek junjongan le neubungka**

**Bak padang nyoe teumplat muprang
Po junjongan peugot kuta
Nyoekeu teumplat dong sipai
Teumplat kami meuen ganja**

**Samlakoe cut pioh sinan
Bak padang nyan hana dawa
Neuek tungkat ateuh bumoe
Jeuet meuligoe deungon kuta**

Meuligoe jroh hana bagoe
Peunoh asoe sianeka
Rakyat le that ngon.pahlawan
Ngon dendayang jroh-jroh rupa

Pahlawan dum uguh-ugoh
Rupapi jroh muda-muda
Kuatpi that ngon beurani
Le that sakti bak jimeujra

Nyang di rakyat han ek kheun kri
Keumurah bali raya raya
Wie ngon uneun babah pinto
Iiato meuriam lila

Cukop ase seukalian
Cut Usman laen kira
Ka teuingat dalam ate
Jinoe pakri lon bicara

Bah le lon yue jak tueng putroe
Bak po ma droe Ni nyang tuha
Meukon meunañ hana teuntee
Yoh goh meuthee dum bak cutda

'oh ka meuthee jeuet meusagang
Meuka jeuet prang peue lom guna
Neupeugah le ubak pari
Wahe akhi dum syeedara

Jinoe ulon kupeureugi
Lon peugah kri dum bak gata
Ulon heundak jak tueng putroe
Lon puwoe keunoe lam kuta

Han jeuet sideh putroe seudang
Yoh goh jeuet prang lon bicara
Teuma seuot raja jen pari
Jipeugah kri bak cut banta

Pakri tajak he samlakoe
Raja nanggroe jipoh gata
Meuka mate gata sidroe
Keupeue kamoe hana guna

Samlakoe cut seuot pantah
Insya Allah han binasa
Meubek rame lon jak sidroe
Teumpat kemoe troh rahsia

Meunyo meunan po samlakoe
Neujak jinoe rijang gisa
Beu ingat that tuanku droe
Seubab kamoe hana neuba

Insya Allah tulong Tuhan
Han peue rakan tajak gata
Cut Usman neupeureugi
Troh le bak Ni dilee nyang ka

'oh troh keunan buleuen peunoh
Ek u rumoh banta muda
Po Ni teuduek sinan sidroe
Po samlakoe le neusapa

Assalamu'alaikom wahe ma droe
Ka troh lon woe ma bak gata
'oh neukalon uleh po Ni
Sang neuturi sang-sang hana

Han neujeuet kheun Cut Usman
Meuri gop nyan lheueh a mate ka
Ka jipoh le raja nanggroe
Ngon aneuk droe bijeh mata

Cut Usman meunoe neukheun
Cut buleuen peugah le bak ma
Deungo he ma ulon peugah
Sipatah lon kheun bak gata

Gaseh sayang ma meutuah
Meurak Asanah jak tueng le gata
Pat geurante putroe indah
Beudoh pantah keunoe taba

Tajak he ma keunan leugat
Gata siat lon seuraya
Po Ni seuot teuma nyoeban
Aneuk badan lon peuhaba

Han jeuet lon jak bungong pade
Meuhad mate 'oh lon teuka
Po Ni neukheun ubak Usman
Aneuk badan tadeungo hamba

Cut Usman ka hana le
Dilee mate saboh masa
Jipoh uleh putroe nam droe
Raja nanggroe po aneukda

Jiñoe gata pane tajak
Putroe Meurak ho tameung ba
Cut Usman he boh ate
Ka lheuuh mate ngon aneukda

Aneuk ngon mbah jikoh lihe
Jitiek bangke dalam paya
Aneuk dua rupa that jroh
Sigo geupoh ureueng tiga

Aneuk cuco han jigaseh
Raja paleh biek ceulaka
Cut Usman lom neupeugah
Bek neupeugah nyang kon haba

Bak lon he ma han peue peugah
Ka lahe sah lon eu nyata
Nyoekeu ulon Cut Usman
Karonya Tuhan udep nyawa

Bek teu jalok he ma payong
Nyeokeu ulon aneuk gata
Tulong gaseh ma meutuah
Meurak Asanah jak tueng le gata

Po Ni yoh nyan lom seuot le
Ka lheu eh mate aneuk hamba
Han tom ureueng le ban udep
That 'ajaeb tuto gata

Taweh keudeh bek taduek le
Meuhad mate gata fana
Patbu gampong pane nanggroe
Gata sidroe buya raya

Meurak Asanah tameung baplueng
Takheun bulueng jido gata
Jak weh laju aneuk asee
Mate kee-kee seubab gata

Lagi judo ureueng saleh
Han jan taweh mate fana
Cut Usman sosah ate
Han neupateh le po Ni tuha

Kukheun meunoe kakheun meudeh
Datok paleh kreueh that jungka
Allah Allah ya Tuhanku
Han tom keueu Ni ceulaka

Han jipateh meusigeutu
Pakri laku lon bicara
Cut Usman kheun lom meunoe
Tadeungo kamoe po ma raja

Dilee ulon bit ka mate
Po tallah bri udep teuma
Buet Tuhanku ulon sidroe
Neubri muwoe nyawong hamba

Buet di Tuhan hana troh thee
Tan eleumee dumna hamba
Udep mate buet di Tuhan
Hana soe tham ban nyang kata

Po Ni yoh nyan leumoh ate
Neutanyong le lom bak banta
Leumoh ate po Ni sidroe
Neukheun meunoe lam bak banta

'oh neukalon nibak ruman
Nyo Usman laen hana
Adat meukon Cut Usman
Pat jituban Meurak muba

Wahe aneuk meuntroe intan
Nyo Usman gata raja
Nyo Usman lon he ma cut
Pakon seupot mata gata

Ban po Ni deungo haba meunan
Neumoe yoh nyan sangat rugha
Neumoe bae tumbok badan
Lon he intan seupot mata

Tan lon turi he boh ate
Ka lheueh mate gop peuhaba
Neuwa neucom Cut Usman
Ubak badan banta muda

He aneuk cut bungong uroe
Ka troh tawoe bak ma tuha
Cut Usman neukheun meunoe
Bek le neumoe wahe po ma

Beu le gaseh ma meutuah
Meurak Asanah jak tueng sigra
Neupeugah lon ubak putroe
Ka ulon woe dalam paya

Insya Allah he boh ate
Adat matepi lon rela
Po Ni beudoh neujak laju
Bak cut meulu Meurak muda

'oh troh keudeh ubak putroe
Neuhareutoe dum peukara
Wahe po cut payong nanggroe
Nyang troh keunoe jak bak gata

He putroe cut bungong peukan
Cut Usman preh di lua
Lon he po cut ureueng suroh
Nyang jeuet troh lon jak bak gata

Seumbah saleuem Cut Usman
Keu cut intan bungong jeumpa
Neuyue jak tueng bungong peukan
Beurjalan siat u lua

Neukheun bak lon sideh bunoe
Beu troh putroe bek trep lama
Neujak laju bungong rihan
Sajan- sajan ngon po Ni tuha

Kuta hekeumat ka na di blang
He buleuen trang jroh lagoina
Kuta manyang tujuh pangkat
Rakyat le that han teukira

Baranggasoe hana dapat
Han troh hajat keunan teuka
Ngon meuriam han peue peugah
That barollah lingka kuta

Rakyat le that subhanallah
Kuta luah hana tara
Nyang beude cut aneuk timah
Keumurah panyang lhee deupa

Ka meuriti raya babah
Geutatah ngon ie peureuda
Meudeueng leuntek dum meutatah
Sarong mirah ija komkha

Di sipai han peue peugah
Jidong siblah dum mubanja
Sikin panyang rupa indah
Meutatah ulee suasa

Nyang lhat bari got that ulah
Rupa cidah muda muda
Nyang mat tumbak muka juah
Lam beureukah jitop sigra

Pahlawan le uguh-uguh
Panglima jroh teuga-teuga
Kon sulet lon he putroe jroh
Cuba beudoh jak peunyata

Nyang me beude jidong siblah
Got that ulah dum mubanja
Di sidadu hana peue kheun
Jimat peudeueng puteh mata

Peudeueng leuntek ulee patong
Jimat ladom dum u lua
Bandum ureueng han peue peugah
Cidah-cidah silagoina

Saboh kawom mata mirah
Saboh ulah puteh safa
Saboh kawom jimat tunam
Meuriam lila teumaga

Ladom ureueng jimat ngon kreh
Jiduek jieh sit lam jaga
Ladom ureueng beuet Quruan
Sinan dalam kuta banta

Jido gata he cut intan
Bangsawan aneuk bandua
Ureueng muda han peue ingat
Jimumat-mat dum di lua

Dalam kuta tamong grum-grak
Geudumbak deungan biula
Ureueng nanggroë keunan dum jak
That galak jikalon rupa

Bandum ureueng jidak keunan
Seubab ingen keu cut banta
Binteh rumoh geucat ie-meuh
Jroh that peungeuh jiplueng cahya

Aneuk po cut Hasyem Pari
Siribee wadi ireng sama
Ho nyang neujak han tom reunggang
Seunapang sarong suasa

Dua aneuk sabe sabe
Hana tom cre rakyat dumna
Yoh nyan putroe ka teupike
Hana mate aneuk hamba

Bit nyoe he ma ban neupeugah
Bek beurakah troh 'an tuha
Wahe po cut neukoh lidah
Meuhana sah ban lon kata

Hana sulet bungong riwat
Lon taot that neupoh hamba
Meutan po cut ban lon peugah
Neukoh lidah beu jeuet dua

Yoh nyan putroe beudoh pantah
Ate dasyah dalam dada
Putroe Meurak neujak rijang
Dua sajan ngon Ni tuha

Ban sare troh u bineh blang
Cut bintang neukalon rupa
Neueu kuta leusoh manyang
Tatah intan troh lam hawa

Mangat ate bungon mirah
Ban Ni peugah tan meutuka
Putroe ploh di yup asan
Ureueng dalam dum keulua

Jiteubiet le inong agam
Judo sulotan meugah teuka
Tuan Putroe Meurak Asanah
Keunoe langkah bak aneukda

Umi cut nyak Banta Hasyem
Cut Usman po aneukda
Teubiet rakyat seukalian
Jak tueng intan baro teuka

'oh troh keunan dong meureuntang
Uleebalang ngon bentara
Jibet jaroe dum meulayang
Tahe mandang putroe muda

Ampon po cut bungong karang
Tamong rijang dalam kuta
Putroe seuot insya Allah
Hajat langkah ubak gata

Jicok putroe le dendayang
Jijulang puwoe lam kuta
'oh sare troh u leuen meuligoe
Neutren putroe di cong rungka

Neupeurab le Banta Hasyem
Neujak takdem umineu teuka
Jak meuteumeung bri horeumat
Putroe neumat gusuek keupala

Wahe aneuk jantung ate
Lon kheun han le ka binasa
Bak lon sangka bit ka mate
He boh ate dalam paya

Mantong udep po samlakoe
Tuah kamoe po meukuta
Yoh nyan putroe seumbah la' oe
Sira neumoe ngon ie mata

Wahe judo uleebalang
Ka tariwang bak tabungka
Lon kheun han le he jeunular
Ka hilang ji'uet le naga

Lonpi teungku ka rab mate
Jiboh rante jaroe dua
Cutda bandum sangat jahe
Akai kafe tan seutia

Lawet teungku neucre sinoe
Ulon sidroe rab binasa
Ngon beureukat bandum nab
Sajan wali ngon eelia

Ka seulamat Tuhan neubri
Beureukat Nabi pangulee kita
Beureukat Ka'bah ngon Madinah
Ngon afuwah do'a gata

Meunan neukheun putroe indah
Neumoe bobah ngon ie mata
Cut Usman neukheun meunoe
Bek le tamoe putroe muda

Ka grak Tuhan Poku Rabbi
Meunan neubri ateueh hamba
Seungap jimoe putroe indah
Ate dasyah ngon aneukda

Deungon lakoe sinan sajan
 Cut Usman bijaksana
 Teutap sinan Meurak Asanah
 Ngon cut indah banta muda

Uroe malam ate dasyah
 Pujoe Allah Tuhan Esa
 Suntok kayem dalam rahmat
 Dalam nekmata rok-rok masa

Teuduek 'oh nan dilee siat
 Lon riwayat aneuk raja
 Jinoe laen ulon sambat
 Bek panyang that he syeedara

Urae malam ate dasyah
 Cut Usman bijaksana
 Teutap sinan Meurak Asanah
 Ngon cut indah banta muda

Uroe malam ate dasyah
 Pujoe Allah Tuhan Esa
 Suntok kayem dalam rahmat
 Dalam nekmata rok-rok masa

Teuduek 'oh nan dilee siat
 Lon riwayat aneuk raja
 Jinoe laen ulon sambat
 Bek panyang that he syeedara

Urae malam ate dasyah
 Cut Usman bijaksana
 Teutap sinan Meurak Asanah
 Ngon cut indah banta muda

Uroe malam ate dasyah
 Pujoe Allah Tuhan Esa
 Suntok kayem dalam rahmat
 Dalam nekmata rok-rok masa

VII. PRANG NGON RAJA HALIMAN SYAH

Meuriwang bak putroe siti
Aneuk doli raja raya
Putroe Hijo nan geurasi
Daraman Ali aneuk tuha

Meugah adoe ka jilan
Ka hana le lam istana
Kareuna seubab takue geukoh
Seubab gundah guenaya

Nyang jeuet jiplueng cut putroe jroh
Tan meuteuoh bak syeedara
Nyankeu seubab ate saket
Ka bicah phet dalam dada

Putroe nam droe that amarah
Jijak peugah bak ayahda
Wahe ayah raja nanggroe
Pakri jinoo toh bicara

Meurak Asanah han le sinoe
Lam meuligoe jikeulua
Tan jipeugah ubak kamoe
Meugah lakoe lom ka nyata

Masa dilee jih ka mate
Lon tiek-bangke dalam paya
Pakri di jih mate udep
That 'ajaeb he ayahda

Jehpat jinoo jih dalam blang
Kuta reuntang luah raya
Bak lon pike meunan nyum sang
Jilawan prang po meukuta

He du gata sang kon agam
Sidum-dumnan ek tasaba
Tatakot that mate di blang
Beuthat irang gadoh nama

Bitnyo gata akai bingung
Han tatanyong aneuk gop ba
Tatakot that mate jicang
Teuhan pinggang han takira

Meusidum kee ureueng inong
Kujeuet tamong dalam kuta
Meuhan tajeuet he du muprang
Duek beu seunang lam istana

Eu kee teubiet sigo u blang
Kumeucang ngon musoh teuka
Adek putroe kucok pulang
Bah kee meucang duek di gata

Yoh nyan raja saket ate
Neupangge le geusyk panglima
Raja kheun le ubak bujang
Kajak rijang meuseuranta

Teuma geukrah uleebalang
Dum sibarang geuyue teuka
Cut ngon raya beusa seudang
He bujang beudoh beu sigra

Kayue tren keunoe dum u dalam
Ngon sulotan raja raja
Kayue me dum ngon alat prang
Seunapang meuriam lila

Ube **nyang** jeuet mat geudubang
He **bujang** kayue dum teuka
Peukakah prang dum beu ase
Ubat beude ngon boh lila

Bujang beudoh jimudek le
Sampo u gle jiseuranta
Jeuep-jeuep nanggroe jibri surat
Ube neumat poteu raja

Meunoe haba dalam surat
Katreu leugat he bentara
Lon ka jiprang banpeuet sago
Tatreu keunoe dum peutua

Ban jideungo raja pangge
Ka jitren le tuha muda
Tujoh uroe jitren sabe
Sang han lot le mideuen raja

Mideuen peunoh dalam sarat
Jitreu leugat ban ie raya
Abeh jitren banda duson
Seugala don abeh teuka

'oh troh keunan dumna rakyat
Ka jideelat poteu raja
Ampon **tuanku** payong nanggroe
Ka troh **kamoe** peue na haba

Keupeue **tuanku** pangge kamoe
Han tom puroe dilee nyang ka
Siri nanggroe nyan tan wase
Toh siri gle nyang tan musara

Toh kuala nyang tan adat
Han jiantat keu meukuta
Ho neumeung ba kamoe deelat
Ka meusapat kamoe dumna

Bak kamoe dum han le pike
Dumpeue ase jeuep peukara
Kamoe bandum sit ka cakap
Pajan deelat jadeh ngaza

Turon sabda bak halarat
Raja deelat neumeuhaba
Tadeungo he uleebalang
Dum sibarang ngon panglima

Kareuna lon ka sret pinggang
Malee lon sang gop cok ija
Beu le gaseh deungon sayang
Peuek pinggang lon le gata

Mubek that leumah badan
Lon peugah ban dum bak gata
Kon meunalee ulon sidroe
Dum geutanyoe sama juga

Aneuk lon Putroe Meurak Asanah
Ka gop rampah di istana
Jinoe pakri uleebalang
Toh nyang reumbang nibak gata

Mee taseutot atawa han
Cuba kheun ban lon deungo nyata
Kareuna jih ureueng landang
Baro datang keunoe teuka

Teuma seuot uleebalang
Ampon laman po meukuta
Pat tuanku gop nyan jinoe
Nyang cok putroe ho leupah ka

Hana patot deelat laman
Bit nyo jih nyan akai hana
Han jituri ampon deelat
Bit aleh that akai gila

Han jitakot abeh nyawong
Aneuk bajeueng hana mata
Ampon tuanku payong nanggroe
Pat jinoo putroe jroh rupa

Teuma seuot raja nanggroe
Jehpat jinoo di blang raya
Tuan putroe jehpat di blang
Kuta meureuntang indah rupa

Deungon kuta tujuh pangkat
Got that cakap hana tara
Kutapi jroh ngon indah that
Rakyat le that balatantra

Teuma seuot Putroe Hija
Haba bek le he panglima
Keupeue narit meudeh meunoe
Bak uroe nyoeajak ngaza

Jak cok putroe leugat keunoe
Ngon kamoe bek le that haba
Meuhan kateubiet bak uroe nyoe
Ingat keudroe gajah sula

Kaproh kuta ureueng kacang
Kacok rijang Meurak muda
Kah ban gajah sie ban piti
Phet di gaki malee hana

Kah ban gajah sie ban tulo
Phet di baho dum panglima
Dumna raja dalam nanggroe
Hana sidroe beurani kha

Jicok adek lon dalam jaroe
He meuntroe keupeue cit gata
Soe nyang han tem bak buet prang nyoe
Ingat keudroe dum peutua

Nyang inong bandum kurajam
Nyang agam kuboh lam singkla
Kukoh boh-boh kuboh abee
Kukoh-koh lhee kuboh sira

Jakleh teubiet kajak muprang
Po rimueng cang le that haba
Abekh seungap uleebalang
Han le kalam dum bentara

Teuduek 'oh nan dilee siat
Lon sambat keu po cut banta
Di sidehpi dumpeue cakap
Meugeupreh rab musoh teuka

Rotdeh rotnoe jroh that keumah
Han peue peugah pari diwa
Guransang that hana bagoe
Geunap uroe lakee ngaza

Cut Usman neukheun lagee
Tapreh dilee he panglima
Meunan neukheun geunap uroe
Beungeh han soe pari paya

Bak uroe nyan jikheun meunoe
Bah uroe nyoe meujak ngaza
Rakyat le that'kueue macam
Lua dalam mideuen raja

Cut Usman teuma kheun hom
Ban nyang hukom dumnā gata
Ban jideungo sabda meunan
Jigrop yoh nyan u blang raya

Sideh geujak sinoe geupreh
Prang nyoe jadeh kon le pura
Nyang pahlawan kuat-kuat
Nyang ek me brat nam ploh gunca

Nyang pahlawan lon peugah nan
Deungo tuan lon kheun nama
Mula phon-phon nyang pahlawan
Geurasi nan Beuribot Tapa

Sapai bulat miseue bak pade
Beuteh sabe ngon bak u dara
Teugapi that hana sakri
Ngon beurani silagoina

Nyang sidroe treuk nan geurasi
Sulotan Jani geuboh nama
Nyanpi kuat ngon beurani
Ban keudidi bak jisangga

Lom sidroe treuk jen apeuret
Umu that trep dalam donya
Jieu ureueng ube-be pijet
'oh jilet han jan tagisa

Kuatpi that lagi gagah
Jimat siblah beusoe raya
Nyang keupeuet nan Baluri
Dum geuturi'jih geuthee na

Nyang laen dum han le rawi
Han ek kheun kri le that bangsa
Limong ploh droe that pahlawa
Rakyat sajan muploh laksa

Banlimong ploh ka meusapat
Bandum hebat aneuk raja
Nyang sidroe treuk nama Iram
Nam hah pinggang goh troh punca

Raja Ebrahim he teungku beh
Badan kukoh panyang raya
Han peue peugah he teungku beh
Bak musoh han paleng muka

Han tom siblet nyang na jiplueng
Miseue rimueng nyang bueh raya
Rakyat nyan dum han peue kheun le
Han tom mate dalam tantra

Beuthat keunong aneuk beude
Han ek mate ureueng diwa
Ngon keuramat syiah dalam gle
Han ek mate pahlawan kha

Buket Darahi teupat dalem
Uroe malam dalam takwa
Siribee thon ucam syuko
Neupujoe Po Tuhan Esa

Nyankeu seubab han ek talo
Kareuna teungku that mulia
Nyan hekeumat nyang meusampe
Bukon sihe he seeydara

Ngon keuramat teungku syiah
Han ek gagah dumna raja
Nyoe na saboh syae panton
Tadeungo phon ulon peugah

Bukon sayang aneuk seurindet
Kayee apet bandua blah
Amma bakdu sep-sep han sep
'ajaeb subeuhanallah

Bahle dumnar dilee siat
Haba lambat panyang kisah
Teuduek dilee po Cut Usman
Lon karangan raja meugah

Di sidehpi ka rab meugah
Baro sikrak turon titah
Yoh nyan raja neukheun rijang
Bak pahlawan dum kafilah

Jakleh teubiet keudeh u blang
Kajak **cang** Usman Basyah
Jakleh laju keudeh u blang
Kajak prang cut banta indah

Jiteubiet le dum pahlawan
Payong sajan putreh mirah
Ladom guda jimeukandran
Ladom tuan giduek gajah

Di jaroe jimat geudubang
That guransang han peue peugah
'oh'sare troh u teungoh blang
Deuh jipandang kuta luah

Lam kuta dum ureueng kiroh
Teungoh rioh jiseumeugah
Jimeukheun-kheun hana teudoh
Jehpat musoh that barollah

Keukang guda pantah jiboh
U baroh yoh nyan jilangkah
'oh neukalon le cut putroe
Neukheun meunoe bak khalifah

Seureuta ngon neubet jaroe
Cut putroe yoh nyan seumeugah
Neubri thee jinoue u dalam
He jeunulang ubak ayah

Bah tapeugot saboh surat
Tayue intat bak khalifah
Cut Usman neukheun leugat
Ban nyang mangat bak cut indah

Yoh nyan putroe peugot surat
Neuyue intat bagah-bagah
Meunoe narit dalam surat
That **cakap haz** peue tapeugah

Surat nibak Meurak Asanah
Saleuem seumbah keu deelat syah
Pakon deelat ate lupot
Aneuk tulet peue na salah

Han le neutueng ka neutulak
Putroe Meurak wahe ayah
Abeh pike nibak deelat
Neukheun leugat he khalifah

Ampon bak ma lom lon lakee
Taboh aneuk mee lon tan salah
Lon sangka han meunoe lagee
Han tatipee ma meutuah

Hana patot tayue jak prang
Bak pahlawan dum nyang meugah
Takrah rakyat dum sibarang
Tayue jak prang banta indah

Baranggadum tapubeude
Rabbon Kade nyang peusiblah
Gata nyang prangpi le mate
Han meusampe wahe ayah

Bek antara troh lam kuta
'oh lua han troh talangkah
Meuhad akhe malee mata
He ayahda kon lon peugah

Tadeungo lon he ayahda
Han meutuka meuhad teulah
Jinoe ayah baro neuthee
Masa dilee gata meugah

Jinoe hina nibak hina
He ayahda uteuen luah
Meuhad taduek dalam uteuan
Kuta mideuen keu Cut Basyah

Cut Usman nyang keurajeuen
Dalam mideuen nanggroe luah
Hana galak duek lam nanggroe
Gata sidroe wahe ayah

Taboh ulon tatueng nam droe
Jinoe nanggroe gop peurintah
Jinoe baro tathee keudroe
Taeu phang-phoe buet Cut Basyah

Cutda nam droepi that rancak
Hana galak neuduek dasyah
Galak geujak jeuep-jeuep nanggroe
Cutda putroe sayang leupah

Bek he ayah po aneukda
Meu'ah deesya meunyo salah
Han neupateh teulah dudoe
Meuhad neumoe he khalifah

Meunyo hana ban ulon kheun
Neusurung apui dalam babah
Tan meutuka ban kheun hamba
Taeu nyata buet Po tallah

Neupoh ulon tan kareuna
Pateh cutda sulet leupah
Lheueh geusurat ka geulipat
Neuyue intat bagah-bagah

Troh le jime keunan surat
Bak deelat ka jijok pantah
Raja buka deungon jaroe
Neuhei jinoe meuntroe meugah

Troh le keunan wadi meuntroe
Neupeujaroe le khalifah
Yoh nyan meuntroe baca surat
Haba mangat han peue peugah

**Awai akhe saket mangat
Dalam surat geukalon sah
Raja neukheun teuma leugat
Pakri mangat cuba peugah**

**Si nyak putroe putik langsar
Dalam surat ka jipeugah
Haba jibripi that mangat
Sang ajimat nangroe Makah**

**Bit ban jikheun si nyak putroe
Aneuk lon nyoe that meutuah
Meunyo taprang sosah dudoe
Geutanyoe han ek tagagah**

**Teur a marit Putroe Hijo
Haba bek le wahe ayah
Salang sidroe ureueng lakoe
Geutanyoe le han ek gagah**

**Meunyo ayah le peue pike
Dudoe akhe meuhad teulah
Jinoe ayah tueng meulintee
Peugot juree nyang that luah**

**Teuma kamoe nyan tan lakoe
Bah muboh droe wahe ayah
Bah muboh droe dalam uteuen
Bah jimakeuen uléh gajah**

**Meunan jikheun si nyak putroe
Raja nangroe ate sosah
Poteu raja kheun bak meuntroe
Pakri jinoe cuba peugah**

**Tatueng po jeh gadoh po nyoe
Buet geutanyoe meuhad teulah
Lon cok saboh gadoh nyang le
Nyoekeu baro teuka sosah**

Meunyo meunan tuanku droe
Bahle jinoe prang tagagah
Meunan jikheun dumna meuntron e
Putroe nam droe suka leupah

Poteu raja ka neuieum droe
Dumna meuntroe teubiet pantal
Teuduek dilee 'oh nan siat
Lon riwayat banta indah

Banta suroh dumna rakyat
Jirapat beude meutatah
Phon-phon beudoh Beuribot Tapa
Jaroe dua jibet pantah

Ampon tuanku po meukuta
Bah lon cuba he khalifah
Jiteubiet le sigra-sigra
Deungon tantra han peue peugah

Jiba rakyat nam ploh ribee
Taeu bajee hijo mirah
'oh meuteumeung dua sukee
Prang dilee laju jigagah

Taeu jidong dum meureuleueng
Nyang useueng jimat keumurah
Nyang aneuk mietpi saboh buet
Beude cut-cut ban keumurah

Nyang mat beude Kamarani
Jipeunari lam blang luah
Di sinoe sigo beureutoh
Keudeh siploh ureueng reubah

Taeu jitak seun-seun limong
Leubang-leubong bandua blah
Ladom ureueng putoh jaroe
Ladoin adoe ulee beukah

Beuribot Tapa that guransang
Rakyat jicang that barollah
Darah ile ka peunoh blang
He rakan bukon beurakah

Ladom keunong aneuk beude
Meugule takalon reubah
Ureueng nanggroë le that mate
Keunong beude nyang ineutatah

Keumurah bali panyang-panyang
Awe sonsang dalam babah
Dumna ureueng abeh mumang
Su meuriam that barollah

Jicang ureueng dum meukeuba
Beuribot Tapa ureueng meugah
Ureueng nanggroë ate lia
Ngon ie mata taeu jojah

Ureueng inong nyang di gampong
Lakee tulong bak Po tallah
Jiteubiet lom dum pahlawan
Rot Usman banta indah

Jijak laju keudeh u blang
Masok lam prang dum kafilan
Teuma beudoh Sulotan Jani
Nyang beurani lagi meugah

Jiba rakyat muploh katoe
Sulotan nyoe nyang peurintah
Lom jibeudoh jen apeuret
kakyat jilet han peue peugah

Ureueng nyan dum ka bicah phet
Rupa sabet miseue gajah
Raja Ebrahim di likot nyan
Raya panyang kon beurakah

Neuek laju dalam kawan
Neureugam peudeueng meutatah
Rupa bandum sabe-sabe
Hana mise ngon tapeugah

Abeh bandum teubiet u blang
Masok lam prang ureueng meuga
Nyang rot rajapi han peue kheun
Wie ngon uneun pahlawan meuga

Taeu rakyat le that mate
'oh ltheueh beude bandua blah
Mate rakyat nyang rot raja
Han teukira that barollah

Jibeudoh le Sulotan Sarong
'in at payong jroh that mirah
Jipeuek prang meusong-abong
Ban seudong mukajih juah

Meurumpok ngon Beuribot Tapa
Jimeuhaba saboh patah
Na kadeungo he panglima
Peue nan gata cuba peugah

Patbu gampong pane nanggroe
Peue buet keunoe tameulangkah
Soe yue jak dum gata keunoe
Peugah jineo lon deungo sah

Beuribot Tapa jiseuot le
Kadeungo he raja meugah
Lon nyoe namiet Cut Usman
Ka katuban kaingat kah

Wahe raja Sulotan Sarong
Jak woe u gampong bak khalifah
Hana patot talawan lon
Adek payong dudoe teulah

Usman Basyah raja kamoe
Judo Putroe Meurak Asanah
Nanggroe ulon na katupat
Dalam tungkat Teungku Syiah

Sireutoh thon duek lam tapa
Lon deungo haba dum gop peugah
Aneuk ngon mbah ka jimuprang
Hana sayang meuube drah

Nyang got jinoo jak kariwang
Bek kuantam kaingat kah
Meunyo sinoo dalam padang
Kee guransang kujeb darah


Na katuri Beuribot Tapa
Namiet raja banta indah
Nyang got jinoo jakleh gisa
Bak raja meunan kapeugah

Kayue laju meukeurija
Linto kuba jeuoh langkah
Linto baro na katusoe
Raja kamoe Usman Basyah

Nama ulon Beuribot Tapa
Suroh raja yue jak poh kah
Nama dilee Raja Juhan
Yoh sajan ngon Teungku Syiah

Sireutoh thon duek lam tapa
Suntok masa seumbah Allah
Teuma neuboh lon lam tungkat
Neumeusyarat ubak Allah

Raja ulon teuma jinoo
Nak katusoe Usman Basyah
Sulotan Sarong seuot yoh nyan
Han kutuban peue kapeugah



Pane ureueng si Usman nyan
Cuba kheun ban kudeungo sah
Si Usman nyan raja kheun kri
Jih pancuri sulet leupah

Beuribot Tapa teuma seuot
Hana patot waliyullah
Hana patot nyan pancuri
Raja 'ali that meutuah

Raja Juhan beungeh raya
Cokma sigra le jireugam
Jipoh sigra ateueh ulee
Kreueh sang batee wahe abang

Yoh nyan beungeh Sulotan Saro ig
Jiek seudong nam ploh lapan
Jibet sion bulee mata
Jigeulawa dalam awan

Na sikeujap he syeedara
Apui teuma sret di manyang
Ban-ban gunung apui dum sret
Meupalot meukumang-kumang

Tantra Juhan jikeumeung tet
Sang teumakot ulee guyang
Raja Juhan khem teuseungeh
Ka rumeh 'oh jieu macam

Cok ek mata na bube ok
Jiteupok bak tanoh lapang
Na sikeujap teuka reudok
Ujeuen le trok apui peujam

Ujeuenpi that ngon ie raya
Apui rata abeh karam
Apui sakti dum abeh len
Ie raya tren ile tajam

Sulotan Sarong beungeh meugasui
Jicok apui saboh reugam
Teuma jisrom dalam mudeuen
Apui nyan dum laen macam

Apui nyan jeuet keu busu bleuet
Mata ban pheuet tajam tajam
Taeu jitren dum meurui-rui
Miseue apui mirah hilam

Tantra Juhan dum teumakot
Meusurot-surot meukumang-kumang
Jitakot that keu busu bleuet
Keunong bak pruet nyawong hilang

Raja Juhan saket ate
Ka jibeuet le ismu alam
Jibeuet saboh ismu keuramat
Angen barat jitren tajam

Jitren angen puteng beuliong
Kayee puntong patah meukhan
Aneuk busu bleuet han jeuet jitren
Ka angen ron lam rimba Tuhan

Hana sabohpi tinggai le
Ka angen me bade tajam
Sulotan Sarong beungeh han soe
Cokma beusoe ka jitatang

Jipoh Juhan keunong kudok
Tamse reudok su meukeutam
Bek antara teupeh asoe
Meubulee dhoepi han peusam

Sulotan Sarong kuyut ate
Cokma han le patah meukhan
Ban jikalon cokma patah
Surot bagah u beulakang

Teuma Juhan neukheun meunoe
Wahe adoe bek meuayang
Pakon adoe ka tasurot
Hana patot buetteu meunan

Teugo kutheun kapoh laju
Han sigeutu tatem sayang
Jinoe tatheun kubalah droe
Han adoe keunoe tariwang

Bak pihak lon ureueng tuha
Lon saba tapoh ngon pacang
Hana tangieng siblah mata
Bak lon sangka bek jadi prang

Gata tawoe ubak raja
Meukeurija linto datang
Mangat tapajoh bu meukuah
Sie meugapah keubeue panggang

Raja Juhan lom kheun meunoe
Bek ngon kamoe tameuayang
Bek dum gata wahe adoe
Raja nanggroe han kupantang

Sulotan Sarong surot laju
Meunyum kuyu han jeuet pandang
Juhan seutot le di likot
Peudeueng jibet le meulayang

Jitak sigo keunong ulee
Su sang batee tadeungo tam
Reubah sinan ka meuseubee
Meudhoi abee jiteureubang

Puleh mumang beudoh bagah
Jiplueng pantah ban boh sungkam
Teungoh laju Buket Situek
Peugot paruek jak pot kacang

Sidroë pahlawan ka hana le
Jiplueng u gle rimba hutan
Keupeue udep bagoe mate
Han jiwöe le meugoh aman

Beuribot Tapa that jitakot
Sang ka lupot nyawong hilang
Nyoe lon peugah pahlawan tujoh
Tunong baroh dong meureuntang

Su meuriam hana teudoh
Sang-sang runtoih bumoe karam
Dong rot timu Bentara Ubat
Dong rot barat Raja Juhan

Nyang rot tunong Sulotan Jani
Dong rot kiri Teungku Bintang
Rot uneun nyan Raja Pari
Siblah kiri Syam Nadiman

Uneun bacut Tok Salami
Dum jen pari rakyat sajan
Nyang rot barat Datok Makbud
Dong rot laot Keujruen Salam

Abeh bandum ka lon peugah
Pahlawan meugah phon mulaan
Bak jiplueng han tom jitupeue
Bak keumaweue that sukaan

Sibarang alat han jipajoh
Keubai tuboh kulet badan
Nyoekeu baro prang meugeucoh
Tunong baroh jimeutak tham

Rakyat mate subhanallah
Nyang rot siblah deelat makam
Rakyat Usman hana gundah
Tulong Allah sidroe Tuhan

Cut Usman kheun bak rakyat
Uroe nyoe that prang meulawan
Bitpi meunan bek takarat
Sayang delat lon hana ban

Ayah putroe bek jeuet talo
Beu teundo plueng meujan-jan
Bek that malee ayah cutti
Bek jeuet keuji gop peugah ban

Haliman Syah sang ka wang-woe
Ngon aneuk droe jeuet keu lawan
Seubab neupateh aneuk nam droe
Neupoh sidroe han le sayang

Teuma marit Meurak Asanah
He judo sah lon neubuang
Han le neutueng lon di ayah
Sibuleuen sah prang han reunggang

Jinoe judo kri nyang kheundak
Ban nyang galak han le lon tham
Ka abeh ulon bri ingat
Saket mangat phon mulaan

Habapi sret nibak putroe
Rakyat meukatoe galak han ban
Jibri haba jeuep-jeuep sagoe
Bak kawom droe Raja Juhan

Raja limong ploh yoh nyan beudoh
Kutika jroh buleuen lapan
Sajan rakyat dum kafilah
Juah-juah raya badan

Taeu kawom Beuribot Tapa
Mirah mata badan hitam
Saboh kawom raja uleue
Nyanpi han peue tajeuet pandang

Saboh kawom biek Habeusyi
Raya bibi ban bak pisang
Jibeudoh lom biek jen pari
Han soe tukri su geumeuntam

Su meuriam han peue peugah
Langet mirah seugala alam
Leungo bumoe sang meugo-go
Ka tahe cicem teureubang

Sang-sang langet ka mubalek
Sang geuculek mata hitam
Bulee luroh badan pijuet
Seubab han jeuet le teureubang

Binatang gle abeh kiroh
Badan awoh tinggai tulang
Meumpeuen han jeuet jipajoh
Saket tuboh dum binatang

Aneuk manyak lam tingkue ma
Hijo mata ulee mumang
Umu sibuleuen prang meukalot
Bumoe seupot asap meuriam

Jinoe beudoh ureueng patot
Deungo po cut lon peugah ban
Sinoe geujak sideh geuek
Surak deumpek hana kurang

Taeu reubak dum mubalek
Maken jiek hana reunggang
Reubah keng-keueng dum teuduek-duek
Leumbeng prak-pruk dalam kawan

Ladom kandran ateueh rimueng
Kureng di rueng jroh meureuntang
Sandang peudeueng nibak baho
Kulet hijo dum pakaian

Jimeutak tham hana bagoe
Matauroe hana le trang
Rasa bumoe keumeung beukah
Su keumurah ngon meuriam

'oh ban sigoe lheueh keumurah
Taeu reubah dua ploh nam
Teuma beudoh Raja Ebrahim
Han jeuet tangieng bak geuduban ;

'oh ka jitak hana meutheun
Beuhe geusuen han neupantang
Beudoh sideh Datok Sadon
Nyoe baro phon prang meutunan ;

Cokma beusoe jimeutungkat
Mata jagat bibi hitam
Raja Ebrahim bri nasihat
Neukheun leugat bak pahlawan

Wahe dalem peue na hajat
Peugah leugat bak lon tuan
Datok Sadon teuma seuot
Jak tueng po Cut Meurak intan

Meurak Asanah ka gop reubot
Aneuk tulet deelat makam
Raja Ebrahim lom neuseuot
Narît neudhot peue haba nyan

Pakri takheun tameung reubot
Hana patot wali Tuhan
Neubet cokma nyang seureuloe
Ka neuseudoe Datok suang

Datok Sadon neupeulheueh droe
Suara bagoe reudok awan
Ebrahim poh keunong kudok
Sret tangkulok teuploh pinggang

**Keudeh keunoe geumeuharah
Sabe meugah deungon tungang
Han tatuho tunong baroh
Meugeureupoh su geudubang**

**Langet bumoe sang meutoto
Nyum ka hanco sang ka leukang
Jeuep-jeuep sagoe tadeungo riah
Hana teudoh siat reunggang**

**Langet manyang sang-sang runto
Bumoe tujuh sang meulinggang
Su meuriam meugeureupoh
Hana teudoh uroe malam**

**Gunong manyang sang ka reule
Le that mate dum binatang
Subhanallah prang that raya
Pari paya dum guransang**

**Ureueng nanggroe le that mate
Darah ile miseue kubang
Raja rakyat han meuri le
Le that mate uleebalang**

**Pahlawan nyang uguh-ugoh
Le that jipoh mate di blang
Rakyat Usman hana teupéh
Ureueng saleh tulong Tuhan**

**Nyang blah raja le that teupéh
Ureueng saleh geujak lawan
Nyang blah raja le that mate
Han ek kheun le bak bilangan**

**Mate sireutoh troh siribee
Le that lagee nanggroe raja
Haliman Syah luah keurajeuen
Nam blah buleuen peulayaran**

'oh nan jeuoh linteueng nanggroe
Buju sampoe nam thon jalan
Jibri surat jeuep-jeuep sagoe
Jipeugah droe ka sret pinggang

Rakyat jitren dum sinaroe
Keujruen meuntroe panglima prang
'oh sare troh ka jideelat
Poteu leugat suroh u blang

Jibeudoh le dumna rakyat
Teubiet leugat u geulanggang
Pahlawan dum kuat kuat
Cokma jimat ban bak mamplam

'oh meuteumeung dua pihak
Jimeutop tak hana reunggang
Le that mate patah rusak
Tangkurak sang bruek lam umpang

Jihei sare ngon jisurak
Sang meugrak-grak bumoe karam
Jitop leumbeng peulheueh kapak
Taeu rusak peuet limong nam

Le that mate guda gajah
Keunong keumurah ngon meuriam
Raya that prang han peue peugah
Usman Basyah teubiet u blang

Tuan Putroe Meurak Asanah
Neumeukeumah ngon dendayang
Sireutoh droe sabe sabe
Rupa mise bagoe bintang

Jigeutang ok palet ija
Miseue rupa ureueng agam
Jimat peudeueng nibak jaroe
Cut putroe jitren le rijang

Beungehji that tuan putroe
Miseue bagoe rimueng geumeuntam
Jijak laju sajan lakoe
Ngon aneuk droe muda seudang

Cut Usman di yup payong
Panyot tanglong toe bineh blang
Ban jikalon uleh rakyat
Teubiet leugat uleebalang

Jipeurab le ubak Usman
Dua sajan putroe intan
Jibet jaroe pantah laju
Pakon teungku teubiet u blang

Jak udeh woe dalam kuta
Ngon aneukda putroe bintang
Meunyo teubiet tuan putroe
'aeb kamoe jeuet keu lapang

Kamoe mantong bansineuna
Goh meurasa theun geudubang
Nyan ka muprang ureueng dua
Beuribot Tapa Raja Juhan

Buetpi ubit hana raya
Meusikada goh teumuprang
Neubri idin keu ulon nyoe
Bahle kamoe cuba meucang

Cut Usman idin neubri
Dum beureuhi uleebalang
Dum pahlawan peukeumah droe
Cokma beusoe dum jitatang

Jiek laju jroh mupadoe
Jeuep-jeuep sagoe rakyat simpan
Rakyat Usman bandum keubai
Hana sagai lut geudubang

Beureukat do'a Teungku Syiah
Ngon afuwah Meurak intan
Nyeo sidroe treuk ulon peugah
Kon beurakah ngon meuayang

Masa dilee tan lon seubot
Deungo po cut lon peugah ban
Badan kuat ngon beurani
Cit geuturi jeuep-jeuep alam

Sakti le that hana sakri
Sang gogasi kulet hitam
Badan tumbon han that pijuet
Leupek pruet ube bak mancang

Taeu jijak bacut bacut
Sang han tajeuet meutapandang
Lhee ploh deupa meubideueng : ueng
On geulonyueng peuet hah bidang

Tuleueng gasien na ube krong
Reuhung idong miseue kulam
Mata hitam ube lhee tabak
Ngon talak ban rumoh tuan

Keubah peudeueng lam leupek pruet
Sigo jirahup patah meuriam
Nam hah bideueng paleuet gaki
Nan geurasi Geumpa Alam

Peurab laju bak samlakoe
Jibet jaroe jimeukalam
Ampon tuanku payong nanggroe
Lon uroe nyoe teubiet u blang

Lon jak tulong dum syeedara
Ban lon cuba siblet meucang
Cut Usman jawueub pantah
Han peue salah wahe Tok Pang

'oh jideungo haba meunan
Beudoh yoh nyan Datok Rumpang
Jijak laju jipeuteupat
Dumna rakyat deuh jipandang

Ban jikalon uleh rakyat
Yo meutat-tat seukalian
Jijak laju bacut-bacut
Langkah jibet sibuju alam

Lila peurkasa teuma peugah
Bak khalifah uleebalang
Teuma jikheun lom bak rakyat
Wahe sahbat peue jeh datang

Raya leupah hana sabe
Sang miseue gle gunong mam
Ban jikalon dum teukeujot
That teumakot uleebalang

Dumna rakyat that teumakot
Ka jisurot jiteureubang
Abeh jiplueng dumna rakyat
Sang ka trok hat ajai datang

Rakyat abah bandum jiplueng
Peungeuh ureueng dalam padang
Leugat jiplueng keudeh u gle
Ka sampe lam rimba hutan

Hana tinggai le meusidro
Ka soh nanggro
Seubab paleh putroe nam droe
Raja nanggro ka meulang-lang

Rakyat Umans let di likot
Gampong jitot seugala alam
Tan le sidroe tinggai ureueng
Abeh jiplueng inong agam

Areuta tinggai han jiingat
Teumakot that yo meugam-gam
Aneuk peurumoh abeh jibri
Le nyang mate nyawong hilang

Ladom nyang plueng lam teureu jeh
Sang ka abeh nyawong karam
Taeu jiplueng meuhah-meuhah
Ban asee grah woe lam bagan

Sret lom pinggang teuploh silu wue
Han jitupeue lam beurawang
Meunan bagon ureunge nanggro
Han le sidroe na meulintang

Sayang raja deungon putroe
Lam meuligoe taeu bok-bang
Ureueng nanggro tan le sidroe
Raja neumoe tumbok badan

Daraman Ali peugah teuma
Wahe ayahda bek syugolan
Bek le he du ate sosah
Tapabanbah kheundak Tuhan

Seubab paleh Putroe Hijo
Nyoekeu baro phon hinaan
Pakon jipoh Meurak Asanah
That meutuah gaseh Tuhan

Meurak Asanah that keuramat
Troh ban hajat jipintaan
Ka troh he du ban lon peugah
Nanggro nyoe sah keu cut intan

Jinoe adek jikeurajeuen
Di lon aduen bah hinaan
Tapabanbah kheundak Allah
Usman Basyah roh tunangan

Meunan kheundak bak Tuhanku
Geutanyoe he du han troh tuban
Langkah redeuki peutumeuen mawot
Silap lupot nibak Tuhan

Buet nyan bandum bak Po tallah
Han jeuet ubah ubak ensan
Jinoe he du ulon peugah
Saboh patah lon meukalam

Meuneupateh ka meutuah
Meunyo ubah lom tamuprang
Bek le tayue aneuk nanggroe
Beudoh keudroe tameulawan

Keupeue tayue lom peutua
Tan seutia uleebalang
Tan meusidroe mubicara
Patot gata dum jibuang

Abeh jiplueng dum lam rimba
Tinggai gata han soe sayang
Hana patot dum peutua
Jiboh nama beuthat lapang

Nyan sa di du neupulang kuta
Di jih hana jitem meucang
Han meusoe-soe neubri nama
Bak aneuk da seuon idang

Adat musem uroe raya
Tapeugala umong di blang
Tabri keu jih dum areuta
Keu beulanja sie bakmeugang

Saboh geusyk keubeue dua
Tasangka nak jitem muprang
Dum jipajoh laba pangkai
Hana tinggai meusigupang

Nyankeu he du lon peugah hai
Nibak kanjai bahle hilang
Ureung gampong han le sidroe
Ka jiboh droe dara agam

Meugeutanyoe cit tujoh droe
Pakri jinoe toh nyang reumbang
Jinoe he du lom lon peugah
Saboh patah saleh reumbang

Jinoe neutueng adek putroe
Neupuwoe bek le di padang
Tajok kuta ngon meuligoe.
Tapeujaroe dum tapulang

Bahle lakoejih keurajeuen
Tajok mideuen gampong ngon blang
Rakyat le that hana bagoe
Sajan adoe sideh di blang

Tayue duek lom dalam nanggroe
Bah tasapoe laen urang
Ureung gampong bek tabri toe
Meunyo jiwoe dum tasagang

Bahle jiduek dalam rimba
Biek ceulaka bangsa kurang
Patot gata jibri malee
Han sidroe mee teuka sayang

Le that he du guna gata
Keupeue guna uleebalang
Aneuk peurumoh dum takira
Tabri ija bajee pinggang

Padum subang nyang meujintra
Euncien mata gleueng teurawang
Gata jiboh han jikira
Tatiek lam paya umpeuen bubrang

Jinoe he du tueng aneukda
Na soe kira jampang alang
Teuma seuot poteu raja
He aneukda putroe bintang

Nibak lon tueng tuan putroe
Bah lon boh droe u gunong hitam
Ka lheuuh dilee lon bri ingat
Lon amanat yoh goh jeuet prang

Han jipateh dum syeedara
Aneuk ceulaka paleh suang
Keupeue jeuet lom jinoe ka lheuuh
Buet ka leupah ka talo prang

Dilee kukheun han kapateh
Meunoe meudeh kagurantang
Di kee kuyue turot payu
Di kah laju kayue muprang

Putroe Hijo nyang that paleh
Le that reunteh aneuk jalang
Jinoepi bah kujak lam gle
Nak pueh ate rimueng kuran

Dalam nanggroe han kuduek le
Bah le mate nyawong hilang
Neucok tungkat mat u jaroe
Hana sidroe le meuriwang

Rakyat Usmanpi abeh woe
Seungap nanggroe ka talo prang
Beuribot Tapapi ka jiwoe
Juhan meuntroe bangsa Ideurang

'oh troh keudeh bak samlakoe
Jibet jaroe le meulayang
Ampon tuanku payong nanggroe
Ka seuleusoe he jeunulang

Rumoh han le dum ka tutong
Nanggroe gampong jeuet keu padang
Po cut putroe ka meuuntong
Panyot tanglong mee tariwang

Tuanku woe jinoe leugat
Hana sapat le meusagang
Nyang na tinggai kuta meuligoe
Laen sinaroe peungeuh lapang

Kuta ka soh mideuen luah
Raja leupah jak meudagang
Jinoe tuanku pakri pike
Ureueng han le inong agam

Ban neudeungo haba meunan
Neukheun yoh nyan bak cut intan
Wahe adek tuan putroe
Pakri jinoe mee tariwang

Meurak Asanah teuma seuot
Ban nyang patot he jeunulang
Bak pike lon meunoe leumah
Jak tueng ayah dilee pulang

Meuka neuwoe u meuligoe
Dum geutanyoe dudoe datang
Tayue jak eu bak barangsoe
Tayue sidroe uleebalang

Ureueng nyang plueng dum tayue woe
Bek soh nanggroe timoh bak drang
Areuta gadoh dum tagantoe
Maseng bak droe dum tapulang

Rumoh tutong dum tapeugot
Tayue seutot dumna tokang
Mangat jeuet ji'ibadat
Meunan deelat bak lon reumbang

Cut Usman seuot leugat
Bak lonpi that gaseh sayang
Teuma neuhei Beuribot Tapa
Ureueng tuha nyang guree prang

Akai jroh that hana tara
Ngon suara that meulumbang
He panglima lon seuraya
Jak tueng raja uleebalang


Puwu laju keunoe sigra
Meunoe haba takheun beu trang
He tuanku po meukuta
Keu aneukda gaseh sayang

Narit aneuk Meurak Asanah
Saleuem seumbah keu jeunulang
Deungon judo Usman Basyah
Ampon meu'ah dum sibarang

Teulah lalu aneukda meulintee
Bek neumalee talo bak prang
Hana hajat lon keu nanggroe
Pulang keudroe dum sibarang

Meuhan tuanku jinoe neuwoe
Aneukneu putroe jadeh hilang
Meuhad mate bak neutop droe
Jadeh sampoe nyawong karam

Abek wasiet banta muda
Beuribot Tapa beudoh rijang
Teuduek 'oh noe jiled keu sa
Bak jiled dua raya that prang





PN BALAI PUSTAKA — JAKARTA